

戰爭與宗教

王正廷題



國立北平圖書館存覽

著者敬贈



戰爭與宗教

王正廷題



詞 書 獻

Because of her great love for my country, her manifestation of the spirit of Jesus Christ in her noble unselfish Service to save and uplift my people, I humbly dedicate this book to Madam Chiang Kai Shek.

蔣夫人宋美齡女士
爲一忠實基督教徒
相夫衛國均具熱誠
此次抗戰尤爲出力
任何犧牲亦所不辭
爲國爲民又爲宗教
丹心服務貢獻血誠
舉國人民莫不欽敬
敬獻是書謹表微忱
願神祝嘏錫爾遐齡

蔣委員長伉儷宵旰憂勞之近照（美著名美術家胡露父由照片轉繪）

TIME

The Weekly Newsmagazine



Painted for TIME by S. J. Ward

MAN & WIFE OF THE YEAR


"Any sacrifice should not be regarded as too costly."
(See FOREIGN NEWS)

Volume XXXI

Number 1

暢銷全美之時去選蔣委員長夫婦為世界最大偉人之並此將此繪像於刊封之謹轉載

The Prayer at Valley Forge



華盛頓在戰區抗敵懇切祈禱圖（有說詳一百十九版）

李序

我國民族性愛和平。不喜戰爭。故歷代所謂聖主賢君。對內則取重文輕武之政。對外則施化干戈爲玉帛之策。務使百姓得安居樂業。雖有用兵。無所用之。爲父母師長者又常以「好鐵不打釘。好仔不當兵」之語訓誨其子弟。勉其爲「士君子」而恥爲「赳赳武夫」。子弟所讀之書。盡滿非戰之論調。所得之印象。皆是參戰之慘狀。故一有敵國來侵犯。則心驚膽裂。甚至拋棄節義。俯首投降。甘作敵國之順民。雖有精忠貫日月義氣凌雲霄之勇士。如岳飛、李綱、陸秀夫、文天祥、張世傑、史可法等英雄豪傑。亦不能挽狂瀾于既倒。

幸而我國民衆。今日雖然如舊酷愛和平。但多數具有愛國觀念。及救國熱誠。深知今日情形與昔日大異。昔日外敵如金人蒙人滿人等。只能傾覆我國之朝廷。但不能毀滅我國之文化。彼輩不特不能毀滅我國之文化。並且受我數千年之燦爛文化所融化包羅。今時則不然。若果敵人戰勝我國。匪獨佔據我土

地。削奪我主權。更換我政府。毀滅我文化。並且毒殺我人民。使我四百兆人口逐年減少。生存者亦懦弱不振。庸劣無能。而任由其魚肉。任由其驅使。

因爲我國民衆。多數有愛國熱心。有救國能力。深知亡國之慘。且深信欲得真正和平。欲享自由幸福。必要抗戰。故甘心犧牲一切。誓與殘暴之敵人拚命戰爭。或戰一年。或戰五年。務使敵人潰敗爲止。

此次戰爭與吾人之宗教信仰。尤其是基督教之信仰。有無舐觸。既誓拚命與敵人抗戰。究竟吾人有無最後勝利之把握。此兩大問題。已由周伯琴牧師作一甚滿人意之答案。分期登載三藩市金山時報。周牧今將此答案。編印專書。並附孫總理昔日之證道書函及蔣委員長之證道文章等。以貢獻於海內外同胞。囑書數語。以弁簡端。紹昌不才。勉爲應命。倘我僑梓各手執一編。以堅抗戰必得最後勝利之信心。是不僅周牧與紹昌所厚望也夫。

中華民國二十七年一月二十一日李紹昌草於檀島夏威夷大學

蘇序

哄動全球之中日戰爭。瞬將一年矣。彼欲速戰速勝之敵方。今已弄成難戰難結之長期相斫局面。推原禍始。仗勢凌人之日軍閥。實不能辭其窮兵黷武之咎歟。

論戰者。有以軍事爲背景。每炫於對方軍備之盛。利械之多。初嘆爲自不量力者。今經九閱月之血戰。始悟精神確能勝過物質矣。今後如能擴而充之。再接再厲。則吾國將與美十三州。以無久練之兵。與精良之械。而終得獨立平等自由者。相媲美矣。

以政治論戰者。每謂日軍侵華愈甚。愈促我國團結一致。開古今未有之真正大統一。吾人又將敬謝敵人不已。同時對方內部情形。則爲民衆厭戰。兵士畏戰。工人拒戰。士人反戰。商賈恨戰。彼主戰之日軍閥。內不得民情真誠之擁護。外而行軍不利。輿論羣起攻之。彼蓬勃之野心雖大。終奈外強中乾何耶。

以經濟而論戰。日方於過去九閱月中。約已浪費三十餘萬萬之鉅。猶以爲未足。今擬以四十八萬萬。爲本年之戰費。夫以有限之財源。供無限之戰爭。非僅徒然勞神傷財。實又爲日本自殺政策之實施。愚爲三島六千萬人民哀矣。至於以國際公法論中日不宣而戰者。幾乎無人不指日方爲破壞九國公約。非戰公約及國際聯盟盟約者。口誅筆伐。幾使對方體無完膚。惟本宗教之眼光。爲平心靜氣之公評。尙不多見。有之。首推來美考察教育。現任廣州興華中學校長周伯琴牧師。最近所著「戰爭與宗教」一書爲濫觴焉。

去冬愚以調查宗教文化事業。遠遊美東三閱月。蒙周校長不遠萬里。飛郵贈送該書原稿一束。並囑爲序。愚於百忙中。拜讀一過。深覺所見遠大。所論尤爲公平。祇以旅途忙於奔走。無暇執筆。今春自東而西。又值洽裝回國服務之頃。祇以該書爲國外難得之作。對於日本內情分析。尤爲盡詳細之能事。又關救國救人大道。誠爲人人必讀之書。因樂爲之序。

民國廿七年三月廿五日蘇醒之序於舊金山中西日報編輯室

黃序

宗教者、建設人類一切幸福之樂園。戰爭者、破壞人類一切快樂之地獄也。樂園爲吾人所樂到之地方。地獄則爲吾人所不願去之絕境。世界之所以有宗教者。其大願在于消弭戰爭。導人類以滿足之愉快。然而宗教愈昌明。戰爭之利器亦愈進步。顯然道高一尺。魔高一丈。戰爭之魔。非欲殺盡人類。消滅宗教不可。歐戰開始。巨炮轟發。屍首遍野。家散人亡。極其悲慘。此種情形。似非人力所能制止與救護。近如我國自衛抗戰。備受暴倭之轟殺。爲我國歷史上空前之悲慘。我人困于利器。浴血抵抗。以十當一。忍痛禦敵。十月以來。均能予敵人以相當之消耗及巨創。此何故耶。余嘗自思。假如世界真無人道可言。宗教一定不能存在。反而觀之。世界最兇之戰爭。終爲信仰宗教之政治統帥所破滅。證之歷史。如美國華盛頓等。歷歷如繪。此次倭軍雖兇。土肥原、田俊六、本庄繁等惡魔。必爲我蔣委員長以革命之精神。正義之權威。宗教之信

念。逐個破滅之。則制止暴力與救護災黎之權力。亦實有賴于宗教之統帥。神其鑒諸。始能爲之矣。

周君伯琴。此次重遊美洲。曾以餘晷。前往各地中西社團。演講倭寇之暴行。及侵華之非法。與中國必獲最後勝利之理由。并著作抗日文字頗多。散登各報。以廣宣傳。近著「戰爭與宗教」一文。曾載于金山時報。洋洋五六萬言。闡發戰爭與宗教之理論。極爲新穎而詳盡。讀者羨之。近以其原文。印爲單行本。指日出版。以供世覽。誠爲海外抗戰文字之負有重大意義與特別使命者。國人手此一本。卽能增強抗戰之決心。與奮鬥之精神及信仰最高領袖必能復興中華民族以獲最後之勝利。且能領導吾人出於悲慘之地獄。以進愉快之樂園也。余讀其書既竟。深佩周君理論之高深。引證之充實。足以風行于世。特書此以贈周君。尤可喜者。周君不獨著成此傑作。且同時得其母校贈予博士學位。於教於國。亦有裨焉。

民國二十七年四月二十五日黃社經序於三藩市中央國醫館駐美分館

胡序

世局治亂無常。人情思治厭亂則一。惟世局混于亂而戰爭劇。人情向于治而宗教殷。未有戰爭而可以言治也。未有宗教而可以言亂也。蓋宗教主治。尙和平也。戰爭主亂。最不和平也。和平不和平之二者。未僅猶柄鑿不相入。其背道而馳。直南轅而北轍。吾人立言著述。詎無方寸。周牧伯琴撰是書。偏命相反者之兩扇爲題。又胡爲者。噫、我知之矣。周固基督宗教之牧。一飯之頃。不忘宗教。其爲主道也切。又爲興華學校之長。三秋之別。所苦戰爭。其爲國難也激。根斯二因。遂忘形而露肺腑於不自覺。猶之韓子祭十二郎文。發抒於其至情至性。它弗暇及耳。故是書之題。戰爭與宗教可。宗教與戰爭可。戰爭不與宗教。宗教不與戰爭。亦無不可。顧必如周牧其人。始可以題此。至於其行文。體裁綦嚴。錯綜紛演。眉目劃清。靡不條分縷晰。使人讀之。如入山陰道

中。目不暇給。由于撰材豐富。述事翔實。敵我兩方。瞭若觀火。于道于國。雙管齊下。非閱歷有素。深熟中外之遠史近情者不能道其隻字。閱歷有素。深熟中外之遠史近情。而非愛道得靈火薰炙。愛國具熱血沸騰者亦不能道其隻字。深信斯刊貢獻。目游而腦印。不啻投將成冷心之信徒。與委靡不振之國人以奮興劑。其有關於教義國情。豈曰小補之哉。予愛其文。益敬其人。而樂爲之序。

民國二十七年三月十五日胡魁于廣州興華中學校

自序

予此次重遊美洲。乃爲廣州興華中學遷建新校籌款。及因過勞順來休養。不意去年七月中日啓釁。募捐進行於是停止。得藉此時間休養。私心竊幸。但覺此次國難嚴重。危機日迫。凡屬國民。均應盡其所能以贊助救國。予雖仍以興華中學校長名義在廣州擔任救國公債勸募隊長之一。及盡份捐輸薪俸。然身在此處國外。亦應盡所能以貢獻。故時應中西社團如本埠基督教聯合會。旅美華僑統一義捐救國總會。及怕罇度西人浸信教會等等團體。演講關於此次中日戰爭之是非曲直。我國必獲最後勝利之理由與根據。日本致敗之弱點。及其違背宗教之教訓。以感動聽眾。而得其同情之贊助。戰勝仇魔。講後、並將所講意義撰述。分登本埠金山時報、中西日報及少年中國報等。藉以推廣宣傳。復蒙讀者謬許。多有勸請輯印專書。普及大眾。竊思爲是文時。隨意著就。所取材料多由國內外中文日報。及本埠英日文等報。且是次來美。絕無意於著作。故並未帶書籍携來。無以參考。書中所引歷史、故事、成語等等。祇憑記憶力得來耳。况趕速發刊。詞句多未修飾。而校對亦涉疏忽。不獨有魯魚亥豕

之差誤。抑有編排句讀之錯漏。蓋予於精神未甚恢復之際。而作此嘔心血、絞腦汁之文字工作。實屬不知自諒。以致精神疲憊。體重頓減。著作一時。又要休息。休息一時。又復著作。夜以繼日。無時或釋。多友勸阻。謂著成一書而失爾之生命有何益哉。予細思。亦良以爲是。故屢欲中輟。而棄置之。但在他方面着想。凡成一事。必有犧牲代價。不能僥倖而致。犧牲愈大。則所收效果亦愈多。且有此特殊爲國、爲人、爲道之時機。雖辛苦勞瘁。亦義不容辭。孔聖謂「或安而行之。或利而行之。或勉強而行之。及其成功一也」。予著此書。或安而行之固不是。或利而行之更不敢。惟有勉強而行之而已。得其成功。亦算萬幸。且同時將此書大意轉釋英文。藉以在西人方面宣傳。又作數篇文件以應母校下技利浸信神道大學贈予學位之需要。凡此種種。亦有加增此書不能出版之虞。然今卽獲出版。亦難免有未臻妥善之處。尙祈閱者曲爲諒之。矧在國外印刷。諸多未備。又需時。又不經濟。甚願不久的將來。在國內再版時。重加刪訂。編配一過。俾蔚爲善本。則幸甚焉。然是書終獲「大致不差」出版。及賤體隨卽恢復健康。亦感謝神恩默助不置也。

主歷一九三八年四月二十六日周伯琴自序於美洲三藩市華人青年會

戰爭與宗教目次

上篇戰爭與宗教

挿圖 蔣委員長伉儷玉照 華盛頓抗敵祈禱圖 十字軍東征圖 中國抗戰衝鋒殺敵圖

耶穌施教公義和平圖 蔣委員長玉照 蔣委員長題字

第一章 導言 (一至七版)

第二章 此次戰爭日本違背宗教之教訓 (八至十七版)

一、公理 二、正義 三、人道 四、忠信 五、仁愛 六、誠實 七、良善

八、互助 (一一七—一二八版) 九、和平

第三章 此次戰爭日本自身致敗之理由 (十七至五十二版)

一、民族性之不善 甲、脆薄 乙、卑劣 丙、狡黠 丁、貪鄙 戊、驕蹇

二、國情之弱點 甲、人心紛歧 乙、財政支絀 丙、軍力消耗 丁、國際共惡

第四章 此次戰爭中國終獲勝利之理由 (五十二至九十八版)

一、根據軍力 二、根據財政 三、根據人心 四、根據土地 五、根據人口 六、根據國情

七、根據歷史 八、根據國際之同情 九、根據蔣委員長之經驗 十、根據宗教

第五章 結論 (九十八至一一六版)

一、誠懇祈禱 二、盡力輸將 三、自力更生

下篇救國與祈禱

插圖 大衛戰勝歌利亞圖 華盛頓領議員在國會爲國難祈禱圖 著者近照 著者題字

第一章 導言 (二百廿一至廿三)

第二章 論救國 (一百廿四至卅四)

一、救國即是救世界 二、救國即是救家庭 三、救國即是救自身 四、救國即是救後代

第三章 論祈禱 (二百卅四至四十二)

一、感格天心 二、感格他人 三、感格自己 四、感格仇敵

第四章 論救國與祈禱之關係 (一百四十二至四十四)

第五章 結論 (二百四十五至五十二)

附載 公開問答 孫中山先生証道函 蔣委員長耶穌受難予余之教訓 華盛頓抗英誓師文

附告(一)本書插圖、極爲名貴難得、且切合於戰爭與宗教之意義、華盛頓領議員在國會祈禱圖、找尋數月、走遍數城市、均不獲得、卒至由卜技利浸信神道大學校長 Dr. Fleming 致函紐約耶路大學印書局、用「人事」及五元另飛郵費五毫始採得「版權」及該畫、其餘華盛頓在戰區祈禱圖、耶穌登山施教圖、及十字軍東征圖等、均難取得、中有一幅、用數元購一套書而始得者、不獨需時候找尋、且要用高價也、(二)本書一部份所敘中日兩方之事實及數目字、是有時間性者、但可作此次戰爭之初期歷史觀、書內上篇第二章第八節互助漏排、補錄於一一七、一一八兩版、第三章第一節戊段民族性之駢楚、應刪作駢楚、其餘錯字及圈點欠妥者、亦有些少、希閱者鑒原、(三)本書志在宣傳、不計工本、定價格外從廉、望閱者多購贈送友人、以廣宣傳、而助國家、爲禱、

WAR AND RELIGION
PART ONE

"War and Religion"

- I INTRODUCTION
1. The Relation Between War and Religion in the World of Yesterday
 2. The Relation Between War and Religion in the Sino-Japanese Conflict of To-day
- II THE JAPANESE ANTAGONISM TO RELIGIOUS TEACHINGS BEHIND THE INVASION OF CHINA
1. Public Justice
 2. Righteousness
 3. Humaneness
 4. Loyalty and Faith
 5. Love
 6. Sincerity
 7. Goodness
 8. Mutual Aid
 9. Peace
- III IN THE SINO-JAPANESE CONFLICT JAPAN HAS WITHIN HERSELF THE REASONS FOR HER FAILURE TO WIN THE VICTORY
1. The Weakness of Her National Characteristics
 - (a) Unstable and Fragile
 - (b) Grovelling and Mean
 - (c) Cunning and Scheming
 - (d) Greedy and Envious
 - (e) Fretentlous and Unworthy
 2. The Weakness of Her National Conditions
 - (a) Strife Among The People
 - (b) Financial Difficulties
 - (c) Decline of Military Strength
 - (d) Condemnation by All Nations
- IV CHINA HERSELF HAS REASONS FOR FINAL VICTORY IN THE SINO-JAPANESE WAR
1. Based on Her Military Force
 2. Based on Her Financial Strength
 3. Based on The Spirit of The People
 4. Based on The Extent of Territory
 5. Based on Her Huge Population
 6. Based on The Progressive Conditions of Country
 7. Based on The History of Culture and Teaching
 8. Based on The Good Will and Sympathy of All Nations
 9. Based on The Experiences of Generalissimo Chiang Kai-Shek
 10. Based on The Force of Religion
- V CONCLUSION: THE PRESENT CHALLENGE TO CHINA
1. Devout Sincerity and Devotion to God
 2. Contribution From all the Chinese of Self and Substance to The Country
 3. Rebirth of Moral Spiritual and Physical Energy of The Chinese People Themselves

PART TWO

"Salvation of Country and Prayer"

- I INTRODUCTION
1. Explanation of Combining Salvation of Country and Prayer With War and Religion
 2. Our Country Needs This Salvation
- II SALVATION OF COUNTRY
1. Saving Country Means Saving the World
 2. Saving Country Means Saving Our Families
 3. Saving Country Means Saving Ourselves
 4. Saving Country Means Saving Our Descendants
- III PRAYER
1. Influencing God
 2. Influencing Others
 3. Influencing Oneself
 4. Influencing Enemies
- IV THE RELATION BETWEEN SAVING COUNTRY AND PRAYER
1. Man's Power Limited
 2. God's Power Infinite
 3. Man Proposes; God Disposes
 4. God Gives Strength and Wisdom
- V CONCLUSION
1. God Answers Man's Prayer Sometimes Quickly
 2. God Answers Man's Prayer Sometimes Slowly
 3. God at Last Must Answer Our Prayer
 4. With Concerted and Enduring Prayer God Will Help Save Our China

"WAR AND RELIGION"

Preface

I have returned to this side of the world because I wished to promote the work of the Hing Wah Middle School and the Hing Wah Baptist Church of Canton. Unfortunately for me the Sino-Japanese conflict has upset my plan and hindered my progress.

During the interim, I have been guided to employ my enforced leisure in writing a long treatise on "War and Religion", perhaps a better work in God's sight than promoting Hing Wah activities.

I have previously given addresses on this subject before the Chinese Christian Union and before the China War Relief Association of America in San Francisco. Several Chinese daily papers have published the addresses above mentioned. This series ran for many weeks in the papers. Many readers were much interested and many have urged me to publish my treatise in one volume, a considerable number paying in advance for the book. Because of these urgent requests, I herewith offer my contribution "War and Religion".

My purpose in writing this book is first, to enlighten the people in both America and China as to why China herself believes in her final victory in the present Sino-Japanese War; secondly, to make the Chinese realize the necessity of giving themselves in their entirety to the encouragement and aid of their government in this crisis. Victory will surely follow if each one gives his all. My purpose is further, to make the people realize that Japan has reason to fear defeat because of her own deficiencies; and also to prayerfully warn Japan that her continued aggression on China will be suicide for herself.

It is further hoped that the people may be made aware that Japan's antagonism to religious teaching is behind the invasion of China, and that Christians may be awakened everywhere to the justice and righteousness of assisting China in her need. I wish also to persuade Chinese and foreign Christians to manifest everywhere the spirit and truth of Jesus Christ in order that the Gospel of Christianity may spread more effectively and rapidly.


There is another quite different reason for my presence in America; namely, overwork in China, and complete exhaustion from my responsibilities there. So I came to this country to recuperate. Now although not being completely rested, I am compelled by my love for the Lord Jesus Christ and my devotion to my beloved country and her people to write this treatise.

Previous to this I have written thirteen books, most of them for a particular type of reader. This book is written for all people, either outside or inside of the church. May God bless this book and may it glorify Him, and be the means of blessing many people.

Pik Kum Chau

Chinese Y. M. C. A.
San Francisco, California
April, 1938

The Crusaders



十字軍東征圖

爭戰 The Chinese Soldiers Fighting their Enemies 示圖



中國兵士抗戰衝鋒殺敵圖

教宗 Jesus Teaching Righteousness and Peace 示圖




耶穌登山施教公義和平圖(詳馬太五章)

戰爭與宗教

上篇戰爭與宗教

第一章 導言

戰爭與宗教。本不能相提並論。蓋凡戰爭、則蔑視宗教。而宗教亦不容戰爭。惟戰爭與宗教自有史以來。每每相互發生關係。舊約創世記所載之創世史。其時人類產生未幾。卽有戰爭。而每次戰爭均與宗教有關。如亞伯蘭戰敗基大老瑪王等。乃天地之主。至高之神。以敵付于其手等等戰爭。均不脫離宗教。而我國歷史所載。亦有類此者。如武王伐商。昭告於皇天后土。曰、商王無道。予小子敢祇承上帝。以遏亂畧。師逾孟津。商師前途倒戈。遂一戎衣而天下定。其他或托天、或托神、以動干戈者。亦無非借宗教無形之力。以克勝其敵者。回教之左手執哥蘭經。右手執刀劍。與十字軍東征。均是宗教與戰爭結



不解之緣。清教徒離英赴美。固因英國教會專制。不許信仰自由所致。而美國抗英獨立。血戰八年。十三州人心紛歧。財政支絀。內訌外侮。事變紛乘。而當戰事危機日迫。人力已窮之際。華盛頓個人在戰場上仰天祈禱。後又召集國會。同心竭誠。懇切呼籲於上帝。禱事既已舉行。抗英獨立。果日見成功。摩西帶以色列人過忽爾開路之紅海。漢光武敗走得渡驟然結冰之滹沱河。皆前無去路。後有追兵。竟得安然渡過。史均謂其有神助也。是亦即戰爭與宗教有連帶之關係者。歐洲大戰時。予曾著關於戰爭與宗教一文。登諸廣州眞光雜誌。歷舉當時戰爭與宗教之關係之事實。讀者韙之。此次日本迫我國與之發生戰爭。日皇即詣明治及靖國神社禱告。乞靈於所謂至尊無對之天神。以求戰勝。其軍人官佐未出發前。亦多先到神社祈禱。領取神佑符或血誓符佩帶。以保護身軀。不致於戰死。而我國對於此次戰爭。國內外教會基督徒。除通常爲國祈禱外。更特別組織國難祈禱團。或戰時服務團、宣傳部、救護隊、及籌款會

等。以助戰爭之勝利。在華各外國宣教士。本身固爲此次戰爭祈禱。更請各該國基督徒代爲禱告。我國領袖蔣委員長。是一忠誠基督徒。當此戎馬倥偬。軍書旁午之際。每晨仍照常用一小時密室讀經與祈禱。有時爲國難祈禱。而至懇切欲泣。想其他當局之基督徒。當此國難嚴重時期。亦必同心呼籲。綜上以觀。可知戰爭與宗教關係之概況。惟戰爭勝敗。與宗教究有何關係否。此則視乎戰爭者所崇奉之宗教純正與否。及戰爭之宗旨與舉動合宗教之教訓與否。然後可測知其最後之勝敗。雖戰爭之勝敗。非全取決於宗教。惟宗教可衡量或潛助其勝或敗。或曰、此次中日戰爭。既與宗教發生關係。但勝敗從何而斷之。予不敏、僅將管見畧述之如下。以見一斑。

日本人民所信仰之宗教。大抵爲佛教。信其他各種宗教者不甚多。但日皇及高級執政者、則幾全是佛教徒。未聞有信仰基督教者。其人民信仰佛教。又多不是信仰正宗之佛教。故國內各城市。均有大小神社設立。神社不是純粹之

佛教。乃是與日本神道教混合而成。鄉間則木偶菩薩。隨處可見。喃齋超度。附薦立靈。種種迷信之舉。亦頗盛行。予前年遊日。到鄉村各處。尙見有許多超度附薦東三省及淞滬陣亡將士之靈位名牌。元寶香燭。通書符咒。用者甚多。占卜星相。超幽放焰。亦所在多有。且有以聖賢豪傑爲神而崇拜者。可知日本雖號稱文明強國。但所信奉之宗教。是迷信混亂之宗教。或曰、日本既奉迷信之宗教。何以得如此富強。不知實地觀察。日本強、是真。富、則未必。因其國中尙多有窮而流浪之人。服裝藍縷。鶉衣寒素者。在鄉間仍多觸目。且飲食多極粗賤之資養料。日中僅得一飽。便算幸福。且政府財政。時形拮据。國債纍纍。所以由日本整個觀察。固不如英美美國之豐富雄厚。卽與我國相較亦優勝不多。又焉得爲富。而所謂強、亦不過是迷信武力。堅船利炮。橫暴凌人之強。並不是根本深厚。泱泱大度之強。日將松井謂、「此次戰爭之宗旨。是解除中國人民之痛苦。及提高中國人民之生活。中國人須認之爲良友。」之語。

實屬大言不慚。罔知羞恥。蓋自己國內人民生活。且不能提高。焉能提高別國者。且併轄之高麗與臺灣等地。其人民所受之痛苦。更有甚於從前。誠自欺欺人。以掩飾其侵畧之罪惡。是亦關於其所信仰之宗教虛偽與迷信故也。

我國最高領袖蔣委員長。自歸信耶穌基督後。對於基督教義。身體力行。以基督之犧牲博愛寬大仁慈之精神。盡忠國家。訓導屬下。以及安內攘外。而謀民族解放與幸福。更以基督之主義。發起新生活運動。以培民德。而補民族民權民生主義之未逮。其在耶穌受難予余之教訓講詞中。有曰、「總耶穌一生。無日不在蒙難期間。其堅苦卓絕。博愛慈祥之精神。澈始澈終。未嘗稍懈。而余所得之教訓。亦以此爲最大。先總理、耶穌基督徒也。出其得於耶穌者。爲弱小民族謀解放。爲痛苦民族謀幸福。浩氣長存。光爭日月。余爲從事中國國民革命之一人。余對總理信仰之篤。當時雖無宗教之關係。然實無異於宗教。亦卽宗教式之信仰。此余所以始終能爲總理三民主義救國救民之信徒。而今且

成爲耶穌救人救世之信徒矣」。又在是年雙十節播音演講。有謂「我儕須記得孫總理最後一句遺教。所謂「和平奮鬪救中國」。斯言不獨要自救。且要救世界。此是基督犧牲博愛與和平之精神。此真理、是永久不可磨滅者」。觀此、可知蔣委員長對於基督之如何信仰。及如何步武基督也。此外我國高級當局及要人。如孔祥熙、馮玉祥、王寵惠、孫科、宋子文、宋美齡、鈕永建、陳樹人、顏惠慶、張之江、陳友仁、及駐美大使王正廷等先生。均信仰基督宗教。國府主席林森先生。自謂「幼時在福建美以美教會讀書。雖未受洗禮。但已深沐基督教訓」。是亦有實無名之基督徒也。比之日本高級當局所信仰之宗教。則有涇渭之別。我國人士雖有多數信仰佛教。或其他各非正式之宗教。而信仰基督新教及舊教（天主教）者。亦甚衆多。我國雖不能稱爲基督教國。而基督徒在各團體機關中、提挈服務者。大不乏人。對於此次抗日救國工作。更不遺餘力。反觀日本軍人以所迷信之宗教符錄爲護身符而屢被吾人俘獲者。真不

可同日而語。故所崇奉之宗教。與戰爭之勝敗。亦關係中之一也。

其次、戰爭之勝敗。與真正宗教之教訓。有莫大之關係。真正之宗教維何。惟基督教可以當之。蓋基督教由世界人類之經驗。與歷史社會之觀察。認爲最純正、最完善、最普遍、最實用、最有理性、最有情感、最有效果之宗教。此非予一人之私言。乃各國識者所同認。此意在鄙著「宗教與人生」一書詳載言之。且有謂基督教乃宗教之宗教。真理之真理。基督曰、我卽真理。此真理亦卽上帝之大法。或稱自然律。可以映千古。垂萬代。其支配宇宙。順之者昌。逆之者亡。凡事然、凡人然、戰爭亦莫不然。此次日本逼我國與之戰爭。卽背逆此真理所含之道德。此道德、亦卽世界所承認人類應有之道德。前世界的哲學家在倫敦奧士佛開哲學大會時。亦曾承認此道德須建基在宗教之上。其道德爲何。卽公理、正義、人道、忠信、仁愛、誠實、良善、互助、和平、等等教訓。茲詳述之於第二章。請參閱之便知日本所違犯宗教之道德也。

第二章 此次戰爭日本違背宗教之教訓

一、公理

公理者、即公共應守之法理。亦即上帝爲人類制定一種之道德自然律。適與人類安身樂利。相生相處之法則相稱。蓋此公理之本意。無非是上帝爲人類保障生存。圖謀幸福之計劃也。守之者、則彼此相安。背之者、則禍患隨之。日本此次因遂其侵畧私慾。對我作戰。以強硬手段。搶掠我土地。而擴張其帝國主義。師出無名。全無公理。爲世人所公認。初則國聯五十二國通電、譴責其罪狀。繼則比京會議。十五國宣佈其非法。違背公理。且日本不獨違背公理。更欲以強權壓服公理。但舊約箴言曰、「惡者強暴。不行公理。終必敗亡」。是知公理、到底必克勝強權也。

二、正義

正者、真正也。義者、事之宜也。日本向我侵畧。本極不義。但彼仍矯飾諉爲自

衛。及爲中國人民請命。以提高中國人民生活。乃事之宜也。義也。不知其所謂義、非正義也。乃假正義之名以行惡。蓋其所作爲。不特非事之宜。實如爲非作歹之不義強盜也。尙何有正義之可言耶。屋省杜沙埠西文輯表報。謂「日本是一虎狼。是一強盜。乃無惡不作之兇犯。日本政府是全無正義、無法律之政府。世界各國、均宜以對待強盜之辦法對待之」。是知日本爲不義之國。不祇是我人一方面之私言也。聖經曰、「義者、必得永生之賞賜。不義者、必有哀哭切齒之永刑」。又曰、「非義者、必受非義之報」。日人其好自爲之。

三、人道

日寇轟炸我國婦孺。屠殺我國平民。淫辱我國婦女。其兇狼殘暴。實爲亘古所未有。甚至孤兒院、盲人院、醫院、禮拜堂、紅十字會、學校等等。莫不被其炸毀。斃人無數。至用毒氣以作戰。酷刑刺殺我俘兵。收買漢奸以放毒。濫炸漁民以示威。種種忍心害理之慘劇。尤爲人類之蠱賊。其當局答覆美國抗議。尙

謂非殘殺不足以令戰事早日結束。不啻自認其慘無人道之供狀也。且據三藩市江尼古西報稱。日本此次侵華。常有許多兇殘之事跡傳播。但未得有確鑿之證據。現時各報館得有可信之真實消息傳到。可謂確鑿而非偽造者。卽有十名美國傳教會之代表簽名于一報告中。此班人在上海聚集。簽名之後。將之付來美國總會。該參加之代表。有屬南美以美會。北美以美會。南長老會。北長老會。南浸信會。北浸信會。救世軍會。安息日會。網紀慎會。監督會等。其報告內有一部份是表出日軍所佔據之地方。發生許多姦淫之事。倭兵強入難民住區。或教會產業樓宇。擄去許多婦女。甚至在教會樓宇中作強姦之獸行。十一二歲之女童。至四五十歲子女眾多之婦人亦不能免。又任意毀壞樓宇、學校、禮拜堂、醫院、及教會人之住宅。且所有物件。大概而論。皆被其劫掠一空。有等傳教士不忍離其職守。而盡力照料無家可歸。抵餓受凍之難民。因彼等流離失所。狀至可憐。服務之傳教士。說不盡所遇之慘事。其自己亦屢

受寇兵凌辱。最難之工作。爲巡邏此等安全區。免被倭兵竄進。尤注意者。爲不令倭軍污辱避難之婦人女子。但各傳教士手無武器。故常遇有被處死之恐嚇。據漢口民眾宣傳部稱。倭軍之殘暴。爲古今所未見。將被俘虜華軍。以繩聯繫。淋以火油。放火焚燒。又將被淫辱之婦女之丈夫及男界親屬殺害。以肉鈎鈎入胃中懸起。聽其自己痛死云云。觀此、則知倭寇真是慘無人道、禽獸不若。此種行爲。實爲天地所不容。神人所共憤。蔣委員長謂其作此殘酷舉動。適足以自取滅亡之道。誠非虛語。蓋上帝十誠之第六誠。「勿殺人」。第七誠。「勿姦淫」。第八誠。「勿偷竊」。三條誠命。不獨犯之。而且更加甚焉。自必難逃天誅也。

四、忠信

日本人忠君。似爲世所稱道。但其實未必盡然。因有利用所謂「天皇」、以便其私者。且多屬忠於金錢。而不忠於其事者。倘有金錢利益可獲。則不問其事之

合於忠信與否。亦胆敢爲之。卽如此次對於自己簽字之華府九國公約。巴黎非戰公約等。公然破壞。以武力攫奪我土地。不顧國際間之信約。而與我國所立種種條約與協定。可以任意推翻。或增訂。卽是次蘆溝橋停戰協定。三翻四覆。一面講和。一面進兵。毫無信實。卒至幹其橫蠻舉動。實行其大規模盜賊勾當。觀此、日本人之忠與信。皆淪於破產也。基督之道。對於忠信。非常注重。觀其「受託」之譬喻。與「是是否否」之教訓便可知。日人所行。與此大相違背。古人謂民無信不立。日本國無信、亦不立也。

五、仁愛

仁愛與戰爭。是不能相並立者。因凡戰爭不講仁愛。仁愛不講戰爭。但交戰中優待對方俘虜。不殘殺失戰鬥力之敵兵或傷兵。亦可畧表戰爭中之仁愛。茲次日寇對待我國。適得其反。而我國對待其俘虜。一律加以優待。受傷之飛行員。更爲之治愈減其痛苦。此亦喻仁愛於戰爭中。且以日本整個民族而觀。仁

愛性亦頗缺乏。蓋其對於捐輸以辦公益慈善事業。亦不多觀。賑災恤鄰之舉。絕無而僅有。予在彼邦詢及該處華僑。擬請與其有交易之日人捐資助學。據謂日人素稱吝嗇。於本國公益事業。尙少捐助。何況資助外國。視夫歐美人。在本國固肯慷慨捐輸。於外國亦量力贊助。或遣人往外國宣傳基督仁愛之宗教。以助人類進化者。眞有天淵之別。日本政治亦側重無情之法律。不重恩典之仁政。有謂日本之政治。如唐虞三代之盛。我國或不妨受其治理。但予謂卽如是。亦不甘願受其管治。何況其政治苛酷。缺乏仁慈。尤其是對於被其征服之民族。苛刻殘暴。無所不用其極。觀其對待在其鐵蹄下之高麗、琉球、臺灣、及僞滿而益信。古人云、「刻薄成家。斷無久享」。日本刻薄成國。亦斷無久享也。宗教爲仁愛之源頭。日本既缺乏仁慈。亦卽違背宗教之教訓。

六、誠實

戰爭本不重誠實。兵法所謂「虛者實之。實者虛之」。又謂「兵不厭詐」。但處

常之國家。與處變之戰爭不同。豈處常之國家。亦不厭詐乎。查日本國家非在戰爭時期。亦用種種奸詐、陰險、鬼蜮、假偽、詭譎手段。以謀危害他人之國。不獨對我國如是。對別國亦如是。不過對我國尤甚焉。以號稱堂堂一個強國。鬼鬼崇崇。專做蠱惑行動。或利用誘威迫。收買漢奸。或豢養兒童。在中國讀書。認作華人。以備長大時刺探我國秘密。或用女子迷惑。而作美人計之內應。或派人到各處偷繪地圖。及攝影。或造種種謠言。顛倒是非。以淆亂世人觀聽。聞日政府每年供給數百萬元。設立新聞通訊社。專事向壁杜撰。製造虛偽新聞。留心時事明白事理者。便燭見其鬼怪。更在華北恃強偷關漏稅。以作奸犯科。誘迫吸烟。以毒化人民。種種陰險。罄竹難書。即如此次戰爭。明明是其數十年來處心積慮。以侵畧我國。亦捏造事實。歸咎我方。觀其對國聯謂戰爭目的。係屬自衛。及攻打共產。非有侵佔土地野心。似此「說謊」。其誰信之。聖經曰、「說謊者、即魔鬼之子」。然則日本實為魔鬼之國。而魔鬼之國、斷

不能久存。蓋魔鬼爲害世陷人之惡靈。終爲上帝所消滅也。

七、良善

設使有人從別星球來此地球。查問日本是一個良善國家否。吾恐地球上無一人肯答曰、是。即使與彼朋比爲奸、臭味相投之意德兩國。若從良心上說、亦不敢答曰、是。意相模梳里尼、德總理歇綽、對於日本轟炸我國無辜平民婦孺。亦謂其過於殘暴。我國史謂「倭人兇悍。屢犯我國疆土。其剽竊橫行。足爲世患」。可知其兇惡亦不自今日始。此次美國對日抗議中亦謂其殘殺。有類海盜式之行爲。且其平日內政外交。均顯露其炙手可熱。猙獰之面目。不有良誼善旨。和霽可親之態度。夫良善者、乃立國之根本。兇惡者、爲滅國之預兆也。基督曰、「善樹不能結惡果。惡樹不能結善果、如荆棘中、不能摘無花果。葡萄中、不能採得蒺藜」。古人云、「作善天降之百祥。作不善天降之百殃」。又云、「善有善報。惡有惡報。若然不報。時辰未到」。吾人毋以此爲太上感應篇之

言。有涉于迷信。不知此亦是古人經驗有得、而發爲警世之箴言、以訓誨後人耳。吾人不信因果。則亦已矣。苟信、則此亦是至理名言。而不是迷信也。日本既妄造此惡因。則將亦必收此惡果也。（第八互助、因排漏。補錄於此書之末）

九、和平

戰爭是和平之反面。然則此次中日戰爭。彼此皆非和平乎。不知此次戰爭。乃日本強迫而成。破壞和平之責。應由彼獨負。蓋吾國素愛和平。爲世所重。尤其是在此積極建設。復興民族時期。更要和平。不意因是觸日人之忌。乘機實行其一貫之侵略政策。貫徹其有計畫之吞併主張。於是在蘆溝橋藉端挑釁。初、我國尙欲委曲求全。忍耐媾和。不知狼子野心。愈來愈兇。逼得抗戰。其時蔣委員長宣言。亦謂不是求戰。祇是應戰。應戰者、不負破壞和平之責。考日本自維新之初。卽積極擴充軍備。特徵收重稅。剝民脂膏。以爲購買及製造軍火之用。十七年前予初次來美。道經日本神戶橫濱等埠。見其道路窳劣。遇雨

天非常泥滓。間悉其故。因提整路之歎。撥充軍備。可知日本早已立心不軌。是窮兵黷武。破壞和平之國家。自戰勝我國及帝俄後。更驕橫日甚。窮兇極惡。不獨東亞和平爲之擾亂。卽世界和平亦將被其毀滅也。經曰、「和平者福矣」。又曰、「動刀者必亡於刀」。是亦可知日本之結局如何矣。

宗教之教訓。原不祇上文所述。然就此數端而論。日本已違犯之而無餘。焉有到底不敗之理。況其本身。又有致敗之理由者。茲叙述之如左。

第三章 此次戰爭日本自身致敗之理由

一、民族性之不善

(甲)脆薄 日本民族性之脆薄。由其風土人情。國度文物。及其創用之「假名」文字。均可見到。而所製造之貨品。亦「物出天性」。蓋出產之「日本貨」是外觀雖美。質地脆薄。且多不耐用。無論任何出品。一與歐美所出者比較。則

相形見絀。無怪人稱其出品爲化學劣貨。日人所住之房屋。亦多是矮小由紙及薄板所製成。極不堅固。此可測知日本國運。無耐久之朕兆。試設一譬以明之。日本之民族性。有如「單料銅條」。以之係水甚易沸熱。如離開火爐。則甚易冷凍。日本人、初與之相交、甚易親熱。未幾、則甚易疎冷。因其民族性之脆薄。有如「單料銅條」之脆薄。且「單料銅條」易于製造。亦易于破壞也。觀其現在之瘋狂舉動。橫行蠻幹。亦可證明其民族性之脆薄。非深厚者所宜出此。苟不覺悟回頭。必距滅亡之日不遠也。

(乙)卑劣 日本國民、大抵有自私自利之心理。見利忘義。若賄以鉅款。無論何事。他亦肯爲。甚至卑躬屈節。儘可相就。如工商兩界。倘有厚利可圖。則降低人格。或用卑劣手段。亦冀獲得。孔子謂「富而可求也、雖執鞭之士、吾亦爲之、」之句。可窺其語曰、日本人求富。雖卑劣之事。彼亦爲之也。又如覬覦我國土地。而垂涎肥沃。便不顧一切之一切。用盡種種險狠卑劣手段。拚命明圖

暗奪。尙侈言同文同種。共存共榮。不知其卑劣醜態。已昭然若揭。此次戰爭。日艦懸掛英美國旗。以圖避我轟炸。日機冒標我國國徽。以影射炸我城市。亦可見其卑劣之伎倆。日本醜業之所以盛行。淫風之所以披靡。亦是民族性卑劣片段之表徵。無論在各處名勝地方。及在各城市鄉鎮之吃茶館、咖啡店等。均多是變相賣淫之場所。予經遊歷歐美非亞二十餘國。此種風氣。未見有如日本之甚者。且聞各國地方。亦多有日本賣淫之窟穴。最近觀日軍隨營妓女之多。及在佔據地姦淫之眾。其獸慾之烈。爲古今中外所無。似此卑劣之民族性。烏值得稱爲頭等國。或富強之國家。年前有一意人。往遊日本。見其民族性、及物質上所表現者。殊不值稱爲頭等國。感於心而言諸口。適有一日人識其所講。便卽謂其侮辱日本帝國。捉將官裏去。拘留以示儆。是知日本稱爲頭等國。實濫竽充數。諺云、「衣不稱身。身之災也」。日本國、名不稱實。國之災也。是亦日本致敗理由之一。

(丙)狡黠 我國史乘載及、倭人身材短小性狡黠。毋亦如俗云、「矮仔多偈」乎。觀其製出之貨品。或生意之貿易。均有一種狡黠之呈露。如仿製外國輸入之貨品。形式上十足相似。而質地上則一成不值。聞久居日本之華僑說及、凡與日人交易久者。莫不知其狡黠之甚。並述一事證之。前某華商在日本定買大幫火柴。旋因國內忽提倡劇烈抵制日貨。振興國貨。欲賠些錢取銷定單。但該日商堅不允肯。且笑獻議謂將該火柴包裹紙。加印「提倡國貨」「挽回利權」字樣。便可掩飾。而勒令取貨。近某日本辦貨公司。竟公然致函北平美國出入口貨商。主張運日貨來北平。抹去「日本製造」字樣。易為「中國製造」。然後運往美國。以避免抵制。觀此。又可知其狡黠矣。此次對我國作戰。是明明侵畧我領土。又狡不承認有擴張領土之野心。明明破毀九國公約。又狡辯為自衛及攻打共產。夫自衛、焉有攻入別人之國土者。及攻打共產、不向蘇俄而向我國耶。世界人士、大抵一提及與日人交易。便有戒心。因恐受其狡黠之愚而上

其當也。夫狡黠者、雖或得一時之勝利。而終歸失敗也。

(丁)貪鄙 貪之一字、爲各民族人所皆有。但貪而且鄙。以日本民族爲尤甚。凡在日本居留較久。而與日人交處較多者。類能言之。雖非人人如是。但以「百分法」計之。亦較別國爲多也。日前屋奇堪麻省、杜沙埠輯表西報、發表一文。謂「日本乃是卑鄙小人之國家。行爲齷齪。毫無信義。絕不可靠。吾人向來固知日人性質如此。現時見其卑鄙舉動。如明明故意轟炸美國編尼炮艦。而詭詐委爲意外。而以卑鄙態度乞求寬恕。則前所知者、今顯爲證據確鑿之事實。日人在商業上。則失信用。不知道德爲何物。「倫理」二字。不載在日人字典中。是以殘殺無辜。則面現笑容。當堂捉獲。仍作假惺惺、奸笑狡卸之狀態。總而言之。日人是世界上最卑鄙之小人。有令人避之若浼之概」。此文可以代表多數西人對於日本人之心理。且閑常與西人談論。亦多有以日人爲 *Mean* 「卑鄙」爲 *Cheap* 「賤格」及每有呼之爲 *Jap* 「簡稱日人」。表示鄙夷之意。蓋日

本人不獨見利忘義。抑且見利以卑鄙之手段而貪求之。予遊日時。固聞該處華僑言之甚詳。而自己亦親歷其境。已被日人多次之「搵丁」。(粵俗語欺詐也)。無論住旅館。或買物。或坐「忒士」車。甚至補鞋。均有因其貪鄙之故。而受意外之損失。即補鞋小事。每每聞人說及。本是「補」幾個仙。而竟「補」至幾毫。或一元有多。且在外客往來碼頭處。每有兜搭或引誘、而作秘密賣淫之勾當。貪鄙之情。溢于言表。現隨處可見旅館所標之「茶代廢止」或「茶代恭辭」等字樣。聞從前因「茶代」。而刮削旅客之行囊者不少。以致令人裹足。故現特標明此字樣。意即謂現不再「捉豬」。(粵俗語額外多取也)而任人自由「打賞」也。至其國家。亦貪得無厭。得隴望蜀。遠者不論。即近者、既搶我東三省。繼則奪我熱河。今則大規模侵畧我華北。及鯨吞我全中國。其貪心之大。世罕其匹。且謂無土地之野心。而以組織傀儡政府以行其掩耳盜鈴之卑鄙伎倆。而自己為政府之政府。即「太上政府」。而其野心。亦可謂野心之野心。即「太上

野心」。其教育上亦有屬於侵畧性質之攀山越嶺。偷營劫寨之體操。及教兒童如欲得食天津雪梨。廣東荔枝之佳果。則爾長大時能佔奪該地。便可食之不盡。諸如此類之貪鄙教育。不勝枚舉。聖經曰、「貪爲萬惡之根。有人慕之。則迷失正道。以多苦自刺」。俗語又有謂「貪字會變貧」。是亦可知日本前途之命運如何耳。

(丁)民族性之驕蹇 日本爲一蕞爾之三島小國。人種亦較別國爲短小。雖以其刻苦耐勞。藉褊狹之愛國熱奮鬪。成爲一強國。是亦有片面之可取者。但其器小易盈。不能容物。如乞兒一朝暴富。便氣燄驕人。而忘其本來面目。曾自認爲白色高加索種人。以爲黃種是次等民族。但可惜其顏面不能如其認而轉白也。又謂吾國爲無組織之國家。此次侵畧。乃欲輪進文明於我國。不知考日本所謂立國。不過二千五百九十餘年。素爲野蠻之民族。直至漢時。始採用我國文字。其創製「假名」文字。祇在一千年前左右耳。且其「假名」文字之字

種。亦由我國漢文字首而成。又是留學我國之吉備真備返國後所創造。唐代始吸收我國文化。觀其崇奉孔子有甚於我國便可知。除大城市有孔子廟外。卽學校亦有許多設立孔子像者。至以日本二字爲國名亦始於是時。而其接受西洋文化。乃在明末清初利瑪竇東來以後。由荷蘭卑教士開其先河。未幾英德等國繼之。且其所接受者。多注重物質。而不注重精神。觀此、所謂輸進文化於我國。前者、不啻班門弄斧。後者、亦不可以爲訓也。不過益形其驕蹇而已。且曾一度以爲其創造之「假名」文字爲完善。而提倡廢棄漢文。又一度倡議廢讀英文。而以爲專用自己創造之「假名」日文。便綽有裕如。以遂其不屑假外求之驕蹇心理。不知其「假名」日文。實不足以應用。倘不借用漢文。不能作深邃之記載。或表奧妙之意義。而日文中亦有許多攙入英文音義者。且亦不能摒棄英文而不用。故其所倡議者。卒至均不能實行。由此亦可知其民族性之驕蹇。近如此次戰爭。謂我國以卵敵石。又謂要「膺懲」「征服」。至到我國

跪地求施憐憫之乞和。又以為五千「皇軍」。四十八小時可以攻陷上海。更謂不許第三國干涉。要任其獨自置我國於死地。又以紀念明治生辰禮炮實彈攻擊我國。更擬以宣戰為贈蔣介石聖誕禮物。未下南京而先在東京準備慶祝巡遊。贈飲香檳。種種荒謬驕蹇絕倫之舉。適足以見其夜郎自大。未富先驕。誠如俗語所謂、「未登天子位。先置殺人刀」之傲氣咄咄逼人也。太史公批評楚項羽曰、「其興也暴。其亡也忽」。斯語亦可移贈於日本。基督曰、「自高者、必降為卑。自卑者、必升為高」。日人其警諸。

以上所言日本民族性之不善。不過據其大體而言。其中亦不無良善者。如羅省日人基督教會領袖某君。該埠浸信教會英文報發表其言曰。「是卽是。非卽非。我雖愛我本國。但我尤愛道理。此次日本軍閥侵華。是不合道理之舉動。望我同道祈禱上帝。懲責而警醒之」。日本國內基督教領袖賀川豐彥。亦曾作論反對軍閥侵華。謂其為不合道理。但紙上空談。無濟實事。最近有美籍日

人名島野者。曾畢業四間大學。爲美國「華人之友社」之董事。現在北加省各處爲中國服務。籌款助華抗日。彼謂、「本人受良心上驅使。爲中國出力。卽本國人指予爲叛逆。或至被暗殺。亦所不惜。云云」。是知日人亦有良善者。所謂十室之邑。必有忠信。百步之野。豈無芳草。況日本民族性除劣點外。亦有優點者。如對於國家。極肯犧牲。克盡國民義務。對於個人。又能刻苦耐勞。勤儉有禮。所謂「武士道」「大和魂」、亦多有可取者。但自戰勝強俄後。此種美德漸漸消失矣。綜上以觀。日本民族性之優劣。固多有爲吾人所鑑戒。亦有爲吾人所借鏡者。但卽以日本民族性、有如是多量之劣點而論。對於此次戰爭。已有致敗之理由。況尙有其國情弱點致敗之理由者乎。

二、國情之弱點

(甲)人心紛歧 日本么麼小國。人心本甚團結。曩前有謂其是萬眾一心之國家。蓋自明治維新後。全國上下。通力合作。凡事改革或建設。均易爲力。以致

成爲現代化強有力之「法治」國。當時戰勝我國。（一八九四—一八九五）及戰勝強俄。（一九零四—一九零五）亦藉其人心團結。以爲原動力。獨惜此後因戰勝而驕。對於政治與軍事之措施。未免失當。而人心亦因之日漸紛歧。黨派崛起、有如雨後春筍。政友會、民政黨、明政會、革新俱樂部、日本民政黨、共產派之勞動農民黨、社會民眾黨、日本勞農黨、大眾黨、青年黨、等等。先後相繼成立。馴至政潮洶湧。社會不寧。因而解散國會。推倒內閣。及軍閥與元老重臣之暗鬥衝突。時有所聞。內閣首相及重臣被暗殺者。亦屢見不鮮。被殺已死者。如大久保、濱口、井上、原敬、山本、森有禮、丈杉榮、犬養毅等等。被殺而未死者。如木戶孝充、幣原喜重郎、西園寺公望、板垣退助、大隈重信、及岡田、（明殺未遂）等等。至彼等行此殘暴慘酷之暗殺舉動者。無非因痛恨黨閥、財閥、軍閥、政閥、之專擅。與壓迫。或政見鬭爭。或實現軍閥政治。而出此非常之手段。日本之暗殺。大抵是有組織的。有計劃的。乃由於護國黨之熱血青

年所組織之血盟團所主持。前年予到日本考察教育時。觀察其上下人心。無論對於政治、經濟、教育、軍事、社會、黨派等等之意見。均不一致。大有互相傾軋。彼此排擠之表露。予在彼不過數月。卽有由軍閥壓迫解散國會。推翻內閣、（一九三五年十月）之東京政變。及內閣與議會之衝突。更有捕戮少年反動派領袖數人。及解散其團體。又拿殺血盟團之領袖。種種紛擾事情發生。予離日返國。未幾又有一九三六年之「二二六」轟動全世界之慘殺內閣要員高橋等數人之事爆發。爲各國有史以來之最慘酷重大者。是知日本政潮暗閉之劇烈。黨派分爭之嚴重。至其「天皇」有時亦捲入旋渦。受軍閥利用或挾制。蓋日本天皇。表面似有「朕卽國家」之尊榮。其實重要職權。被一班軍閥所把持也。況其軍閥又有少壯派與溫和派之分。黨派又有左傾右傾之別。在「二二六」事變時。竟有川島陸相、真崎大將等、通電全國師團。要放逐裕仁、而謀立與軍閥方便之秩父宮爲新皇者。且反動各派份子。均時常蠢蠢欲動。不過日

本政治妨範甚嚴。警察偵探週密。不易發動耳。卽發動、亦因勢力未充。以致被捕、或監禁、或殺戮、以消弭之也。

至此次日本軍閥對我大規模侵略。在華北之日將田代。先已表示反對。獨惜其未幾逝世。且日皇亦於開戰未幾、幸臨議會。發表要爲國際和平。應卽停止戰爭。與外國以中正協和之態度。從事交涉。以實現東亞和平之宣言。朝內亦有多人不贊同者。不過因是重要人物懼禍而不敢公然反對。但其他各界人物實行公開反對者。亦頗衆多。如去年十二月中旬。在全國各處拘獲「信仰共產主義實行革命」之嫌疑犯。共三百七十名。此等人盡力宣傳反對戰爭。其目的欲改革私產制度。而變更日本國體。據云、勞農黨、無產黨、及勞農聯合會之全國議會。均與此次革命運動有直接之關係。在東京拘獲者。其中有大學教授、文化界名人、社會領袖、及國會議員等。當時一般民眾。因真正愛國領袖被捕。莫不髮指。騷然欲動。未幾又有聯合派勞資代表。由大阪赴東京之反戰

流血慘劇發生。近又有三十餘位教授。及知識階級人物被捕。指爲反動及反戰運動者。其有經驗、有遠識之政治家。如西園寺、尾崎行雄等。雖表面上與軍閥虛爲委蛇。其實亦敢怒而不敢言。至資產階級、實業界、銀行界、工商界。除少數藉戰爭有利可圖及受政府矇蔽者外。亦莫不心存反對。不過在萬鈞壓力之下。無可如何耳。

甚至軍人被迫出征時。亦多有表露一種吞聲忍泣。如牛羊被驅入屠場之情形。而送行之軍人親屬。則愁容滿面。心如刀割。甚有拊膺撞首。椎胸頓足。拼死眠在路軌。以冀阻止火車開行。免其愛子或丈夫赴華身喪異域者。絕不見有當年日俄之役。祈戰死之預祝。及表現歡送之精神矣。至詐病呻吟床第。詐癩傷人入監。以避被徵出戰者。亦多有其人。雖或不能瞞過避免。然亦可見一般人厭戰之心理。最近報載日寇在神戶徵集壯丁六千餘人。準備出發之際。忽發生反戰流血慘劇。當堂被憲兵擊斃者、二十餘人。垂死者、約五十人。壯

丁被捕者七百餘人。壯丁家屬被捕者三百餘人。卒至全軍不能出發。是亦可知其國人反戰之劇烈。人心之怨恨。即開到我國在前方之將士。又每每有反戰宣傳。及逃避出仗者之發現。可知倭寇此次對我作戰。無論前方後方。人心均屬紛歧。日前國會對於內閣提出寇華經費與計劃。已惹起糾紛與疑竇。已有不信任之趨向。另一方面。亦有暗中圖謀推翻內閣。牽制軍閥活動。不過處於法西斯蒂軍閥暴力統制之下。以最嚴厲之手段壓抑。未易發洩耳。但壓力愈大。反抗力亦愈大。到底必有爆發之一日。本埠日文報亦載其國內左傾反動派。異常活動。躍躍欲試。政府在國內各處固多設防共機關。即在海外凡有日僑之處。亦增設防共機關。并將東京大阪等處有類于反動派之社團。勒令解散。以致人心惶惶。有醞釀革命之勢。且不特人民方面有騷動之處。抑軍政黨各方面。亦有明爭暗鬥。互相衝突之表現。最近日本近衛內閣首相、與軍閥勾結。謀藉寇華之時局。提出大統制案。效法意國之模梳里尼法西斯蒂政府。

獨裁一切政治及民事。政友會、與民政黨等。恐將爲此案所消滅。起而力爭。遂演成在議會中全武行之血劇。拳腳齊起。墨盒紛飛。議長小山頭破額裂。受傷甚重。內相末次利用內務省爲法西斯蒂黨之大本營。以主持此事之活動。故大受議員攻擊。近衛首相。亦同爲攻擊之目標。謂其爲煽動及操縱法西斯蒂黨之主動人。現仍爭鬧劇烈。空氣緊張。有事態日形擴大之勢。且「偽滿」、臺灣、高麗等屬地。義軍屢起。志士活躍。革命運動。日益增漲。倘時機一至。不獨日本內部立卽陷於分崩離析。勢敗如山倒之境域。卽在各屬地義軍。及寇華之日軍。亦必如風生水起。反戈叛變。以聲罪致討也。

(乙)財政支絀 凡事非財不行。戰爭更不能例外。日本向來財政。雖重征賦稅。因過額擴充軍備。亦絕不充裕。查平時軍費。幾佔整個國家預算之一半。此次大規模侵畧我國。其支出更爲浩大。聞外國軍事家估計。每日軍費約需美金五百萬元。以半年計之。已有消耗九萬萬金元。日本以工商立國。入息幾

全靠輸出各國之貨品。現各國人民憤日寇之橫暴。實行抵制日貨者。已達五萬萬人之多。其損失誠不可以數計。對華貿易。每年約四萬萬元。因戰爭而實行根絕仇貨之抵制。諒必已減去八成以上。孔祥熙院長報告。謂「中國爲日本之第二顧客。現則幾全失去。去年九月份內運入上海之日貨。只得三萬八千六百六十四元。比較七月份幾乎減少一千一百萬元。七月份入口爲一千一百零三萬二千九百六十三元」。現日本寇華。已動員百萬壯丁。卽已減去國內百萬壯丁之生產力。此等生產力之價值。以半年計、不下值五百萬元、亦因是而失去。至工業、商務、實業之損失。又不知凡幾。最近華南通訊社報告。據上海人士統計。日本侵華六個月以來。所受之損失。已超過六十萬萬元以上。幾倍於我國。我國總共所受損失者。不過四十萬萬元耳。（個人減收及建築物毀壞未計）日藏相賀屋。謂日本長期作戰、財政充足者。乃自欺欺人。言非由衷耳。

據美國商務部貿易局長戴士。最近之報告曰、「日本因侵華軍費激增。致引起

內部財政危機甚迫。故將減低日元價值。以謀應付。其前途若何。則視乎中日戰爭及其商務衰落時期長短而定。目下日本在遠東及美國之商務。已一落千丈。有不可收拾之勢」。又曰「日本近年蓄謀侵華。向外大購軍用材料。故有鉅大入超之現象。一九三六年間。日本對外貿易。入超已過美金二千一百二十五萬元。逆料一九三七及一九三八年之入超。數目更可驚人。現在日政府。方竭力開掘金鑛。繼續輸運黃金入美。以增強其在國外之信用」。觀戴氏所言。則知賀屋不肯自認外強中乾。而施此誇大炫人。以圖掩飾之伎倆耳。又查一九三七年一月一日起。至十二月三日止。日本運金來美。以抵償其購買物品之款項者。價值在二萬萬美金以上。且此後尙源源運來。其比例較前日益增多。聞歷年所儲存之黃金。已去大半矣。而日本每年產金額數。約值美金六千萬元。可知其入不敷出。已達三分之二以上。又何能持久耶。是以現在日本國內市場。已完全由政府統制。施行入口匯率准可制度。凡有匯款往外國者。須

向政府領許可證。此例初限匯三萬元。現已逐漸減至祇准一百元。近聞煤油與鐵棉。及其他軍用品原料。已縮減入口數額。夫在此戰爭時期。此等軍用品原料之入口。應有加增。而無減少。但竟致為減縮。無非亦因現金缺乏。而不能以信用賒購所致耳。查日本國庫。由一九二一至一九三十年。除一年盈餘外。每年平均之虧空額。赤字紀錄。達二萬萬元以上。由一九三一至一九三七年。每年平均虧空額。赤字紀錄。達五萬萬元以上。是知其入不敷出。與時而激增也。據日本大藏省。(即財政部)報告。在一九三七年底。日本國債已達一百十八萬萬零九千二百萬元。(至本年三月止一百四十萬萬元)其中國內公債一百零五萬萬餘元。國外借款十三萬萬餘元。較一九二六年底多十四萬萬零九千七百萬元。其中多數在開仗後而加多者。又聞增發紙幣五萬萬元。以資挹注。至於消耗歷年積存之軍用品。所值更不知多少也。倘長期作戰。其國債亦必與日俱增。雖日本國內外人民。均有捐助軍需之舉。然杯水車薪。無裨

於事。且聞在美國各處之土生日僑。不獨不肯捐助。且有極端反對。以致向勸捐人動武者。考其自開戰以來。軍閥要求內閣向國會提出增加寇華軍費。由一而再、再而三、三而四、而五。次數不爲不多。而所索軍費。亦共計二十一萬萬四千六百萬美金之鉅。最近又批准一九三八年對華戰費四十八萬萬五千萬元。倘自茲以往。蠻幹下去。戰區推廣。軍費則必較前加增。「日首相近衛謂準備四年對我作戰。藏相賀屋謂即使增籌軍費二百萬萬元。至三百萬萬元。亦不傷及國家之元氣。二者均是「大拋浪頭」之誇張語。亦是從新估量我國抗戰力量。而不得不表出重視我國之態度。非若從前謂準備數禮拜。而可消滅我國抗戰力量之輕視態度矣。故當時議員。對此亦大生疑慮而質問之。議論紛紜。暗潮陡起。無怪近衛謂爲「大難臨頭」也。

平心而論。日本之財政。雖極枯竭。而於戰爭掙扎中。無論如何搾取或借債。在一年內。亦必竭澤而漁。維持下去。但在一年外。則恐難爲繼。而進入悉索

敵賦。羅雀掘鼠均窮之境地。此意予遊日返國後、「對於遊日歸來之印象」演講詞中。（已登興華校刊）有謂「如日本與我開戰。一年後則彼國之財政與人心必有崩潰解體之虞。未及一年亦有搖動之象云云」。此預言、想必「幸」而言中也。蓋以現在而論。國內銀根短絀。通貨膨脹。人民生活。非常痛苦。以致因是人民身體轉弱。近聞徵兵亦多不及格。國外日幣匯價低跌。各種股份票。亦較平賤。此後繼續戰爭。仍有江河日下之勢。夫財政者、乃為戰爭有力之後盾。苟財政匱乏。必影響軍事有崩潰之虞。歐戰德國之失敗。財政支絀。亦一至要原因。蓋主婦雖巧。亦難為無米之炊也。

（丙）軍力消耗 日本此次侵華。以為絕對不用消耗軍力。而可屈服我國。迫訂城下之盟。以達其「征服」之目的。而遂侵畧土地之野心。不知遇我堅強抵抗。而致調動傾國之兵以從事。據西人軍事家統計。侵華日軍。在各戰場上。共計已近百萬之多。現役兵、及預備役兵、已調來華者。共四十六個師團。「每

師團。約一萬八千人。後備役兵亦已開始調動。實數未知多寡。總之、合共百萬之數。亦非言過其實。海軍兵艦。大小共三百餘艘。空軍飛機共八百架以上。空軍人員。不下二千之多。但查其所受損失者。據中西報章所載、各可靠報告。以七個月統計。陸軍死傷於戰場者。最少有二十六萬之眾。將官校尉。亦佔三千餘之多。坦克車被毀者。已有百餘架。兵艦被炸沉及炸傷者。大小共七八十艘。飛機被擊落及炸毀者。共五百餘架。空軍人員被擊斃及俘虜者。共六百餘人。每閱日文報紙。多見有以「沉默凱旋」標題之新聞。則知日軍戰死而回之眾多。夫戰勝而回爲之凱旋。是我國之成語。但日寇戰死而回。亦稱之爲凱旋。無怪其報紙所載。絕少見有打敗仗之新聞。至戰傷而回之兵士。亦未知其如何稱法。或有謂其必稱爲「有聲凱旋」。因傷兵一面運回。一面大聲叫痛叫苦。而「沉默」與「有聲」亦遙遙相對也。查日本現役常備兵。不過二十餘萬。其餘預備役、後備役之兵士。多是由工人、農民及商家徵募而來。他等對

于操練及戰術。雖少時亦曾學習。但極幼稚。故日本所損失之兵士。不獨補充困難。卽能補充。亦多屬「烏合」之眾。不過所恃者犀利之槍炮耳。然槍炮未得善用之者、亦易同歸于盡矣。至軍備之消耗。以半年計之。亦不可勝數。單以炮彈炸彈而論。亦有幾千萬噸之多。且所消耗多屬於技術不佳。及心神恍惚而致於枉費者。如麻鷹飛於高空。而亂轟高射砲者。於華兵冷槍戲弄兵艦。而密發大砲者。深夜見岸邊樹影風聲。以爲華軍來襲。而發炮抵禦者。而飛機投彈之消耗。更令人發噤。如見田間禾草束立者。樹木排植者。晒醬油缸蓋排列似軍帽者。均以爲華軍調動出發。而猛投炸彈。或見婚喪二事。假裝飛機。及聞地上爆竹聲喧者。亦亂投特投。糞池、魚塘、山嶺。亦多蒙其光顧。中山大學臭氣薰天之笑話。馮玉祥先生之炸魚五言詩。可謂相涉成趣。茲節錄馮詩數句。以見一斑。其詩曰、「轟炸連三聲。一彈落山上。二彈落水中。……死魚二百條。……海陸搬萬里。炸魚成大功。可憐日民血。軍閥亂揮用」。且每以值一

千數百元之三百磅、或五百磅、或一千磅炸彈。而炸得一間爛屋。殊屬得不償失。其實亦無所得。所得者、殘暴之名而已。查每擲一炸彈。平均計、亦需日金一百元之多。張發奎將軍謂、日寇每擲一炸彈。不啻送吾人一件禮物。因其投炸。往往落空也。據軍事家觀察謂、日軍投彈或發炮一百次。僅得一次命中而已。予嘗謂日本軍人乃如一個「敗家仔」。不知稼穡之艱難。亂將先人以血汗換來之財產。盡量揮霍。亂作胡爲。隨便銷耗。但揮金如土。將必有床頭金盡之一日。故日本斯次寇華。雖積數十年之準備。亦有傾囊倒篋之虞。卽有繼續補充。以彈丸小國。物力財力有限。理必易到窮期。聞歷年所儲之軍火。已消去其大半矣。現所用者。多屬昭和十一二年所製者。可知其消耗之速。枉費之大。有甚於「敗家仔」之浪用。比甲午中日戰爭之役。所用之軍火多過十倍有奇。考其在各戰場上所用之軍火。其數量之大。實不可以計算。卽以南京一役而論。戰爭期間不過數天。但所損失人力物力亦屬不少。據日本軍部發表報

告。謂「南京一役。日軍陣亡上將一員。校尉官佐四十三名。士兵九千七百三十三名。受傷將官二名。尉官佐七十五名。士兵一萬三千二百九十一名。飛機投彈空炸五十次。投擲炸彈一百六十噸。消耗大小砲彈六萬四千餘發。飛機動員二百架」。其實不祇此數。蓋倭人虛偽成性。避重就輕。以掩飾世人耳目也。況由他方面之事實以證明之。亦可知其軍力消耗之多量。蓋寺內與松井一而再、再而三、電東京請派援兵。而無兵可派。即派、其數亦無幾。且在華之寇兵屢屢嘩變。或發現反戰宣傳者。亦無非因死傷之眾多。以激動之也。松井之撤回。是亦未始非其中之一因耳。綜上以觀。可知我軍所採消耗之戰畧。已收極大之效果。確能使倭寇軍力日益消磨。難以爲繼。卒至一敗塗地也。

(丁)國際共惡 此次日寇逞兇侵華。橫暴殘殺。世界各國除一二日本與國外。皆不值其所爲。而深惡痛絕之。先則國聯五十二國宣佈其罪狀。繼則比京會議。十五國譴責其侵畧。未幾全球各國抵制日貨運動。風起雲湧。有登高一

呼。萬山響應之勢。如報載、國際和平運動協會執行委員會。在倫敦議決舉行全世界抵制日貨大運動一案。特由宣傳部印發標語傳單。分發世界各國廣爲宣傳。以促進此運動迅速成功。該協會爲各國擁護和平之民眾團體所組織。美國民主和平同盟會。亦參加其運動。其潛伏勢力甚大。號召力甚強。英國人民團體。又以擁護正義和平爲辭。發起大規模抵制日貨運動。邀請歐美各國人士一致參加。以謀制裁日本。美、法、比、俄、荷、葡、印、瑞士等國工商團體。已聞風響應。贊助進行。且各國工商界。對於抵制日貨之舉。早已自動分道揚鑣。如擁有一百零四處分會。三百五十萬會員之美國勞工聯合總會。月前在典化開代表大會。通過抵制日貨之議案。並已通告各分會會員及其親友。切實勸諭推行。藉以懲戒日本寇華之罪過。而減輕其殺人利器之來源。

去年十二月中旬。世界四大學者。杜威、羅素、愛恩斯坦、羅曼羅蘭等。宣佈倭寇殘殺之罪惡。勸世人抵制日貨。拒運軍火與日本。今印度議會。亦宣佈日本

爲侵畧國。實行號召全印度人民。響應世界四大學者之宣言。以實行抵制日貨。據最近東京報告。各工業幾已完全停頓。而現在所有工作。不過「取銷各處顧客之定貨單」而已。可知抵制日貨。以經濟制裁。已收實效之憑據。倫敦教會大主教。及二十區基督教會各牧師。對日機轟炸中國城市。殘殺平民之暴行。提出抗議。舉行大聚集。爲中國聲援。爲日本警告。美國全國基督教聯合會。致公函與美總統。表示擁護其在芝城演說、斥責侵畧國之主張。及表同情於我國。俄國上下人士。對日寇侵華之蠻幹。尤深憤激。著名之俄報。論「日本之侵畧。已置一切國際上之道義於度外。毫不顧惜他國之利益。以亡中國。爲其唯一之主旨。現正一意孤行。以完成其武力上、及經濟上征服遠東之政策。而爲東亞之主人。吾人應盡力設法以防止之」。故俄國惡日。除我國外比任何國爲甚。不祇是惡。而且已準備報前仇而雪新恨。故調重兵并儲蓄多量軍械於西伯利亞。在彼敷設雙軌鐵路。以便輸運軍火及兵士。更集中大隊飛機。及

潛水艇於海參威附近。以備隨時與日決裂。可卽向日本進攻。

至關於個人惡日。而發有力之論調者亦甚多。茲僅舉其二者、以代表其餘。美國上議院議員那利斯氏。對報界訪員談稱、「日本是世界上法律以外之國家。各國應以「匪徒」視之。以經濟絕交。制其死命。比諸用武力爲更佳。數年前日本無故吞併滿洲。現又無故侵畧中國。且野心勃勃。將來必有企圖征服世界之一日。此爲人所共知之事實。凡此種種。實使深覺法外行動之國家。一日存在。則世界其他各國。必須維持強有力之軍備。以抗拒該賊國之侵害」。英前首相。著名大政治家雷佐治。在中日戰爭發生後。未幾卽發表「日本如何對待中國」一文。登諸英美各報。引伊索寓言狼與小羊譬喻。以喻日本與中國。第一句謂「中日近狀。可稱現代化之狼與小羊之寓言」。又有謂「Japan takes another bit of Chinese cake 譯卽「日本又咬第一啖中國之餅」。其意是「日本又來侵畧中國別的領土」。更有在亞洲印度等處傳教三十年。曾到中日遊歷演講之歐美

著名佈道大家龔斯德博士。月前在香港致日本國民公開書。洋洋數千言。闡明日本侵華爲一種犯罪行爲。抑亦對世界一種罪惡。此種黷武殘暴之行動。實不能曲恕。并指出日本自戕其生之危機。切勸其從速反省。掉脫迷途。語重心長。宜其警惕。觀此、無論各國團體或個人。多肯主持公道。仗義執言。以驚醒其迷夢。至日本引起各國憎惡。又有其他理由者。卽損害別國人利益。槍殺別國人的生命。毀滅別國人財產。凌辱別國人婦女。轟炸別國人船隻。侵佔別國人權限。騷擾別國人家室。搶奪別國人品物。侮辱別國人國旗。炸毀別國人醫院與教堂。及其他慈善事業機關等等。書不勝書。總之日本此次寇華。不獨我國人深仇切齒。卽世界各國人亦莫不疾首痛心。諺云、「千夫所指不疾而死」。其斯之謂歟。且有謂日本是「發瘋國」。其意有二。卽發瘋狂。及生癡瘋。二者均爲人不敢近而厭惡者。但此爲人類之大害。必有起而除之者。倘若繼續顛狂。則英、美、法、俄等國。必有忍無可忍。以實力干涉之。而促其敗亡矣。是亦

知日本之前途。實不堪設想也。

或曰、上文所舉日本民族性之不善。及其國家內情外交之惡劣。均有致敗之充分理由。但現在以事實而觀。有似大不然者。蓋自日軍攻陷大塲後。節節勝利。再陷蘇州。又佔無錫。首都南京。又有岌岌可危之虞。（講此時南京未陷）。華北亦被其繼續進犯。佔據太原。迫近黃河。進攻濟南。且九國會議。除一紙宣言外。又無實力加以制裁。法國被敵人威脅。禁止運械赴華。英國被其恐嚇。又變態度。敵人收管上海我國機關。列強又被其屈服。似此情形。適與其失敗之事實相反。無怪僑胞中因此而灰心餒氣者有之。失望悲觀者有之。廢食失眠者有之。憤恨填膺者有之。歎歎太息者有之。甚至謂買定日本履。學定日本文。以過其亡國奴生活者亦有之。彼等以爲大勢已去。國亡在卽。無挽救之希望也。不知此乃一時感情衝動。其實未免心多過慮。蓋勝敗乃兵家常事。勝固不足喜。敗亦無足悲。我國既已決定國策。準備焦土長期抗戰。現在不過

抗戰進程中之第一段。抱定繼續犧牲。寧爲玉碎。不爲瓦全。不屈不撓之宗旨與精神。以求最後之勝利。不求孤注一擲。徒快人心之無謂犧牲。而令國家一蹶不振。蓋阿國之敗亡。亦急于求勝所致也。

且此次退兵。乃是保存實力。有秩序之撤退。以符長期抗戰之計劃。爲備將來之決勝。或又曰、日本之兵力雄厚。器械精良。軍備充足。飛機、大砲、戰艦、坦克車等等。應有盡有。且甚眾多。與我國兵力比較。有謂十與一之比。日人則謂百與一之比。然平心而論。亦大相懸殊。且以其殘暴從事。隨處轟炸我城市。屠殺我平民。更圖斷絕我軍火接濟、沮喪我民氣。騷擾我後方。堵塞我財政。種種強暴與陰謀。無非欲斷喪我國命脈。消滅我國抗戰力量。此外又有意德兩國。助紂爲虐。狼狽爲奸。意相模梳里尼謂日本侵畧中國。是合理之舉動。又譏諷九國會議曰「對於制裁日本。九國會議之小國。固不足道。就如英、美、法等國。無論分開或聯合。亦無能爲力。因日本對華可以單獨自由行動。

實無其他勢力可以阻止之。云云」。德國亦暗中阻撓英、法、俄等國助華抗日。外國軍事家謂我國如無別國助力。必歸失敗。而能得別國助力。亦非易易。

綜上情形而論。我國必無得勝之望。而日本決無失敗之理。然天下事之成敗。往往有出人之意表者。試查中外歷史。不少事實以證明之。如秦始皇兼併六國。坑儒焚書。鞏固勢力。以爲長治久安。但祇傳二世。便歸消滅。楚項羽強絕一時。稱雄稱霸。卒至反敗於弱者劉邦。垓下乞盟。烏江自喪。曹操自誇戰無不勝。攻無不取。順我者生。逆我者死。無敵於天下。但卒至身敗名裂。而有「固一世之奸雄。而今安在哉」之蓋棺論定。諸葛孔明足智多謀。妙計環生。但六出祁山。火燒蘆谷。均不能成功。致有「謀事在人成事在天」不可強也之嘆。苻秦以傾國之兵大寇東晉。而謝安以較少較弱之兵力抵抗。卒能令其全軍覆沒。非利士國之勇猛大將哥利亞。統率數十萬雄師。與以色列國牧童大衛交戰。而竟至失敗被殺。亞力山大雄據巴比倫。戰勝小亞細亞。直搗至印度。權

勢極盛。以爲奠基萬世。不意中道而殂。其霸業亦歸消滅。拿破崙怪傑。雄霸歐洲。威脅非亞。直深入俄境。進攻莫斯科。結果全軍覆沒。一敗塗地。旋被流於荒島。德國威廉二世。冀圖消滅法國。屢戰屢勝。進迫巴黎。其他協約國。亦大受其蹂躪。開戰三年。未嘗一敗。但其結果。喪師敗績。割地求和。德皇被迫退位。流於外國。其他例證尙多。未便詳舉。總之公理一時或被強權壓抑。但到底公理必戰勝強權。況在公理未表彰前。所受強權壓迫之時。未必盡有損而無益。如我國此次抵抗日本強權侵畧。蔣委員長在雙十節播音演講。有謂、「吾人在抗戰中。可以鍛鍊自身。改造民族。以締造國家之新生命」。是又可知吾人本身。容或有苟且偷安。怯懦怠惰。妒忌詭譎。驕奢淫逸。損人自私。爭權奪利。種種劣根性。然則在此驚心動魄。胆戰魂飛之抗戰中。不啻獲得嚴厲之鍛鍊。而成爲有堅心、毅力、壯志、熱情、忍耐、犧牲、奮鬥、而變爲良好份子之國民。而在民族中、亦容或有貪官污吏。國賊漢奸。劣紳土豪。軍閥黨蠹。或舞

弊營私。恃勢凌人。或尸位素餐。不恤民瘼。或異端左道。腐敗迷信。種種惡劣份子。亦可藉此全面劇烈抗戰中。以改造之、或淘汰之、以陶成純粹優良之民族。則國家之新生命。可由之而產生。古聖賢謂「多難興邦」。卽此意也。

前瀝戰大場未失陷時。我國屢挫敵軍。而獲勝仗。有些僑胞。未免驕形於色。以爲日本不堪一擊。我國一蹴而幾。變成強國。或頭等國。若此容易。一蹙成井。世間尙有難事耶。須知吾人得爲富翁。或爲有學問、有地位之人。亦不能僥倖驟然而至。必須經歷許多艱辛痛苦。費盡許多精神努力。及忍耐、犧牲、奮鬥、方可成功。何況我國之龐大。人民之眾多。地方之遼濶。大多數人民智識程度之低下。比德意志、土耳其、意大利等國。土地人口較少。人民智識程度較高不同。且向來積弱。一旦變爲強國。誠非易達目的。必須經過長期間之訓練與改造。充分之刻苦與琢磨。始克成焉。蓋頭等國。必須有良好份子之國民。及有優美質素之種族。方可組織而成也。

或問曰、我國何時可獲最後勝利。而得爲頭等國。此問、誠難置答。亦無人能答。總之、我國既定長期抗戰。犧牲到底之決心。此卽我國圖強之機會。此次戰爭。日本亦騎虎難下。不能遂其速戰速決之原定計畫。必實行其繼續侵略之蠻幹。所以非短期內可結束。蔣委員長在雙十節演講。又謂「首先我儕要知道。此次抗戰是死裏求生之一戰。必須經過非常危險與艱難。始能得到最後之勝利。全國同胞一定要有實在之覺悟。知道初步之努力。必須繼以更大之勇氣與犧牲。我儕要認定此次抗戰。斷不是一年半載短期間可以了結。要預想到今後之困苦艱難。只有一天一天加重。因此必須準備一切。以担当比今天更艱難困苦到幾十倍之境遇。我儕惟有立定犧牲到底之決心。始能達到民族生存之目的」。吾人讀此、便知此次戰爭。能得最後之勝利。必要咬緊牙根。忍受苦難。犧牲到底。始可達到目的。如古人云、「先難而後獲」。英諺亦謂「No pain no gain」且蔣委員長講此乃在大場未失陷、我軍節節勝利之時。而反

預料到今後所受之困苦艱難。比今天多幾十倍之境遇。是知初期失敗。早已計及之也。吾人又何必詫意失望耶。

或有以爲上文所述可獲最後勝利之種種理由。不過是根據他方面觀察上之理想。不是我方面事實上之根據。然以予管見所及。卽根據我方事實。亦有相當之把握。茲列述之如後。

第四章 此次戰爭中國終獲勝利之理由

一、根據軍力

論到我國軍力。實屬自慚形穢。但海空軍雖遠不及敵人。惟我陸軍。較敵人精而且多。實地作戰之經驗。亦較多於敵人。且敵人之空軍。祇可攻而不能守。照西班牙戰爭中之經驗。最有效者還是步兵之血。意卽飛機大砲。坦克車。雖有其效能。但到底不及步兵之血。換言之、戰爭之勝負。決不能單靠機械化的

部隊。最要者、是步兵肯奮勇犧牲所流之血。因步兵在戰爭中。佔最重要之地位。而我國之步兵。全國共有常備兵二百餘萬。內有近代式訓練之中央精兵五十萬。又有曾經嚴格軍事訓練四五年、全國中上學校一千二百餘萬之學生兵。此等學生兵。雖或暫不能出陣。但可爲後盾。並在各省訓練之壯丁民團兵。亦約有數百萬之多。現已着手訓練之新兵。更不知凡幾。諒可供給長期抗戰而有餘。且今日我國之兵。士氣銳盛。視死如歸。抱犧牲爲國殺身成仁之志願。故每臨前陣。均奮勇殺敵。浴血抗戰。爲將官者。亦皆親臨前敵。身先士卒。故摧毀強敵。壯烈犧牲。時有所聞。觀南口寶山及羅店之役。便知其概。至若軍備。雖亦遠不及敵人之多。但以近數年之積極準備。及現在由各國源源運到者。亦有相當數目。聞軍用之汽油。亦早已儲備足爲開戰三年之用。又有由中央軍械處所轄下之二十間軍械鑄造廠。加工趕製。陸續輸出。不過如巨型之大砲、飛機等。要靠外來耳。然亦已加緊訂購。想不久更有大幫以應需用。

也。(按、講後二月。祇由香港運入者。已足一年之用。由其他各處運入者亦極眾多)。最近蔣委員長謂、現在軍力比較初期抗戰、加增兩倍有奇。蓋自軍事改組及變更戰畧後。對於紀律嚴整、事權統一、作戰能力、均較前大有進步。尤其是空軍之增強。恢復領空權。及施威力於日本之屬地。况觀近日倭寇積極進犯徐州以打通聯絡東北倭軍之津浦線之劇烈爭奪戰。行將百日。不特毫無進展。反喪師敗績。便可知我軍力之雄厚。戰畧之奇妙。且我軍愈戰愈勇。而倭軍則反是。所以根據軍力一層。於最後勝利。亦有相當把握也。

二、根據財政

我國自前年國幣改制後。金融已趨穩定。不復如前一有戰事發生。卽有擠兌風潮。且中國、中央、交通、農民四銀行。基金雄厚。準備充足。爲國家財政後盾。最近又得各國信用。訂借鉅款。共達國幣九萬萬元以上。現又推銷公債五萬萬元。已募集四分之三有奇。(按現已集足)有以爲我國財政。不能支持長

期抗戰。不知我國當局。早已籌備以應付此非常時期。故自開戰以來。半年有多。經已充分證明不但有力準備長期抗戰。而且財政前途發展希望與民族自立。同時並進。雖抗戰以後軍事費用激增。及國稅收入減少。但財政部修正轉口稅則。並徵收土貨轉口稅與增高煙酒稅率。又加征印花稅等。以資彌補。至關稅雖被敵人非法封鎖海口。以致減收。但據海關當局佈告。二十六年份收入總額。仍有三萬四千二百九十萬元。比二十五年份增加一千八百二十七萬元。除償付外債之外。政府尚有盈餘一萬二千八百萬元。且中國在海外之匯兌平準金。顧維鈞博士宣稱有八萬萬元。故外匯自戰後以迄今。從不低跌。仍安定于英匯一先令二辨士半之上。美匯二毛九仙半之譜。此可知我國財政不惟在戰後有順序之發展。而於外匯亦有充分維持之力量。故孔祥熙部長、宋子文先生等、均謂我國財政。可支持四年或五年之長期抗戰也。況我國以農立國。近年生產。亦較豐盛。而在此抗戰中。更勸令農民加開冬耕。及禁種罌

粟。而改種梁稻。以增生產。而裕糧食。殊可以謂財力物力。取之無禁。用之不竭。有此財用足。於長期抗戰。實有絕大之補助。

三、根據人心

我國人心，在民國紀元前。固如一盤散沙。即在紀元後二十餘年來。無論軍政黨各方面。人心紛歧。訖鬪不已。內戰頻仍。黨爭迭出。即海內外同胞。亦人心渙散。意見不一。自蔣委員長蒙難西安。以迄抗戰事起。人心驟形團結。有一日千里之勢。軍政黨方面。固聯合一致。即全國人心。亦歸統一。素與政府作對之共產黨。亦放棄其主張。而與政府合作。服從指揮。對於此次抗戰。更無論前方後方。國內國外。均同仇敵愾。努力合作。舉國一致團結之精神。爲有史以來所僅見。倘我整個民族。集中精神力量。堅持到底。百折不撓。何愁強敵不摧。最後勝利不我獲耶。蔣委員長在南京失陷後、告全國國民書有謂、
「且中國持久抗戰。其最後決勝之中心。不但不在南京。抑且不在各大都市。

而實寄於全國之鄉村與廣大強固之民心」。是知人心團結。不特可爲拒敵之長城。亦可爲決勝最重之要素。蓋「眾志成城」。爲我國之格言。而日本轉易爲「眾心成城」。二者均此意也。且兵法有云、「攻心爲上。攻城爲下」。是知日寇雖能攻陷我城池。但不能攻陷我人心。亦屬徒然之下策也。所以根據我等團結之人心。亦必操最後之勝券。

四、根據土地

我國擁有三千九百萬方里土地。爲世界國家數一數二最大之版圖。與阿國祇有數十萬方里之版圖不同。故意國滅阿。一攻陷其京城後、卽覺無險可守。大勢已去。而我國卽不幸被敵攻下南京。（講此時南京未陷）而於抗戰大計。絕無影響。卽於地勢。亦無關重要。況敵人愈佔地多。愈感覺困難。愈深入內地。愈感覺危險。此皆中外軍事家有經歷之觀察。蓋佔地多、則每處均須大幫軍隊駐守。否則必被游擊隊、便衣隊、或壯丁團所擊滅。倘處處要大軍隊駐守。

試問日本軍隊共有幾何。且我實行焦土抗戰政策。令其不能獲得所佔地之供給。亦難以施行治理。且戰區愈廣濶。愈令其疲于奔命。及首尾不能兼顧。至敵人愈深入內地。則途途崎嶇與險阻。運輸更感困難。且容易受我包圍。與截斷其接濟。更有全軍覆沒。或一網成擒之危險。本埠江尼古西報主撰盧偉先生論 China plan win the war by lose「中國戰畧以敗取勝」一題。甚有見地。是亦有根據而云然也。至華北五省及沿海各地。必遭蹂躪。敵軍難免深入。固早在吾人意料之中。但亦無碍抗戰大計。予嘗謂即使倭人進攻至漢口。或至四川。倘我人不變志、不屈服、不作漢奸以受倭人利用。而存再接再厲。顛撲不破之精神。人人抗戰。處處抗戰。寧死不辱。以奮鬥到底。則倭寇亦無奈我何。而戰事更有制勝之機。試觀土耳其之凱末耳、祇得最後安戈拉一州之地盤。亦能養精蓄銳。戰勝希臘。收復失地。而復興國家。何況我尚有如許土地耶。故日本現所佔據我國之土地。乃屬暫時性質。一到我國最後勝利。則必完全收復也。

五、根據人口

我國自遜清乾隆時代。舉行正式人口統計。全國共有四萬萬人。迄今百有餘年。未有全國正式統計。雖間有些省份統計。亦未有正確數目宣佈。年前有人估計。統合國內外。總有五萬萬人以上。佔全球人口四份之一有奇。居世界第一。位最大民族。倘我人能聯合起來。任誰不敢欺侮。蔣委員長有謂「我等相信此偉大之民族。祇要我等有犧牲奮鬥之精神。就決不致被人消滅」。換言之。卽是如我等不肯犧牲奮鬥。雖有此偉大民族。或致被人消滅者也。故我人對於茲次抗戰。須推動全體民衆。無論在國內國外。以至天涯海角。人人須要犧牲奮鬥。集合四萬萬五千萬（以適中計）人力財力。以至整個民族生命。以應付此最後關頭。則倭寇實不足平。蓋楚雖三戶、肯犧牲奮鬥。尙足以亡秦也。反之、卽如印度有三萬七千萬人口。亦要亡國。被英人管轄。是亦可爲我人殷鑒。古時戰爭。戰具簡陋。每以人數多寡。爲戰爭勝負之關鍵。苻堅自誇

將廣。投鞭可以斷流。韓信將兵。多多益善。播爲美談。且古時無論中外戰爭。每每因「人馬眾多」而獲勝仗者。今時戰爭。似不以人馬衆多爲取勝之工具。因近代科學進步。殺人利器猛烈。致戰爭之勝負。幾決于軍械之犀利與否以爲衡。不知透視深一層。則人口問題。亦極重要。蓋軍械一物。是被動的。可蒐羅而致之。人是自動的。爲軍械之主人。有人無械。尙可作戰。有械無人。則不能作戰。聞耳。人多械少。可以補救。械多人少。極難補救。補充舊軍。訓練新兵。均是在在需人。而人不能由別國徵募而來。卽能徵募少數。亦不如本國人之關係密切。且亦要以重金得來。白崇禧將軍謂「自開戰以來。我方軍士死傷僅五十萬人而已。非到犧牲五千萬人。實無灰心之理」。是亦因我國人口衆多之故而云然也。粵俗語謂「蟻多摟死象」意卽蟻雖微。但多而合力。亦可制巨象之死命。故現有若干國家。獎勵生育。蕃殖人口。以備戰爭之用。而期取勝較有把握。卽就現在我國而論。倘無此偌大民族。恐亦難以支持。蓋

此次抗戰。所損失之軍士。爲數甚衆。補充原有部隊。亦要數十萬之多。訓練新兵。更要無可限量之數目。倘非有如許人口供給。實不能爲力。且所需之戰費。爲數亦鉅。此款來源。除其他收入外。祇發行救國公債。亦五萬萬元。如此鉅款。苟無如此多量之民衆。焉能咄嗟立就。即使繼續發行公債。或舉行其他救國募捐運動。亦必馬到成功。因有此偉大民族。人人動一動手。便綽有裕如。所以根據人口。亦有取勝之道也。

六、根據國情

我國近年國情如何。想留心國事者已知之。政府方面。在蔣委員長領導下。以堅忍卓絕、埋頭苦幹之精神。勤求上進。努力建設。對於政治、軍事、教育、實業、經濟、交通、國防、外交、衛生、及新生活運動等等。均有非常進步。而獲驚人之成績。予自返國後將屆十載。曾到京滬平津及各省遊歷數次。每次均覺各種物質與精神建設。較前大有進步。非如有等黑暗腐敗政府。毀法亂紀。賣

官鬻爵。賄賂公行。橫征暴斂。剝削民脂者可比。人民方面。注重教育。破除陋習。恪守紀律。講求衛生。注重團結。亦非如印度社會階級之互相歧視。更不若非洲民族之野蠻迷信。模梳里尼謂意國攻滅阿國。乃文化戰勝野蠻。是天然淘汰、優勝劣敗之公例。我國有四千六百餘年歷史與文化。且現正努力圖強。奮鬥前進。而非自暴自棄。甘願爲亡國奴者。衡之天律。有此自立自強不息。去惡從善之國家。亦必不致被人消滅於無何有之鄉。蓋古今中外亡國者。均由政治黑暗。人民窳敗所召而致。否則未之有也。雖然，我國政府及人民兩方面。均尚有未臻完善者。即行政人員，仍有營私不法。爭權恃勢。侵吞公款。藉端苛剝。或貪不義之錢財。或尋不正當之娛樂者。一般民眾，亦仍有好逸惡勞。腐敗迷信。或作奸宄而犯科。或從下流而忘返者。但在此次抗戰期中，對於政府腐敗官員。經已陸續剔除。以昭炯戒。如近日報載、蔣委員長以數月抗戰之經驗。深知以前國家出鉅額薪俸、供養此一輩軍政黨官吏。一旦國難

臨頭。遂發現許多酒囊飯袋。一無所用之人。且以時機之迫切。乃下絕大之決心。將此一輩無用之人。毅然淘汰之。以免阻碍抗戰之前途。并將軍閥、漢奸。及貪生畏死臨陣退縮之將士。盡法懲治。更下令凡有官守者、不得作狎邪遊。呼盧喝雉。跳舞酗酒。及其他不道德之娛樂。如有違犯者、即以軍法從事。將之槍決。且李宗仁將軍謂、「用抗戰力量。自然地掃蕩腐敗與貪污。因客觀環境的壓迫。不得不澈底革新」。於人民方面。在抗戰中、亦無形中得一種嚴厲之教訓。已將平日之耽安、逸樂、驕傲。紛爭、嫉妬、愚昧、怯懦、苟且、浪漫、怠惰、假偽、畏懼、卸責、趨易避難、自私自利種種弊病。日益減少。且有加增團結、盡份、忍耐、犧牲、勇敢、奮鬥、謙虛、熱誠、堅心、毅力、種種之美德。矧又繼續禁烟禁賭、及推行新生活運動。以改革陋習。破除迷信。及提倡禮義廉恥。以栽培人民應有之道德。而期日趨於至善。想有此去僞存誠。立志向上之國情。衡之人事。亦必不致滅亡也。

七、根據歷史

古人云、以銅爲鑑。可整衣冠。以古爲鑑。可知興替。曠觀古今中外歷史。所有國家敗亡者。必有其致敗之理由與預兆。卽儒書所謂「國家將興。必有禎祥。國家將亡。必有妖孽」。所謂妖孽者。非是妖怪冤孽之迷信。而是黑暗腐敗之預兆。我國有將及五千年之歷史。國脈悠久。文化深厚。而民族亦有如是之純粹。及長遠之淵源。在理不至於亡國。然以歷史上、文化上、民族上最古之國家。如猶太、埃及、羅馬、希臘、巴比倫、印度等。皆已先後亡國。歸然獨存者。卽惟我中國而已。雖彼等國家覆亡。各有不同之理由與預兆。但可知一個國家。如有妖孽。則不能以文化古老。歷史長久。民族純粹爲保障。不過歷史文化民族可以爲後人借鑑或教訓。並引起全國同胞均由一脈而來、應親愛團結之觀感。知如何可避免亡國滅種。及如何可保衛國家與民族。或警戒後人賣國求榮而作漢奸。或勉勵後人精忠報國。而作富貴不能淫。貧賤不能移。威

武不能屈。轟轟烈烈之大丈夫。吾人每一提及岳飛、韓世忠、李綱、陸秀夫、李膺、文天祥、張世傑、史可法、鄭成功等忠耿愛國之英雄。便五體投地。肅然起敬。一提及秦檜、万俟卨、張邦昌、石敬瑭、賈次道、范文虎、張弘範、洪承疇、吳三桂等奸貪賣國漢賊。便咬牙切齒。痛恨欲絕。無怪爲忠臣（活看）者。則可流芳百世。爲漢奸者。則必遺臭萬年。此兩等人物。爲吾人留最深印象者。厥爲秦檜與岳飛。他等死後迄今將及千有餘年。但其事情躍現於吾人腦海有如日昨。而其紀念事跡。仍留於杭州之岳王廟。觀岳武穆之遺像。雖在萬世之下。猶覺凜凜有生氣。而秦檜之鐵像。則跪於岳王之墳前。凡到參觀者。莫不唾罵其爲惡毒之漢奸。而以棒擊其首爲快。後人特製「油炸檜」食品。以表示炸而食之藉洩其心中之憤也。岳廟牌樓高懸「碧血丹心」及照壁上有「盡忠報國」等字。令人觀之。不禁忠心愛國之念。油然而生。故文獻上所紀之忠奸故事。實有令後人觀感而學效之。或鑑戒之之功效。吾國有此足可以爲

訓之深長歷史。於吾人除奸佞、崇忠烈、有極大之幫助。或曰、此次自抗戰以還。報章所登載。幾無日不有關於漢奸之消息。可知尙多有不受歷史所感化者。不知俗語說得好。「樹大有枯枝。族大有乞兒」。我國版圖之大。人民之多。更因環境壓迫之關係。實不能無製造多少。但現查所有者。不過是小漢奸。祇可作間諜。或下乘工作。卽爲日人傀儡而組織之治安維持會。及所謂政府者。稍負名節之人絕無參加。卽次等人物亦無有肯受其利用或與合作者。而現所作傀儡者。固不能號召國人。亦不能鎮壓治下。可知頭等漢奸固未有。卽二等漢奸。亦不多覩。卽有、亦被熱心愛國之士士所擊殺。如報載齊燮元、王克敏、湯爾和、陸伯鴻、周鳳岐等等。先後被狙擊。雖有死與未死之別。但可見漢奸實難容於今日。試觀倭寇所侵佔之地。而能得頭漢奸以組織有號召力之傀儡政府者。已若海市蜃樓。此亦未始不由於歷史教訓之影响所致。至後方民眾之合作輸將。固因日寇之兇殘橫暴所激動。抑亦得於歷史之訓言、如「天下興

亡。匹夫有責。」「殺身成仁。捨生取義。」「捐軀赴國難。視死忽如歸。」「毀家紓難。」「輸財助邊。」「能救其國者、實有無上之光榮。」「男兒當要死於邊野。以馬革裹屍還。」「忍令上國衣冠淪於異族。相率中原豪傑。還我河山。」「及岳飛之滿江紅。文天祥之正氣歌等等所激發而致。且我國有此深入人心之悠久歷史。即使偶有差失。亦必不致滅亡。試考我國自有史以來。亦曾被遼人屈服我國。但曾幾何時。則與我同化。而終歸消滅。金人、蒙古人、滿洲人、亦均嘗屈服我國。但曾幾何時。又與我同化。而終歸消滅。日人此次侵我。固決不能如遼金蒙古滿洲等、屈服我國。即退一萬步言。而被其屈服。則不久亦必與我同化。而終歸於消滅。蓋日本人口。本部實不過七千萬人。有時見其報紙上報告。謂有九千七百餘萬者。想是包括高麗台灣等而言。特虛張聲勢。以爲地小人多。藉口實行其侵畧之計劃耳。以我四萬萬五千萬人民。與之相交處。實不難令其與我同化也。不過時代與環境不同。日本之專制手段與遼金蒙滿亦有

差別、較難同化耳。惟遼、金、蒙、滿、能亡我者。乃因當時我國之腐敗黑暗。而今日我國日益光明。努力邁進。而非亡國之預兆。且管子謂、「禮義廉恥。國之四維。四維不張。國乃滅亡」。而我國今日正竭力提倡禮義廉恥。注意推行新生活運動。以復張四維也。且此次戰爭。我人已立定終必勝利之信心。而努力走向必勝之途徑。斷無被其屈服之理。且根據既往之歷史。亦大有助我於實現。蓋獲「前事不忘。後事之師」。及「前車既覆。後車當戒」。之有力教訓也。

八、根據國際之同情

戰爭之勝負。本屬自身力量問題。無關於國際。蓋第三者。每每恐捲入旋渦。而謹守中立。持隔河觀火之態度。但查古今中外歷史。亦多有因得別國援助。而戰勝敵國者。如楚國抗吳。得秦國之助。以抒國難。美國得法國之助。而抗英成功。此次我國抗日。本無充分之準備。不過日寇恃強明「蝦」。(粵語欺也)硬佔我土地。殺戮我人民。不得不起而自衛。如盜賊入屋。搶物殺人。毀家據

地。愈弄愈兇。家主起而抵抗者。故此實不得稱爲戰爭。蓋真正之戰爭。必是兩方勢均力敵。或各有準備。願意交戰。非如盜賊欺凌家主。或大人攻擊小孩者也。故是次日寇以強凌弱。本應引起有力者代抱不平。而鋤暴扶傾。獨惜列強各國。各因自己有特殊關係。致袖手旁觀。而任今日寇如癩犬之亂噬。如強盜之披猖。而不暇顧到將來禍及己身耳。

原夫國家之立。必要盡其在我。注意自力更生。依賴他人。實非得計。如蔣委員長謂「吾人對於此種偉大使命。既以毅然承當。則不問國際形勢前途如何。必當盡其在我。初不必遽形失望。尤不可稍存依賴。但使世界正義不終於亡。則吾人目的。必有達到之一日」。又謂「吾人必須認識清楚。救國圖存。惟賴自己力量。不過吾人亦不拒絕外來援助。如不損及國家之立場。吾人將準備接受此種援助」。故我國近年來。對於國防準備。自己經已加緊工作。所有各種圖強建設。均大進步。已有目所共見。是知我國不是一味迷信國聯。亦不是徒

然依靠九國會議。不過藉其作播音臺。以將中日之是非曲直。大白於天下。而冀各國表同情於我耳。但能感動其見義勇爲。伸手援助。如不損及我國立場者。吾人亦樂予接受。惟觀國聯及九國會議。似雖有心援助。但畏首畏尾。恐觸怒於日本。於己有碍。以致見義不爲耳。蓋日本如一「爛仔頭」。橫行鄉曲。爲紳士及稍有資產者。莫敢稍挫其鋒。恐披簑救火。惹禍上身也。故英美等國。有如紳士、及有資產階級者。不願以「身嬌肉貴」之軀。而與「野蠻骨頭」打鬧。有若不欲以磁器碗與「爛砵頭」相撞者一般。但至認真損害其本身權益時。想亦必出於不得已而與之決裂也。

惟觀察國聯與九國會議。於表面上雖謂徒然通過以具文制裁日本。但骨子裏亦有許多實力援助於我國。不特於道德上、正義上、有鮮明之表示。卽實力上亦暗中贊助不少。如影響列強以財政、以軍備、而肯信用積極援助我國。及設法運輸飛機大砲及其他軍用品赴華。以應急需。雖受日寇嚴重之警告。而仍

陸續輸出運來。此想是我國首席代表顧維鈞氏。在該會開議時及會後。折衝壇坫之功。其他各國以抵制日貨。於經濟上援助我國者亦多。如各國均有會員所屬之國際和平大運動協會。又全印度議會。及美國勞工聯合總會等等。除表決實行抵制日貨外。同時表同情於我國。及設法援助我國之抗戰。茲將英、美、法、俄、等國助我之事情。畧述如下。(甲)英國、在中日已啓戰端之際。以大量信用借款。貸與我國。又在香港九龍源源運輸飛機大砲。及種種軍火接濟我國。更肯以自用最新式飛機。售與我國。卽我國得在歐洲各國信用借款。亦多屬英國政府援助之力。且廣九、粵漢、兩鐵路。在倭機頻頻炸毀之下。而能得迅速修復通車者。亦得英國以大幫枕木、軌鐵、或技士之供給。(乙)美國、雖美政府保守其傳統的中立政策。觀歐戰時、其恩人法國。被德國戰敗之慘酷。而有岌岌滅國之勢。美國亦不肯放棄中立。援之以手。直至開戰三年後。始肯加入戰團。我國與之無大關係。似難怪其遲疑觀望。但美總統盧士

偉曾在芝城演說。申斥黷武國家。主張各國聯合制裁野心侵略者。美外長賀路亦曾發表宣言。明斥日本違約侵華之殘暴舉動。此等言論。雖屬空言。但影響其他各國同情及援助於我者不少。他如美國朝野上下人士表同情於我國。及捐資救濟我國戰區難民者亦甚眾多。如各省各埠團體。發起抵制日貨。援助我國者不知凡幾。本埠江尼古報載、胡適博士謂「此次初到美國。曾謂美國人民有百分之九十五。同情中國抗日。但旅行一萬英里、到各處演講後。則相信美人有百分之九十九。同情於中國」。即對於軍械一層。亦有多量之給售。而美人在我國投充航空志願員。及其他任務者亦不乏人。(丙)法國、雖因其國家不甚充裕。幾自顧不暇。不能多大助我。但精神上與輿論上。均有贊助我之表示。且助我由法屬越南鐵路輸運軍火入我國者。不勝之數。聞在國聯及九國議會之法國代表。亦從中斡旋。甚表同情於我。在巴黎有五十餘團體。聯合發起制裁暴日。及援助我國抗戰及救濟等工作。(丁)俄國、俄與我有

如唇齒之相依。唇亡則齒寒。且日本標明反共之旗幟。倘我國一有失陷。日本即以我國無盡藏之富源與人力。而進攻蘇俄。故俄國助我獨多。因助我即所以助己也。據報載俄國助我之各種軍用品。尤其是飛機坦克車。均有多量之數目。而航空人材。陸軍教練。亦有數百之多。且有此後源源供給之應允。但能澈底及充分助我與否。則不得而知也。惟多有謂俄國助我。我國必將變爲共產。不知此乃未明底蘊之過慮。無殊杞人之憂天。蓋蔣委員長迭次聲明。無論何國助我。不過是友誼上、或義務上、或交易上之給與。不能動搖我國三民主義之政體。必須尊重中國之主權與獨立。況朱德、毛澤東、彭德懷等加入抗日救國工作。完全是自願放棄社會主義之組織。純係抱全國一致團結之志願而參加。此乃出於至誠。并無其他作用。且已宣告脫離蘇維埃政府。并竭誠擁護蔣委員長。及服從其指揮。其黨秘書王明。亦謂「此次參加抗日之目的。在救中國。而非在中國實施社會主義之制度」。前者蘇俄以實力助我北伐。亦

無變更我國政體。且賓主之地位釐然對立。此次無論如何訂約。吾人深信蔣委員長。亦必有良法以善其後也。

聞嘗論之。蘇俄共產主義。亦未可厚非。一概抹殺。聞近十年來。其政策頗加改善。不惟杜絕殺人放火之恐怖手段。且有適合人民生活之計畫設施。吾人亦不防以之借鏡。採其優點。而棄其劣點。孔子云、「三人行。必有我師焉。擇其善者而從之。其不善者而改之」。基督亦有「擇善而從」之教訓。予前主香港大光報編輯時。曾發表「基督教與共產主義」一文。指出各種共產主義之瑜瑕。并闡明聖經使徒行傳所載之共產主義之教訓。蓋聖經共產主義。乃真正的、澈底的、在地若天的共產主義。該經云、「信者會同。所有悉爲公用。且有自願變產以分眾。視各人所缺乏而予之。一心一德。不見有謂我之資財屬我。故其中無有窮乏者。日日一心在聖殿。又家家擘餅祈禱。歡心誠意而食。讚美神。並見悅於民眾」。且基督教之共產主義。其加入共產者乃出於自願。而非

出於勉強。予遊猶太耶路撒冷時。所居住之 American Colony「美國殖民處」。內容組織。有類於聖經之共產主義。其互助、合作、相愛、盡份及服務之精神。令人欽佩。是知真正之共產主義。乃適合於人生。故俄國助我。如能以改善之真正的共產主義貢獻。或亦有可採擇之道。最近第八路總指揮朱德。謂「我人雖篤信共產主義。然對於宗教則不反對。蓋基督教義、與共產主義。有相同之點。皆主張因正義而爲人羣犧牲」。是知真正的共產。與基督之道頗吻合也。綜上以觀。可知各國精神上之同情。物質上之援助。幾盡集於我。雖意國不表同情。是亦因其併吞阿國。而引日本爲同調。以掩飾其侵略之罪過耳。德國雖有暗中阻撓列強助我之線索。及歇罈另有作用之贊成日本在華之行動。其實亦有贊助於我國者。觀其輸售較別國更多量之重要軍火與我。及德顧問忠心服務於我國。又其國人對我之態度。及輿論對我之同情。便可知耳。日前世界和平反侵略運動大會。以援助中國、保障世界和平起見。召集於倫敦。到者、

有英、法、美、俄、中、比、荷、印、墨、瑞士、瑞典、加拿大等二十餘國。出席代表共九百餘人。開會結果。大眾都認爲幫助中國抵抗。便是保障和平。制裁日本侵略。便是防止戰爭。此是近來國際不可多得之一致同情於一方面者也。倫敦自由黨彙報。謂「當兩國發生戰爭時。全世界之中立人士。完全同情一方面如此次同情於中國者。在世界歷史上未有此等先例」。該報所言。亦有所見而云然也。

竊各國之肯同情於我、而施以援助者。固因日本違犯國際道德。毀滅人類正義。及其橫暴成性。損害各國權益。抑亦因我國政治已上軌道。有組織、有秩序、有前進之國家。且因蔣委員長夫婦爲誠信之基督徒。有堅心、有毅力、有操守、有作爲、有人格、有信仰、及有基督的犧牲精神。而令彼生一種信任、同情、互助之心所致。被日機轟炸受重傷之英大使許閣森。謂「蔣介石乃一實行者。而非夢想者。吾人應贊助之」。美前任國務卿史丁信謂「我美國人民對於

日本在華之推殘野蠻行動。既已令吾人憤慨。而吾人疾惡如仇之心理。不禁使我同情於中國矣。且歐美各國上下人士。多屬基督教徒。每有因我國領袖是基督徒而表同情者。或曰歐美各國既多屬基督教國。何以不肯伸手完全援助。而表出基督愛人如己之精神。不知教與國有別。國是集諸色人等組合而成。不能以教而廢國家之立場。不過有基督教人主持之國家。凡事必以道理爲依歸。而令人較爲信任。亦肯設法盡可能範圍以幫助他人耳。

數月來日本陸續遣派多數所謂「大立物」有名望之人。如松岡洋右、中村嘉壽及中野正剛等等來美。如高石、大倉、及笠井重治等等往歐。宣傳其侵華「合法」之理由。聞有多西人說及。謂他等信蔣介石將軍在報紙發表所講之言。過於日本派來宣傳之人親口所講之言。因蔣介石是一實行的基督徒也。且有謂日本所印發侵華合理之詭辨種種宣傳品。吾人每收到後卽擲諸「字紙簍」耳。因事實上之表現。勝于言論上之雄辨也。予有時到西人教會演講畢、有公開

問答。關於蔣委員長是否係忠實基督徒。及其宗教生活如何。亦多有問及。又有謂「中國由基督教徒蔣介石領導下。信必不腐敗黑暗。而致被人滅亡。吾儕亦樂意爲中國之助」。古人云、「得道者多助。失道者寡助」。斯言實有深意存乎其間。故根據國際之同情。最後勝利。亦有多量之把握。

九、根據蔣委員長之經驗

觀蔣委員長既往之經驗。乃辦事穩健。智高識卓。凡作一事。必先謀定而後動。動則必有驚人之成績。如創辦黃埔陸軍學校。訓練軍人。由其製造成材見用於世者。不可勝數。厥後進攻惠州城。以平陳洪等逆。他人數年不能攻下。而蔣委員長數日而攻下之。不及一月而完全肅清之。全粵於是而底定。治安亦日臻良好。至十五年七月誓師北伐。師行到處。勢如破竹。不數月間克復武漢重鎮。而贛閩而江浙。而至翌年三月在南京竟有青天白日旂飄揚于城上。其時紐約英文時報。在篇首大書特書「一強壯者掌握一半之中國」。旋因事辭

Generalissimo Chiang Kai Shek



蔣 委 員 長 玉 照

堅苦卓絕

蔣中正



職。北伐進行。因而停頓。未幾復職。北伐事功。隨之而完成。更以勇敢堅決之精神。以促進全國統一及安內攘外之工作。并努力推動種種精神上與物質上之建設。去年兩廣事變之妥善處置。西安蒙難之犧牲寬恕精神。尤爲令人心折。考其一生行事。都以堅苦卓絕之精神。任勞任怨。冒大難、歷萬艱、受人怒罵而不悔。遭人戟手而不辭。苦心孤詣。力幹到底。務期成功而後已。且蔣委員長待人處已。均有嚴正之規律。觀其「惟念余自興學統師以來。常以二語訓部屬。此二語、卽一、余如有絲毫自私自利、而不爲國家與民衆者。則無論何人。皆可視我爲國家之罪人。卽人人可得而殺我。二、如余之言行稍有不誠不實。虛僞成妄。而不爲革命與主義着想。則任何部下。皆可視我爲敵人。則無論何時。可以殺我。」之言。可知其律已之嚴矣。因其辦事之多。閱人之眾。而能誇說此一二語。而無反響者。則更可知其道德高尚矣。且蔣委員長不特律已以嚴。持躬以正。且天資聰明。光明磊落。且以正己之心而正人。不稍寬假。

亦不失仁慈。年前兩廣異動時。馮閻兩副委員長致電陳濟棠等。有云、「委座嚴正光明。寧靜淡泊」。前日相犬養毅批評中國人物。有謂「蔣介石甚有智慧。辦事沉毅」。鄒魯博士前由京返粵發表談話。亦謂「蔣先生是絕頂聰明之人。內政外交均有進展」。是知蔣委員長德智兼備而有勇敢之天生偉人也。更觀其最近抗戰之週密佈置。親赴前線。指揮若定。外國軍事家亦佩服其智勇兼備及有先見之明。在亞洲辦理教務多年之西牧師某博士有曰「蔣介石用兵之神速。戰畧之奇妙。不惟歐美軍事家十分欽佩之。即日本軍事家、亦稱讚蔣氏爲世界當代唯一之戰畧家」。是更知蔣委員長是德智兼備而有勇敢者爲我中華民族之中心人物。想我民族與國家復興之期不遠矣。蓋凡一民族、或一國家之復興。必有其中心人物以爲之推動。如以色列之摩西。猶太之所羅門。英國之維多利亞。德國之卑斯麥。美國之華盛頓。俄國之列寧。土耳其之凱末耳。印度之甘地等。均是一民族或一國家之中心人物。可以提挈一切。集中全

民族或全國之人民精神力量。以資奮鬥。而謀復興。現在德國之歇憐。意國之模梳里尼。亦是該兩國之中心人物。不過其宗旨與手段不同耳。故我等欲挽救國家。復興民族。亦必集中全國人民精神力量。在我國之中心人物蔣委員長領導之下。必克奏膚功也。故此次蘆溝橋事起。蔣委員長即發表宣言。謂吾人必要保存中國領土與主權之完整。凡放棄尺寸土地者。即中華民族千古之罪人。因我國是弱國。再無有妥協之機會。中途妥協條件。便是亡國。並主張拚民族的生命。抗戰到底。以求最後之勝利。蔣委員長有此宣言。自必信其有相當把握。蓋前此寧受人誤會攻擊。亦不肯主張與日本遽爾開戰。因知我國是弱國。未有充份準備。日本是強國。經有四五十年之準備。有強大之海空軍。近代機器化之陸軍。殺人毀物之利器。無不具備。萬一開火。我國必受其極大之蹂躪。故特向全國宣言。謂「和平未到絕望時期。決不輕棄和平。犧牲未到最後關頭。決不輕言犧牲。否則必致陷國家於萬劫不復」。故此次決定抗

戰。亦其難其慎。幾經焦慮之商榷而後定。深恐戰端一啓。炮火無情。兵連禍結。無論物業與人命。必受重大之犧牲。所謂兵凶戰危。古有明訓。但卒至毅然決然決定抗戰者。固因日寇兇橫。夾硬以武力侵犯。及國內外民眾誓爲後盾以催促。但蔣委員長亦胸有成竹。自知較有相當之準備。並有堅強之信仰。觀最近蔣委員長發表四年前在廬山對軍官訓練團所講之「抵禦外侮與復興民族」一文。其中所講之意義。針對今日之時局非常透切。不愧爲一先知先覺知己知彼者。亦是磨礪以須。待時而動者。且在該演講中。有謂、本團長（蔣委員長自稱）自從帶兵以來。每次作戰。向來就是仗着這種「大無畏」的精神。沒有看見什麼敵人在我的心目中」。又謂「只要大家絕對服從革命的統帥。在一個最高命令之下。要我們守就守。要我們攻就攻。要我們退就退。要我們進就進。要我們生就生。要我們死就死。如果能够如此共同一致服從命令的話。我們相信革命的統帥。一定可以有革命的戰術策畧。可以戰勝一切。達到我們

最後的目的」。更謂「我可以自信、如果有六十萬以上真正的革命軍。能够絕對的服從我的命令。指揮統一。我一定有高明的策畧。必可以打敗這小小的倭寇」。所以軍事的勝負。大半決於指揮官。尤其是統帥的智愚。而我們物質缺乏。武力不夠的中國。今後要能抵抗外侮。復興民族。端賴有賢明的統帥。和優良的指揮官。亦即在此」。觀以上蔣委員長在四年前已能講此豪壯之語。便知其自信力。與尊重自己的心。非常堅強。亦即是以精神克勝強敵之根據。故有蘆溝橋起事後決不屈服之宣言。並有迭次最後勝利必屬我人之談話。由此更知以精神克敵外。復有物質基本之武器。蓋我國之實力準備。除普通局外人所知者外。聞四川甘肅等省秘密訓練之空軍。陝西湖南將成勁旅之陸軍。洛陽武漢等處儲藏及趕製之軍械。均無人知其實數多少。諒可應付長期抗戰之計劃。因蔣委員長爲言必信。行必果。規劃週密。深謀遠慮之人也。何況軍械一層。尙有其他由各國陸續運入之新式軍用品耶。所以根據蔣委員長

既往之成功經驗。與運籌帷幄。亦可決是次抗戰。無論事實演變至如何程度。最後之勝利必屬於我也。

十、根據宗教

以宗教立場觀之。此次日本侵華終不得逞者。實冥冥中有旨意在。蓋日本侵華。早已在數十年前傳統的一貫政策。且經有充份準備。但他不於遜清末葉。或民國反正紛亂時。而實行總攻擊以滅我。其時孫中山先生謂「日本一動手。十日可亡中國」。又不於北伐濟南慘案。或九一八與一二八。及去年兩廣異動。與西安事變時。乘機落井下石。如此次之大規模進攻。若然。則我國羣龍無首。人心紛惶。手足無措。必難支持。或已被其滅亡矣。或曰、乘人之危。奪人所有。不怕物議乎。不知日寇瘋狂成性。橫暴無比。不恤列國警告。不顧正義人道。如俗語所謂天不怕。地不怕。尙怕物議耶。現在我國各派融洽。統一完成。安內之事告終。攘外之事開始。且在近數年對於抵禦外侮之軍力。較有

相當準備。故於此次被日寇猛烈攻侵。亦有堅強之抵抗。而斷無滅國之虞。

且今日我國於宗教而論。可謂爲「浪子悔改」。蓋我國自古帝皇聖賢。均信仰宇宙間有一位無形之上帝。而敬畏之。托賴之。及禱告之。考堯舜禹湯文武以及周公孔孟時代。所言上帝。或別稱其名爲神爲天載于古籍者。不下一二百餘次。毛詩之惟皇上帝。昭事上帝。上帝臨汝。無貳爾心。赫赫上帝。蕩蕩上帝。皇矣上帝。克配上帝。以及尙書肆類于上帝。孟子齊戒沐浴則可以祀上帝。中庸郊社之禮。所以事上帝。易經殷荐之上帝。聖人亨以享上帝。其有祭如在。祭神如神在。禱爾於上下神祇。天生德於予。天降下民。作之君。作之師。惟曰其助上帝。天降大任于是人也。天生蒸民。有物有則。堯薦舜于天而天受之。天視自我民視。天聽自我民聽。天行健。君子以自強不息。天自祐之。維天之命。畏天之威。知我者。其天乎。等等見於儒書者。舉不勝舉。總之上古時代。吾人與上帝甚爲親近。直覺上帝如在其上。如在其左右。如三后在天。與人有

息息相通之關係者。孔孟以降。人心漸漸不古。對於上帝日形疏遠。如浪子背父離家遠適。馴至不識上帝之真相。而以「道」以理、以數、以氣、以造物、以彼蒼而代之。甚且以爲無有此「形而上者」。因是我國人心澆漓。道德頹喪。或反對宗教。或唾棄道義。以致國運迍邐。民生凋敝。天災洊至。人禍頻仍。此或亦我人獲罪於天。不識上帝。違背天道所致。可幸者、上帝以愛世爲懷。特遣基督忠僕過來我國。宣傳天道。令人認識上帝。而與之復親。又簡選基督徒孫中山先生。以拯救我中華民族。脫離專制。創立民國。輓近選召蔣介石先生爲基督徒。以担负救國救民工作。領導全國民眾走向光明大道。其對金陵大學畢業生演講。有曰、「我祈禱之時候。無異晤對上帝。斯時我只覺我自己藐小懦弱。禱畢、便有偉大力量在我身心周遭孕育。我讀聖經異於讀書。我不但倚靠它做我人生旅程之南針。並且賴以產生救國之力量。所以我每天一小時之靈修生活。確已奠定自己效忠黨國之信念基礎。汝等畢業後。到社會上做事。要

求成效。必要得到一種已立立人之力量。以勗助自己。服務社會。否、則休談服務。恐自顧不暇也」。且蔣委員長隨時請中西名牧到其家庭講道祈禱。并邀戚友屬下同叙。共沐神恩與經訓。孫蔣二公。一爲創造中華民國。一爲完成民國統一。爲我國最大之領袖。而其他高級執政長官。亦有多人信奉基督教者。而民眾信仰基督者亦日益加增。卽不啻代表我國藉基督再與上帝互相親和。崇奉而敬畏之。然此有類浪子悔悟而復返父家。得其父之愛顧。然則我國雖遭遇浪子之艱難。但既覺悟回頭。則天父不特不遺棄。而任敵人消滅。且賜保護而珍貴之。但要我儕肯切實悔改。將舊有一切不良之習染剔除。刮垢磨光。澡心浴德。如浪子將其心中之惡念。身上之污穢。洗滌淨盡。復享父家所預備之福樂。此意請參新約路加書所載「浪子悔改」之譬喻。便知其詳。

或曰、旣以宗教立場而論。則上帝爲吾人大父親。而人類皆爲兄弟。旣爲兄弟。則彼此有緩急相濟。有無相通之義務。現日本地狹人稠。土地資源。均不

足用。以致糧食缺乏。人口過剩。乃爲生存計。不得不向外發展。其外務省（卽外交部）向世界宣言。謂「日本民族。勤勉正直。有向世界尋求幸福之權利。亦有向世界要求資源土地。及與其他富強國家。並駕齊驅之權利」。有些日本學者。如山田武吉等等常著書立說。以此等理由、作爲日本侵畧中國之辨護。彼等認爲世界是全體人類之公有物。有能者可以得之。人人均有生存於世界及享受世界物產之天賦權利。所以地小人多之國家。向外發展。是合理者。擁有多大地資源。而自己不能勤奮開發之國家。讓別國有爲者代替經營。亦是應該之事。此種理由。與基督所講之譬喻。類相彷彿。路加書載曰、「有人植葡萄園。租與園夫。遂往遠地久居。及期、遣一僕就園夫。令其輸園中當納之果。園夫扑之。使其徒返。復遣他僕。園夫亦扑之。且辱之。使之徒返。三次遣僕。園夫竟傷而逐之。園主曰、我將若之何。若遣我愛子。或彼見而敬之。園夫見其子。相議曰、此乃嗣子。盍來殺之。業則歸我矣。遂逐於園外。而殺之。園

主將何以處之。必來剪滅園夫。以園租與他人」。此譬喻、簡釋之。葡萄園、喻世界。園主、喻上帝。園夫、喻世界上之人。令其輪園中當納之果。喻上帝令世人將所得於世界者。發展之。多結果實。以符進化宗旨。而感謝上帝。遣僕就之。喻上帝降生先知聖賢臨世。教人敬天、愛人、澤物、盡己本份。免負天職。愛子、喻耶穌。剪滅園夫以園租與別人、喻上帝將不盡本份、反對天道、拒絕宗教者。施以懲罰。並將其所有轉給別人之意也。基督又設一譬。其意與上述者稍有分別。而更補充之。馬太書載曰、「又如一主人。將往異地。召僕。各按其才能以資付託之。一付五千。一付二千。一付一千。遂去。其受五千者、往以之貿易。又獲五千。受二千者、亦如是。獲二千。惟取一千者、往而掘地藏其主人之金。厥後、主人歸。與僕會計。受五千者至。又携五千。曰、主人付我五千。我因之又獲五千。主人曰、美哉、善且忠之僕。爾於寡者既忠。我必以多者任爾。可進享爾主人之樂。受二千者至。曰、主人付我二千。我因之又獲二千。

主人曰、美哉、善且忠之僕。爾於寡者既忠。我必以多者任爾。可進享爾主人之樂。受一千者至。曰、主人。我知爾乃忍人。於未播之處而穫。未散之處而歛。是以我懼。往藏爾一千於地。今以屬爾者還爾。主人曰、惡且惰之僕。爾既知我未播之處而穫。未散之處而歛。則當以我銀置諸兌錢者。迨我歸時。可得我之本銀、而獲其息。故可奪其一千、而予有十千者。彼無益之僕。可逐於外幽暗之地。在彼必有哀哭切齒矣。此譬所言之主人、喻上帝。僕人、喻世上之人。所付託之銀、喻人所得自天之才能物產或道理。受五千或受二千、而獲雙倍利者。喻世人將所得之才能物產或道理、而擴張之。生長之。受一千而無生息者、喻世人將所得自天者。錮閉之、廢棄之、而失其應有之作用。受賞者。喻世人肯盡用其才能物產及所得之道理而發展之。則必愈用愈有進步。愈有生息。及愈得較大之付託。受罰者、喻世人不盡本份。放棄應有責任。以致本來所有者。亦歸消失。甚至自身隨之滅亡。其譬喻之大意如此。

我國地大物博。土地肥沃。氣候溫和。處於寒熱帶之間。鑛產豐富。農產亦優良。獨惜我人未能多量開採。及盡力發展改良。以致富藏於地。物未盡其用耳。且我國有五千年之歷史與文化。及有許多古聖先賢之良善教訓。則吾人於物質精神兩方面。均有充分利益之享受。誠可謂得天獨厚也。有如上帝租給一宏大及肥沃之葡萄園與我人耕植。及如「受託」五千金得主人最信任者一樣之地位。吾人本應矢勤矢慎。發奮有爲。以多結良善之果實。而免辜負上帝之特恩。所謂食毛踐土。具有天良也。但環顧國中。不特未將上帝所付託者。盡量發展。抑且有破壞上帝「受託主義」之計劃。卽以數年前而論。我國內情形。只見黨有黨爭。政有政爭。軍閥則各據一方。擁兵自衛。如有權利衝突時。則不惜同室操戈。動搖國本。而爲民上者。亦多有氣燄迫人。宦囊腫脹。高級者、動輒刮一百數十萬。甚至數十萬。低級者、亦刮二五七萬。或十萬八萬。因而家肥屋潤。養尊處優。試問此等錢財從何而來。非由營私舞弊、貪污賄

賂來而何。爲民上者如此。則影響所及。而民衆亦爲之敗壞。古人謂「君子之德風。小人之德草。草上之風必偃」。又謂「上有好者、下必更甚焉」。蓋所謂潛移默化受感於無形也。試觀一般民衆。貪惰成性。道德頹喪。不自振拔。好逸惡勞。有若在醉生夢死之中者。無怪蔣委員長前數年在新生活運動演講中。有謂「普通一般中國人之生活。可以用幾個字包括。第一、就是「污穢」。無論何事。都骯髒不堪。第二、就是「浪漫」。一切行動。都是隨隨便便。毫無規律。第三、就是「懶惰」。凡事都是苟且偷安。敷衍塞責。尤其是不遵守時間。第四、就是「頹唐」。不但是精神萎靡。而且體格亦非常孱弱。還有種種不良之嗜好。腐敗之習氣。總而言之。現在一般中國人之生活。一言以蔽之。就是野蠻的不合理之生活。亦可稱之爲「鬼生活」。綜上觀之。上帝賜我之深仁厚澤如此。而我人亂作胡爲又如彼。則上帝將何以處之。「必來剪滅園夫。以園租與他人」。或「受主人詈爲惡且惰之僕。奪其固有一千。而予彼有十千者。及逐之於外幽

暗之地。在彼哀哭切齒」耶。

平心而論。倘我國如數年前之腐敗情形。不知悔改。實抵在亡國之列。蓋中外歷史上所有亡國者。其情形概與之相髣髴。可幸者、近幾年來執政者勵精圖治。埋頭苦幹。對於物質上之建設與發展。有異常之進步。對於精神上之陶養與振刷。亦有相當之效果。且現目正在繼續努力。趕步邁進。如浪子悔改。猛醒回頭。以更新其生命之狀況。似此刻苦自勵。革邪歸正。想亦必爲天父所寬諒而施恩。不將葡萄園易主。或詈爲惡且惰之僕、而逐出於外矣。至日本方面。以地小人多。資源不足。及「代我整理」爲侵畧之藉口。不知此藉口、卽真是藉口。絕無根據事實之理由。此藉口、亦可由英國龔斯德博士致日本國民公開書以道破之。其書有曰、貴國（指日本下同）定能以人口過剩問題與中國本部相提並論乎。而又以此爲侵畧之藉口乎。吾人苟以「滿洲」爲例。三十年來中國本部之人民移居滿洲者達二千萬人。而日人未與焉。（按近數年由日

本攫去以後、由其政府盡力獎勵移民、亦不過二十餘萬、)由此觀之。可知何國爲人口壓迫之地。貴國不能以人口移植滿洲。而謂可以人口移植於人口稠密之中國本部而與其農民較勝爭食乎。至若謂「代爲整理」爲侵畧之藉口。則中國之官吏。誠屬腐敗。惟現已加整飭。兩年以來。中國之紛亂。經已大減。抑且在發展與統一之中。貴國之「使命」殊失其時耳。余深恐貴國不能以上文所述者、爲侵畧中國之口實。而其原因或另有所在也。云云」。龔博士爲旁觀者。對於日本之伎倆。而能一語道破。可知日本侵華之藉口。所謂司馬昭之心。路人皆見矣。駐日大使許世英回國發表談話。謂「據余個人觀察。日本一般羣眾。對於政府始終有三種疑問。第一、因何而與中國開釁。政府解答則爲中國容共抗日。而一般民眾則認爲中國十年來之剿共。并未受其害。至所謂抗日思想者。日貨自由入華。非獨未受排斥。且厚蒙其利。第二、與中國交戰之目的何在。政府已迭次聲明無領土野心。何故又繼續向中國內部進攻。第三、戰

至何時爲止。政府既迭次聲明不擴大戰事。迄今已達七月之久。尙無終止之日。其故安在」。是亦遁詞知其所窮也。且以資源不足而論。倘日本安份守己。歛戢野心。不窮兵黷武、擴張多量過額之軍備。其資源亦不至缺乏。況日本不是文明郵治、以「王道精神」管理之國家。而是野蠻殘暴。以「霸道主義」統治之國家。不能以優勝劣敗、適者生存爲藉口、而管治他人之土地。矧夫日本所尋求。實已超過其所需要者。蓋自遜清光緒之初。以迄民國二十一年。已佔據或「租借」（其實佔據）之地。有琉球、澎湖、旅順、大連、高麗、臺灣、「滿洲」、「熱河」、等等地方。此等地方。雖已吞下。實未消化。且有嘔吐之勢。不過日本有如俗語所謂、「人心不足蛇吞象」。不知因貪而致亡命耳。然則以宗教立場而論。日本固不能以「天賦人權」爲藉口而侵吞中國。而中國亦覺悟回頭。去惡遷善。而必不致被上帝所遺棄。因上帝最喜人悔悟改過也。舊約約伯書有曰、「上帝豈有偏斷。顛倒曲直。爾若悔改。尋求上帝。向全能之主祈恩。如爾

清潔正直。則上帝必眷顧爾。使爾有德之家。得享平康。爾始雖微弱。終必昌大」。讀此經句、更令吾人有無限之感奮。與無限之安慰也。

其次、蔣委員長乃飽經憂患。備嘗艱苦之人。今一旦又遇強鄰壓迫。猛烈攻擊。橫施強暴。人物摧毀。不獨將既往建設之心血付之東流。而財產人命蒙此空前重大之犧牲。心中亦非常痛苦。故其在南京失陷後告全國國民書有謂、「此次抗戰、開始迄今。我前線將士傷亡。總數已達三十萬以上。人民生命財產之損失。更不可以數計。犧牲之重。實爲中國有史以來抵禦外侮之所罕見。中正身爲統帥。使國家人民蒙此鉅大犧牲。責任所在。無所旁貸。中心痛苦。十百倍于已死之將士與民衆」。況現在抗戰所受之艱苦。亦非筆墨所能形容。一時聞某地失守。一時聞全部犧牲。炮響隆隆。煙火連天。機聲軋軋。彈爆震地。間或將士失職。又有漢奸潛伏。頻頻戟刺。在在危機。其恐怖情狀有甚於楚歌四面。聖城重築。(舊約尼希米典故)之景況。當局者對此提心吊膽。驚魄

動魂之事。能不傷心怵志。倘無宗教之信念與堅忍。幾何不覆餗債事乎。德相卑斯麥。聲震環球之大政治家也。其言曰、「余苟非基督徒。則不能更延一時爲國家負責任。爲吾王效馳驅。吾之所以任勞任怨。肩任艱鉅。排除大難者。亦覺吾身受上帝之付畀。卽對於君國不能委縮故也。假令無宗教實力爲我中堅。又安能身任聯邦之劇任也耶」。蔣委員長爲誠信之基督徒。深沐聖經教訓。對於此次抗戰。雖受極大艱苦。遭遇如何險惡。亦必能忍受。而不灰心喪志。且得基督加其能力。而戰勝一切困難。以完成捍衛國家。復興民族之責任。聖經曰、「遇患難而不窮蹙。遇顛沛而不失望。遇窘逐而不見棄。被傾仆而不滅亡。我身常冒死。如主耶穌基督」。又曰、「基督加我能力。我則事事皆能也」。此經訓、又爲蔣委員長之克勝艱難成功事業之根據也。惟願我儕爲基督徒者。當此時機。更應實行基督教訓。表彰基督精神。力助國家。戰勝仇魔。亦願未信基督者。研求真道。認識上帝。則可如華盛頓抗英誓師有言。「藉上帝

之庇佑。以鼓蕩吾人之勇氣。以表露吾健兒之決心。以成同仇敵愾之壯舉」。俾我國轉弱爲強。而爲文明福音之邦。如英美等國然。以歸榮上帝也。

第五章 結論

綜上所言、日本對我逞其殘暴之戰爭。實違犯宗教之公理、正義、人道、忠信、仁愛、誠實、良善、互助、和平之教訓。則必爲公義上帝所不容。而執法以繩其後。且其本身之民族性。又如是之脆薄、卑劣、狡黠、貪鄙、驕蹇。更加以人心紛歧、財政支絀、軍力消耗、國際共惡等等。均有自取滅亡之趨向。況我國根據軍力、財政、人心、土地、人口、國情、歷史、國際之同情、蔣委員長之經驗、及宗教之十大制勝把握。皆持之有據。言之成理。且必有實現之可能。但「王道無近功」。凡事「欲速不達」。必須經過相當時日。必與付相當代價。始能實現。甚或至所受艱難危險。令吾人不能忍耐。以爲絕無希望之際。然後忽現曙

光。顯示吾人尙有希冀達到目的之途徑。所謂置之死地而後生。亡陣而後存。到時自有「山窮水盡疑無路。柳暗花明又一村」之喜出望外也。而吾人經過如許艱苦磋磨。犧牲奮鬥。而獲最後成功者。亦必不形驕氣。而痛定思痛。益加淬礪。以保守之而勿失。且因是不獨不有爭功逞能。攬權奪利之弊病。抑更有謙讓未遑。功成身退之美德耳。

況此次抗戰。無論如何繼續犧牲。犧牲無論如何重大。亦必要堅持到底。斷不能因畏犧牲。而訂中途屈服等於亡國條件。否則何以對已爲國犧牲而死之將士與人民。及一般家散人亡失業蕩產之同胞。且一屈服則所有犧牲。變爲無意義。無價值。及無光榮也。況自己苟存性命與家產。而爲準亡國奴。靦然人世。亦有何顏面見爲國犧牲者之遺族。及世界有識之人士耶。故以整個國家而論。彼一部份人與物。可以爲國犧牲。此一部份人與物。亦無不可以爲國犧牲。以個人而論。他人之生命財產。可以爲國犧牲。而我之生命財產。亦無

不可以爲國犧牲。如蔣委員長謂「我儕必要做到進退生死。共同一致。安危禍福。始終與共」。故吾人應有決定與其媾和屈服。而可保存我之生命財產。毋寧抗戰到底。而損失我之生命財產之志願。蓋吾人所受犧牲痛苦愈重。而前途所獲之光明愈大。況吾人所受之苦難。乃暫時之事。而民族生存。後人蒙福。是永久之基。有如聖保羅云、「今我所受暫而且微（保羅自謙其實甚重）之苦。爲我備至大無比之永榮。我所務者。非現時可見之事。乃不可見之事。蓋可見者暫。不可見者永也」。

矧夫人孰無死。而死得其所。則善莫大焉。古人有謂「死有重於泰山。死有輕於鴻毛」。意卽凡爲「忠」「節」「義」而死者。則有重於泰山。凡爲「奸」「貪」「姦」而死者。則有輕於鴻毛矣。予憶童時讀「三國」至關雲長之子關興。饒勇善戰。年少身亡。孔明爲之痛哭不已。後人有詩嘆曰。「生死人常理」「蚿蟻一樣空」「但存忠節義」「何必壽喬松」等句。不禁而有感。蓋此次爲國而犧牲之忠烈節

義之將士。多屬年少英勇。在人情上、殊深痛惜。在道理上、他等既已爲國家爲民族盡忠盡節盡義犧牲而死。正是成功成仁。死得其所矣。所謂雖死之日。猶生之年。尤勝於「壽喬松」。然則又何憾焉。

我等須知日本積幾十年之惡念與準備。此次故意積極侵畧。不是容易在短時間可以消滅其勢力。必至彼蠻幹到底。盡量橫暴。一到罪惡貫盈。自歸失敗。有如古人云、「多行不義必自斃也」。試看戲場上之大花面。當其權勢煊赫。橫行無忌時。無論亂作恃強凌弱。逞惡欺善之舉動。亦無人敢撻其鋒。但到結局收場時。則大花面身首異處矣。日本之強橫。實與大花面無異。而其結局。亦可拭目以俟之。如詩人謂「看渠橫行到幾時」也。且其軍事未失敗前。所有一切名譽、道德、經濟、民心、國家之人格。或稱「國格」。及國際之同情。必先之而失敗。惟吾人厥有三事。應要切實履行。以促其實現者。茲述之如下。

一、誠懇祈禱

我儕基督徒對於此次國難。固應要祈禱。以求神助。轉危爲安。卽非基督徒。亦應要祈禱。以獲「人憑神力。草望春生。」之效。蓋中國非祇是基督徒之中國。上帝亦非祇是基督徒之上帝。不過分別者。在其信仰上帝及祈禱與否耳。近日自大場失陷。節節敗退後。有幾位非基督徒朋友對我說。在戰爭危急當中。難民犧牲慘烈時。我亦誠心祈禱。求神默助。且有在普通言談上、或文字上、有默祝天心。幸邀天眷。如獲天助。冀邀天幸。如天之福。望神眷佑等等。對於敵人、則有必受天誅。難逃天譴。定遭天討。及天網恢恢。疏而不漏等等詞句。不覺流露于字裏行間。或言談之中矣。蓋吾人有限之靈。本由上帝無限之靈而來。有時遇危迫之時。失敗之日。或值痛苦死亡之間。知人力有限。神力無窮。自然反射而出。如孔子「天生德于予。桓魋其如予何」。「予所否者。天厭之。天厭之」。不禁而呼天也。

惟吾人祈禱。不是求上帝懲責日本。俾我國戰爭勝利。因爲上帝是公義正直。

全智全能者。誰是誰非。孰曲孰直。已瞭如指掌。惟有求其照公義仁慈之意旨。施行其賞罰大法而已。其次、我儕須求上帝。默助我國。早日脫離敵人之手。免致被其侵害。而至淪亡。其二、要爲仇敵日本祈禱。俾其軍閥早日覺悟其行動非法。停止侵畧。以免連累其全國因是滅亡。其四、爲我國領袖蔣委員長及各將士祈禱。俾有精神力量。堅心壯志。驅逐敵人。以拯救國家。其五、爲難民及中西教士祈禱。俾其能忍受艱難。履險如夷。及幫助救濟慈善工作。但我儕祈禱。須檢點及承認我人罪過。以冀邀上帝垂聽。如湯王剪爪於桑林。曰、「無以予一人之不敏。致傷萬民之命。以六事自責。曰、「政不節歟。民失職歟。宮室崇歟。女謁盛歟。苞苴行歟。讒夫昌歟」。又文王寢疾。復遇歧周地震。王悔罪。曰、「天之見妖以罰有罪也。率德改行。其可免乎」。史載湯文二王。悔罪祈禱。上帝均允其所求。中華民國創造者孫中山先生。倫敦蒙難時。亦由其懺悔祈禱以脫險。其致香港區鳳墀長老親筆函。有曰、「弟在牢中。自份必死。

無再生之望。窮則呼天。痛癢則呼父母。人之情也。弟此時惟有痛心懺悔。懇切祈禱而已。一連六七日。日夜不絕祈禱。愈祈愈切。至第七日。心中忽然安慰。全無憂色。不期然而然。自云。此祈禱有應蒙神施恩矣。……弟遭此大故。如蕩子還家。亡羊復獲。此皆天父大恩。敬望先生進之以道。常賜教言。俾從神道。而入治道。云云」。(全函附載本書之末。)民國成立後。孫先生曾對人云。革命主義。是由基督教而來。中華民國。是由祈禱而來。蔣委員長去年被難西安。亦由其自己切禱。及國內外教會基督徒代禱。而得平安返京。予更願此次因吾人祈禱。得蒙上帝公義與恩典之處置。而措我國於磐石之安。則拯救中華民國。亦由祈禱而來。可以後先輝映矣。舊約聖經云、「戰爭之勝負。乃在耶和華也」。惟吾人祈禱。必須出以真誠及懇切。以感格神靈。終必獲上帝允許。基督曰、「吾人祈禱。上帝應允或遲。豈不終伸其冤乎」。吾人味此。亦知所以從事於祈禱矣。

二、盡力輸將

英譯 “You trust in God and dry your powder.” 譯即「爾倚賴上帝。又要整乾爾之火藥」。其意如我國格言。「天助自助」。我要認定此次抗戰。乃為民族與國家生存而戰。亦為獨立自由幸福而戰。為解除束縛一伸冤屈而戰。為正義人道而戰。為公理和平而戰。更為人格道德而戰。正所謂「義戰」。「神聖戰」。比任何戰爭。更有意義。更有價值。亦更有光榮。故我人除祈禱外。更要盡力輸將。有財者出財。在可能範圍內。更要出力。有力者出力。亦在可能範圍內。更要出財。因在抗戰中對於人力財力。在在急需。故有錢者。應效子文毀家以紓國難。卜式輸財以助邊疆。否則無以對前線浴血之將士。及已為國犧牲之烈者。有力者。應獻身為募集救國公債。及為一切關於救濟難民與傷兵服務奔走。有中文或英文才能者。可向中西人之團體宣傳。或作論文登報。俾眾人明白此次戰爭之是非曲直。及感動大眾而得其同情之贊助。對於僑胞。尤須鼓動

其熱情。令其戮力捐輸。解釋其疑竇。以免其聞失利而灰心餒氣。此外如有歌劇、音樂、圖畫種種特長技術者。或有其他智能與才藝者。均須各盡所能。盡量供獻。以助救國工作。蓋前線將士。冒萬死以戰爭。後方國民。焉可不犧牲一切以爲後盾乎。尤須竭誠擁護政府。信任領袖。倘人人如是。則眾志自可成城。繼續努力。長期輸將。則兵精械足。士飽馬騰。抗戰到底。最後勝利。必屬我人而無疑也。

獨惜有等易受感情衝動者。以爲戰事失敗。就是當局抗戰不力。而不肯捐輸。卽捐亦不盡力。亦有以爲打幾場勝仗始值得吾人戮力多捐。此亦是吾人不應有之正當態度。更有以爲中國實力不足。終歸被人消滅。捐輸亦徒擲于虛牝。不知此是神經過敏。不明事理。而缺乏責任心者之言。蓋卽戰事失敗。甚至亡國。而爲國民一份子者。亦更要出力以圖挽救。譬喻爲人子者。見父母患病。固應盡人子之本份。請醫調治。如其病日益沉重。更要不惜金錢。多請醫者。

卽要食貴重之藥。亦須勉籌藥費。斷不能因其病重垂死。而吝嗇不救。惟有竭盡所能。以期藥到回春。卽不幸而死。亦已盡「搶地呼天。哀號莫及、」之爲人子者之孝敬責任。中國爲我人父母之邦。此次被日寇侵害。有如外感風寒。大燒大熱。抗戰失敗。地方蹂躪。有如病態加重。漸漸傳裡。但欲驅除此病魔。必要用重劑。方可藥到病除。然則欲驅逐日寇出於國土。必須有鉅大軍力。方克有濟。如欲得鉅大軍力。必要盡力捐輸。至於戰爭一進一退。城池一得一失。我等非軍事專家。莫明其戰畧之作用。更不知整個抗戰計劃之何在。且以事實與情理而論。我國斷無被人消滅之理。我人惟有盡國民一份子之責任。犧牲一切以助之。蔣委員長謂「如戰端一開。地無分南北。年無分老幼。無論何人。皆有守土抗戰之責。皆應抱定犧牲一切之決心」。然則吾人以捐輸代守土抗戰之責。尙欲推諉耶。

且有等身家富有者。不肯捐輸。捐亦與家道尋常者相若。一若與國家無關係

者。祇知將所有金錢儲存外國銀行。以爲國亡。亦可面團團作「亡國翁」也。且自奉豐足。家用濶綽。此等人不獨爲富不仁。抑亦不忠不義。因其對於人羣國家。不盡應有之本份也。無怪吳稚暉、陳獨秀兩先生。特爲文以警勸之。望其盡力捐輸。以抒國難。而救災黎。謂貧者尙且減衣縮食以輸將。而富者不將其盈餘以貢獻乎。吳先生文中警句有二、「莫非古人所謂富厚之民。飽暖思淫。淫則忘善。忘善則惡心生。又或者能富厚的。本來就是些中人以下不知不覺的愚人。他仗着不知不覺。隨便作惡。所以能富厚。可是到了國家危亡一髮千鈞的時候。全靠精神團結。若富厚的人。專門暢快自己。叫一般人心不平。把精神團結破壞了。那就要生很大的危險。所以全靠中人以上。的富人。把那同情心擴充起來。也在危難時。揀少一點享用。就一般同胞受苦難的。毫無怨言了」。總而言之。吾人無論貧富。對於盡力輸將之本份。實實無旁貸也。

三、自力更生

自力者、即藉自己之力以成事也。凡一切舉動。出於主動者、謂之自力。出於被動者、謂之他力。自力更生者、即將自己固有的力量。更復生長起來。而不倚賴他力之援助。雖然、他力之援助不可拒絕。但其注重點。必要盡其在我。他人之援助。乃屬額外增多耳。夫凡有機體、有生發本能之物。無論如何枯槁疲弱。苟休養生息。善於培補。必有自力更生之可能。此次抗戰。我國戰鬥力、雖不如人。但善於調劑抖擻。集中精神力量。亦未嘗不可與敵週旋。且此次橫遭壓迫。「逼虎跳牆」。凡有血氣者、亦莫不力圖掙扎。激勵精神。如祖逖之中流擊楫。項羽之破釜沉舟。以鼓起潛伏吾人中固有的力量。此種力量。係至無可限量。不可思議者。亦如困獸劇鬧。以掙脫牢籠而解決生死關頭者。此是處變的自力更生。而處常的自力更生。則更爲重要。且有程序與功效者。茲論列之如后。

(甲)以國家論 對於經濟。應如何裁撤形同虛設之機關。與無關重要之冗員

及一切無謂之開消。更要發展一切地利之生產力。並重新審訂國賦與入口稅而增加其效率。及堵塞利權外溢之漏卮。以實現開源節流之計劃。對於軍事。應如何盡量訓練新兵。擴充軍備。以補充或增加軍事上之實力。更要研求增加實力之效率。重新估定一切之軍事力量。對於政治。應如何整飭官方。澄清吏治。且要雷厲風行。不徇情面。將所有一切貪官污吏。件食「宰相」。及驕奢淫佚者革除淨盡。而任用有爲有守。精明強幹者充之。關於政治之得失利弊。加意檢點。并努力執行。以增加行政之效率。對於民眾。應如何培植以衛國家。古人謂「民爲邦本。本固邦寧」。故於整個民衆。必須有嚴密之組織。嚴格之訓練。能與政府通力合作。少壯者、隨時可出而爲國抗敵。老弱者、亦設法使其留守後方。以助生產。政府則依按各人之本能而利用之。指導之。并應勤求民瘼之所在。而實施補偏救弊之政策。對於難民。則設法以救濟之。對於流亡。則支配以撫輯之。並將戰區之人民。移殖內地荒野較多之省份。以助其謀

生。及多創辦工藝。拓展交通。以支插閑民而利國計與民生。尤其是撫慰優待戰士之家屬。以增強戰鬥力之更生。總之合全國人民。無論男女少壯老弱。均各盡所能。各得所需。並須注重戰時教育與文化。及推行新生活運動。藉增民智。以正民心。而培民德。則民力自然更生於無窮也。蔣委員長對抵抗日本可得最後勝利之方法。有數要語可移作自力更生之注腳。其言曰：「第一、就是隨時隨地要趕緊預備。我們個個要爲國家爲民族。盡量發揮自己的體力心力來研究運用一切的東西。準備民族爭鬥。第二、就是要有最大的決心和毅力能夠自強不息。簡單的講。就是要有恒。天天要研究。時時要準備。做完一件事。馬上又做第二件。已經有進步。還要求進步。好了之後再要求好。新了之後還要更新。如此才叫做自強不息。才可獲得最後的勝利」。吾人讀此。玩而味之。則可得自力更生之秘訣矣。

(乙)以個人論 對於物質方面。應將自己所有一切金錢產業。從新檢點核

計。應如何盡自己聰明才力。與思想勤敏。而擴張之。生產之。以期獲益於倍蓰。對於身體。尤應注重。西哲云、「強健之心志。寓於強健之身體」。故吾人應如何鍛鍊之。衛育之。以期養成一壯健康強有力量之人。可以担当較大之事業。或較重之工作。德諺云、用力愈多。則生力愈大。生力愈大。則成就功業愈偉」。是知自力更生之所自也。對於智能。智識與才能為吾人建功立業之因素。故應如何增進而更生之。夫世界為一包羅萬有之大學校。吾人肯努力勤求。潛心研習。自必得有日新月異之智識與才能。至家庭教育、學校教育、社會教育、及書報教育等等。亦均宜注意。古人謂「日識一字。積累十年。雖愚亦智」。況世界之大。人事之眾。物類之繁。經驗之多。倘吾人隨在留心觀察。注意探討。自必將固有之智能而增長矣。對於精神。精神方面。包括信仰、道德、人格、心靈四者。夫吾人不能無信仰。蓋無信仰之人。如舟之無舵。馬之無韁。而所有一切作為。均無堅定的志向。沉毅的力量。澈底的決心。蓋吾人之動

作。不祇是限於他所能知之已往。亦不祇是他所可見之現在。乃時常與不可見之將來發生關係。故不能不要有信仰。不祇是要有。且要時時更生之。儒書曰、「道也者、不可須臾離也」。又曰、「德者、本也。財者、末也」。老子謂「萬物莫不尊道而貴德」。是知道德爲人類不可缺少者。吾人應如何尊重之。將固有之道德而提高之。身體而力行之。古人曰、「我雖不識一字。亦須堂堂地做一個人」。又曰、「放開肚皮食飯。立定腳根做人」。此兩個「人」字所指之人。是有格者。人格之意義。卽做人必須有做人之資格。人之資格。卽頂天立地。正大光明。有品行、有自由、有獨立、有義務、有權利、有操守、有作爲、有高尙志趣。更有惻忍仁慈之心。有禮義廉恥之念。不是「衣冠禽獸」。人頭畜鳴。逸居無教。「人面獸心」。摟錯人皮。「禽獸不若」。衣架飯囊。「酒桶肉袋」等等有名無實者之人。且我人不獨要有人格。且此人格要有長進。長進則表明自力更生也。莊子曰、「哀莫大於心死。而身死次之」。古詩云、「今日長昏飲。非

「關養性靈」。是可知「心靈」與肉體之別。而亦爲人人所皆有。我國人體力智力。非不如人。但何以國家如是之衰弱。人民如是之頹廢。無非是靈力之缺病。蓋靈力缺病。則不能發生偉大的思想。作工時、失掉最大的原動力。身陷罪惡時、失却最有力之拯救。遭遇患難時、缺乏一個最好之保障。所以在世界能建立大功業造福人類者。必是充滿靈力之人。能充滿靈力之人。必是信仰宗教。敬畏上帝者。英諺有謂、*A man who leads the world must be led by God.*「一個人能領導世界。其人必先爲上帝所領導」。吾人不欲靈力充滿則已。如欲則必信仰宗教。接納真理。以頤養之。嫗煦之。使靈力充實。心性茁壯。則影響於個人前途。與國家幸福甚大。基督曰、「我卽真理」。又曰、「爾將識真理。真理釋放爾自由」。吾人獲識真理。心靈自必增強也。以上所言。均是個人自力更生之途徑。而宗教則爲之推動力。倘無宗教爲之推動。則一味人云亦云。口頭上之自力更生。則收效亦微矣。如祇知摘果實。而不栽培其樹根。則所摘得之

果實。亦幾稀也。

(丙)以基督徒論 原夫基督徒、本已自力更生。蓋無論何人。當立心悔改。皈信基督時。必將原有身心靈性。意志力量。一切更新。而爲重生再造之人。然後始堪稱之爲基督門徒。基督對猶太長官尼哥底母曰、「人非重生。不能見神之國」。又曰「我誠告爾。人非由水及靈。則不能重生」。所言之水、譬喻真理。靈、卽是聖靈。其意凡人認識真理。感受聖靈。其人不期然而然重生。故世人每有人格墮落。能力薄弱者。因信基督後。卽翻轉身來。變成有道德、有能力、有思想之人。如本仁約翰、托爾斯泰等等、更僕難數。獨惜有等基督徒。既遷喬木。復入幽谷。如經云、「犬轉食所吐。豕既潔復淖於污泥中」。釋氏謂爲「退轉」。孔氏謂爲「貳過」。均是故態復萌離經悖道者。亦有見道不真。守道不篤。信心不堅。「不冷不熱」。與俗浮沉。而不切實履行基督之教訓者。此等有名無實之基督徒。亦宜於抗戰中、對於道心上、信德上、靈力上、行爲上、熱誠

上均要再行自力更生。如保羅對以弗所基督徒曰、「當去爾前行。脫爾舊人。卽被惑人之嗜慾見壞者。爾當再以心志更換一新。衣以新人。卽按上帝之像。以正義及真理之聖德而造者」。以發揚基督之真道。而鞏固國家之基礎。則不愧爲基督之眞實門徒也。

上文所述誠懇祈禱。盡力輸將。自力更生三者。苟人人能奮志勉力。切實做到。則不特能促日本失敗。我國獲勝之早日實現。更能令我國大大昌明。民族駸駸復興。而我全體人民、亦獲較優美、較豐富、較完滿、及大有希望之人生也。然則本題「戰爭與宗教」。原意祇欲說明宗教如何有助於戰爭。不意「斧頭連鑿。鑿連木」。由有助於戰爭。而連帶說到有助於民族、於國家、及於吾人的人生者。夫如是、則此次戰爭不獨「因禍得福」。而且「福上加福」。不過仍視乎吾人肯如古人云「自求多福」與否耳。

補錄（續第十六版第三行）

八、互助

凡人或物。以至國家民族。皆各有所長。各有所短。牽修補紕。酌盈劑虛。是兩得其所。彼此獲益之美舉。故互助、是發展人類安生樂利之道。日本與我國。本是同文同種。兄弟之邦。自應互相提挈。共存共榮。及彼此推誠合作。以彼之長。而補我之短。以我之優。而救彼之劣。如彼出較先進之技術人材。而我出較豐富之物產原料。以發展工商、經濟、實業、交通、教育種種事業。以謀兩國幸福。而維持東亞和平。更樹立世界之好模範。諺云、「二人同心。其利斷金」。「二人合作。其利脫角」。二人如是。二國亦如是耳。乃日本不此之圖。而欲一手遮天。獨霸權利。積極侵畧我國。不獨不與我國爲朋友。而與我四萬萬五千萬人民爲仇敵。歐戰爆發之初。日本大倡中日友善。彼此合作。以維繫遠東永久之和平。但其提倡所謂合作者。亦祇有自己特佔便宜。而不顧及對方

之利益。如粵俗語謂「你一百、我五十、撈埋（混合也）使。你嘅、係我嘅。我嘅、係自己嘅」。（嘅卽國語的字解）祇知有己。而不知有人之合作。觀其以合作之名。而迫袁世凱訂立二十一條件。又有所謂東三省種種貿易實業投資合作。及華北有種種協定之合作。以上所言之合作。其實是「獨作」。將東三省連熱河共四省。及華北各省。如餓蠶之食桑。一概被其「作」（粵語食也）清楚也。且更欲推倒我中央政府。而建立所謂與日合作之維新政府。以遂其「獨作」之陰謀。是知日本不特不是「同情互助」。抑且是「利己損人」。殊屬違背宗教之教訓。聖經曰、「不可祇顧自己之事。亦當顧及他人之事。各按其量。力行相助」。又曰、「總之爾皆當同心合力。互相幫助」。第十誠曰、「毋貪取他人之房屋及財物。並其所有之一切」。此次日本侵害我國。固失其人類之同情心。實亦冒犯上帝之誠命也。

華盛頓抗敵祈禱圖說

美人自宣佈獨立後。英國即派兵進攻。當時美兵甚弱。迭遭慘敗。退至某地。（近費城）英兵追蹤進襲。欲乘勝殲滅。一鼓蕩平。可幸天忽降大霧。藉阻英兵前進。美兵得從容撤退。後幾次接觸。又幾乎全軍覆沒。幸天相美民。屢瀕於危而復安。至一七七八年冬。美兵敗退至 Valley Forge「科治谷」地方。是時美兵不獨軍械不足。糧食亦缺乏。所住之木屋。非常陋隘。所着衣服及行裝。破爛而單薄。不足以被體。祇有燒火以取暖。全軍大抵又冷又餓又有病。一切安慰之物。都付闕如。是時全軍幾乎垂頭喪志而嘆氣。以爲抗英從此失敗而無希望也。統帥華盛頓是一忠誠基督徒。究竟遇窘迫而不窮蹙。遇慘敗而不失望。被傾仆而不頹喪如聖經所云者。雖覺人事至此已窮。惟有天心祈禱可望。於是在戰區屈膝跪地仰天禱告。懇求上帝俾其有絕處逢生之路。禱後、心神爲之一振。而獲慰安。知蒙上帝允其所求。於是恢復精神。勇氣百倍。信得尙有最後勝利之可期。遂以此精神與信念。感動部眾。令其自力更生。忘記痛苦。集中精神力量。抵抗英兵。卒獲最後之勝利。當時全軍感覺非獲神默助。曷克臻此。故開國後所鑄之國幣。由政府頒定鑄入 *We Trust in God*「我儕賴神」四字。以紀念當時藉賴神之助力。終獲抗英獨立之成功。（此是說明本書第一篇插圖）

爲國難祈禱文


戰爭與宗教

爲國難祈禱文

一百二十

全能的上帝萬國的主宰啊你已賜給我們華麗錦繡的山河宏大肥沃的土地令我們有純粹偉大的民族保全我們有文化歷史長遠的國家獨惜我們不知勤奮盡量開發以致有負上帝之所「授託」馴至我們離開眞道不識敬畏上帝違背「食毛踐土具有天良」之教訓甚有醉心於虛榮假樂昏憒天賦靈明沉迷於貨利聲色放縱於人慾橫流中而不自覺冒犯上帝之道德自然律以致天災洊至人禍頻仍這無非是我們作惡犯罪所致伏願上帝大發仁慈寬恕我們一切有形無形之罪愆指導我們走向悔改新生之途徑掙脫沉淪死亡之綁繫更求賜給智慧能力與我們的政府執政人員蔣委員長暨以下各長官加增他們信靠你的心努力抵抗仇敵保衛我們的國家復興我們的民族革除一切不誠不實和政治上的腐敗 慈悲萬能的神啊求你幫助我們剔除一切的愚昧黑暗紛爭嫉妬驕傲假偽怯懦卸責自私自利種種弊端加給我們忍耐熱誠犧牲堅心毅力勇敢奮鬥種種美德我們竭誠懇切求你眷顧我們的中華民國早日脫離敵人之攻擊解除國難感格日本軍閥覺悟其舉動非法停止侵畧更求上帝以你的公義仁慈處置此次中日糾紛及備受痛苦之難民又求你俾我全國人民有機會認識眞理由眞理而得眞自由的幸福造成燦爛的中華民國在國際中有相當的貢獻協和萬邦歸榮上帝這是我們所懇切以誠以靈的禱告藉着主耶穌基督的聖名 阿們

The Shepherd Boy Killing the Giant




(章七十上耳母撒詳)圖亞利歌將猛殲強勝弱以力神賴衛大童牧

國會議員祈禱圖

The First Prayer in Congress

華盛頓領議員等在



(Reproduced from The Pageant of America Copyright Yale University Press)

戰爭與宗教

下篇救國與祈禱

第一章 導言

現在國難當前。吾人一提及救國。卽若屬於戰爭問題。本題是「救國與祈禱」。祈禱則屬於宗教問題。不啻與前三月予在本聯會所講之「戰爭與宗教」問題有互相呼應之聯貫。惟前題內容。所採材料。多屬於戰爭。而畧於宗教。本題所採材料。多屬於宗教。而畧於戰爭。截彼之長。而補此之短。酌此之盈。而劑彼之虛。互相協調。有若枝柯連理。而成爲一體也。

我國近數十年來。幾無日不有「救國」「救國」之聲音。喧闐於耳鼓。「救國」「救國」之文字。槎觸於眼簾。果何故哉。毋亦因我國國勢阨危。有岌岌不可終日之勢耳。蓋我國自一八四十年至一八四十三年鴉片之役。一八六十年英法聯

軍之役。一八八三至一八八五年中法之役。及一八九四至一八九五年中日之役。幾次與外國戰爭失敗以後。每次得較深一層認識我國事事落後。所有精神物質均不如人。喪地失權與訂立種種不平等條約。陸續實現。瓜分豆剖國際共管之聲。喧囂塵上。我人真有「其亡其亡。繫于苞桑」之感嘆也。然我國日趨於危亡者。推原其故。是亦由自遜清以來。政治黑暗。人心陷溺所致。蓋爲行政人員者。每多貪污贖職。賣官鬻爵。病國殃民。酬酢夤緣。顛預敷衍。顧指氣使。爭權恃勢。凡事私爾忘公。藉公濟私。祇顧個人利益與娛樂。而不顧國家之衰弱與危亡。更不顧民間之凋敝與疾苦。而爲人民者。亦多愚昧、文盲、污穢、迷信、浪漫、怠惰、頹唐、放僻邪侈。暴棄墮落。醉生夢死。昏憊天賦靈明。而不肯矢勤矢慎。力爭上游。以立志發奮爲上達之人。因是而致一般人民。精神憔悴。生活枯槁。身心靈性。均受痛苦。而不獲人類應有之生活。應享之幸福。前有人著「中國必亡論」一書。雖其意欲拯救中國。但覺中國凡事衰

落與腐敗。有難挽救之感慨。又有人謂中國若亡無「地理」。(意即無了中國之地理而轉屬別國者。)中國不亡無「天理」。其意亦覺中國人心敗壞。政治腐化。衡之天理。亦應滅亡。否則無有天理也。是知拯救中國之根本辦法。須由改善政治與人民入手。雖現在政治與人民兩方面。均有覺悟改進之趨勢。及相當之發展。然與得救目標。相距程途尙遠。因政治與人民二者。尙要認真加緊改革與促進。方可達其目的也。故以我整個國家民族而論。仍然在於被救之地位。更加以現在強鄰壓迫。欲消滅我國家主權。斷絕我國家命脈。正所謂「國家有纍卵之危。生靈有塗炭之苦」。亡國之禍。逼在眉睫。垂危之氣。不絕如縷。故我國之待救。實刻不容緩。反之、我國苟若英美之國強家富。人民安居樂業。優然悠然。以過其舒適之生活。所謂國家有磐石之安。人民有昇平之樂者。又何必有無病而呻吟。非險而呼救者哉。蓋我國之待救。的確有如上文之所述者。茲請與言救國。

第二章 論救國

基督之道。本無救國直接之教訓。因基督是萬王之王。萬君之君。萬主之主。超越世界一切君皇而上之。且以上帝爲父。人類皆兄弟。無種族之分。國界之別。故有以言救國。是不澈底覺悟。打破種族思想。國家觀念。而違背基督救世之教訓。不知基督主張。雖是救全世界。但不是空空洞洞。高唱救世之論調。乃是踏實地脚。一步一步去做。以逐漸完成其救世之工作。故基督遣發門徒傳道救世。囑其由近及遠。由親及疏。曰、「異邦之路勿行。撒馬利亞之城勿入。惟就以色列家之亡羊」。此是耶穌救世先在其家屬與種族做拯救工夫。蓋在最關切之地方。及最愛之人民着手。以符人之常情與天性。而較易爲力與收效矣。夫國家與民族。爲吾人最關切及最親愛者。是知救國亦爲耶穌所主張。且耶穌之主張。是拯救整個的國家。即包括物質與精神。及現在與將來

者。亦是自衛自強。不是妨害他人者。況救國之意義。卽是救世界。救家庭。救自身。救後代。謹分別論之如次。

一、救國卽是救世界

當耶穌升天時、最後囑託其門徒往普天傳福音於萬民。有曰、「惟聖靈臨爾後。爾將受能力。爲我作證於耶路撒冷。猶太全地。撒馬利亞。以至地極」。是知救國卽是救世。蓋卽如耶穌救耶路撒冷。卽是救地極。不過是初步起行救一部份。與繼續進行救整個之別耳。故救國固無碍基督救世之宗旨。而實有適合其逐步施行之教訓也。惟救國如救病人。有治標與治本之分。竊今日中國之危殆。幾有病入膏肓之險象。非尋常平淡之藥石。可克奏膚功。必要如尙書所謂「若藥不瞑眩。厥疾不瘳。」之施斷。故必先以刀圭針灸治其標。而滅殺其病勢。繼則以君臣湯劑治其本。而療養其精神。如是、不特沉疴立起。且將變成一剛強之大丈夫。刀圭針灸者。不啻今日抗戰之飛機重炮。以殺敵人之

兇勢。君臣湯劑。亦如福音眞道。與新生活運動以培養我國之人心。苟我國人肯研求基督救道。遵行禮義廉恥之教訓。匪獨各個人俱獲拯救。抑且整個國家。亦因是而得救焉。國家得救。亦卽救世界一部份。耶穌哭耶路撒冷曰、「城乎、今猶爲爾之日。倘爾於是日而知關爾平安之事、則幸。但此事今隱於爾日矣。日將至。爾敵必築炮壘攻爾。四面圍困爾。盡毀爾。滅爾赤子於爾內。不留一石於石上。因爾不知眷顧爾之日也」。又曰、「耶路撒冷乎。耶路撒冷乎。爾常殺先知。石擊奉遣就爾者。我屢欲集爾赤子。似母雞集雛於翼下。惟爾不欲。爾室將荒墟矣」。吾人讀此經句。則知澈底救國。必須不拒絕基督眞理。而投入天父之懷抱。如雛集於母雞翼下。而不爲鷲鷹所攫取而吞噬矣。

抑尤有進者。目前中日戰爭。不祇是我中國一國之問題。而是一整個世界之問題。蓋我國萬一不幸而淪亡。則日本武力政策成功以後。卽利用中國人力物力財力作基礎。以備走向征服全世界之途徑。而實現田中密摺先征服「支

那「後征服世界之夢想。且以基督真理而論。倘我國滅亡。則世界正義、公理、及基督真道。均受莫大之影響。如蔣夫人宋美齡女士致美國中華基督教大學聯合董事會函。有謂、「倘民主國因畏懼或別種原因。而不能制止日本兇殘野蠻之舉動。以致遂其吞併中國之野心。則中國固失敗。而世界亦將不免於失敗。且世界文化。基督教義。亦因是而消亡」。然則以基督教救世立場言。如我國得救。則基督教道亦易流行於世界。否則基督教救世之事工。亦爲之阻礙難行。所以救國卽是救世界也。

二、救國卽是救家庭

古詩謂、「國破山河在」。今人每轉其詞曰、「國破家何在」。是卽「覆巢之下。焉有完卵」。「皮之不存。毛將安附」之意也。故人每以「國破家亡」相提並論。曠觀古往今來。因國破而致家亡者。不知恒河沙數。然此亦不過多屬於在朝之官宦及皇族耳。其平民除遭兵燹者外。幾不與焉。故一般平民。對於國家興

亡。有若秦越人之視肥瘠。以爲國家不過是皇帝之私有物。所謂國亡者。不過轉朝易姓而已。所以俗語有話「無論何人做皇帝。都不成問題。吾儕小百姓。祇知一味納糧耳」。故「保皇」。「救駕」。或「挽救江山」者。祇稱之曰「勤王」。或如尙書曰「爾衆士同力王室」。而不稱之爲救國。卽有稱之爲救國者。亦不是今日所稱之救國之意義。且有人以爲我國卽使如從前亡於遼、金、蒙古、滿清等異族。亦不過一樣負擔賦稅。一樣享受國家權利。及過一樣如常之生活耳。不知日本之勢力。與其橫暴、殘酷、陰險、惡毒種種手段。遠過於遼金元清。倘彼滅亡我國。必較遼金元清之壓制與苛待。而特別加重。試看其對待高麗、臺灣等民族便可知。然則我人欲作如遼金元清時代之亡國順民亦不可得。蓋此次日寇謀我。不祇是推翻我國政府。更易我國執政人員。而且是霸佔我國土地。剝奪我國主權。更加是毀滅我文化。芟夷我種族。毒殺我人民。慘害我家庭。試看日寇所佔據之城市。其屠戮平民。強姦婦女。搶掠財物。及強迫向其

行卑下之禮。不從則斧鉞隨之。種種作惡。無所不用其極。以致所有居民。室空物淨。家散人亡。死者、固慘不忍睹。生者、亦顛沛流離。焉尙有家庭之可言。城亡、尙且如是之悽絕人寰。無家可歸。偷若國亡、更不知慘酷之何似耳。且有城未亡、而遭日機轟炸者。亦多有傾家蕩產。人物皆空之慘劇。夫日本以飛機。到處濫炸。大肆屠殺無防備之農村人民。以爲出此殘酷手段。便可令民眾請願政府媾和。或怨尤當局。不肯合作。則可使戰事早日結束。不知此種毒辣舉動。更令一般民衆澈底認識倭寇慘無人道。有甚於虎狼。及認識國家不祇是一人一姓或當局者之國家。而是全體民衆之國家。國之興亡與民衆有密切極大之關係。不特不怨尤政府。且樂受苦難。甘之如飴。更加一致起來爲政府後盾。努力做抗日救國工作。以洩其飲恨憤激之心。報載安徽一鄉婦。全家被日機炸斃。子遺一身。其飲恨憤激爲何如耶。適有日兵在該處被俘虜。該婦伴稱未見過日本人。請求一見該俘兵。迨一見時、卽撲近用猛力齧該兵之鼻。

當堂脫落。鮮血淋漓。倒地而死。是亦可知倭寇怨毒之於人甚矣哉。是又知倭寇不祇欲亡我國。更是欲滅我家。故予謂救國。卽是救家庭。倘我不努力去救。則國亡無日。家亦隨之也。

三、救國卽是救自身

國家乃由人民集合而成。無人便無國。無國便無人。蓋雖有人。亦稱之爲奴隸牛馬。或稱爲令人鄙視的亡國奴。不能堂堂然稱爲一個人。因其一切行動。受人束縛。不能自由獨立。所有金銀產物。亦無保障。不獨身體輒受肆虐。思想亦受桎梏。而精神更受痛苦矣。前月有西牧陸博士在本聯會演講。謂前有一高麗傳道人。在美國加省大學肄業。偶加入言論自由之社會。回高麗後。卽受日寇嚴厲斥責。并勒令發數千通函。寄去美國上下議院議員。及其他有名望人等。該函乃由日寇起稿。詳述日本政府如何優待高麗人民。及如何提高其生活。若他不肯照辦。則卽置之於死地。而更殃及其妻兒父母。該傳道人本意

如祇及自身。寧死不從。但要連累全家大小。一概誅戮。祇得啞忍遵行矣。此外虐待高麗人之毒辣手段。觀高麗人洪焉等所發表之文章。便見其慘酷之一斑。毋怪高麗人每有「亡國淚祇有亡國人灑之」。及「亡國之痛苦。祇有亡國人知之」之嘆。印度革命大領袖甘地、在十年前於英美兵艦炮擊南京時、反對英國派印兵赴華。在各報宣言有謂、「印度之受制英帝國主義者。乃亞洲諸民族被壓迫之關鍵。彼在奮鬥中之華人。須知印兵係被不公道的利用以壓迫他民族之自由者。印度孱弱無能。任人鞭策。吾人意志。實不克自主。想明白事理之華人。必加以原諒。云云」。觀此、可知被人亡國者之痛苦悲鳴。真有令人聞之而酸心墮淚者。且看亡國之猶太人。最近在德奧等國被迫至無容身之地。以致自殺者不勝之多。是知亡國奴到處都受人排擠也。無怪蔣委員長告全國國民書有謂、「若遂自甘屈服。則精神一弛。國隨以亡。奴隸牛馬之辱。有千百倍於今日戰爭之痛苦而不止者」。又謂、「國家獨立之人格一墮。倭人宰割

之方法愈酷。萬劫不復。卽永陷於沉淪」。吾人讀此。對於亡國之慘痛。亦可以深長思之而默喻。蓋我國如被日寇滅亡。吾人身家性命。固不可保。卽可保。亦無人生之樂趣。試思吾人所有之才能。所得之學問。肯爲日寇利用。而助其以華制華乎。或所得之金錢。肯爲日寇發展其工商實業。以裕其財源乎。或忍心靦顏以之縱情尋娛樂乎。若然。古「詩商女不知亡國恨。隔江猶唱後庭花」。卽爲爾詠也。故我人無論如何犧牲。必以救國爲前提。先哲有云、「愛國卽愛身。救國卽救命」。法諺、「不自由毋寧死。鋤異族乃生存」。是又可知救國與吾人自身之關係之重要也。

四、救國卽是救後代

詩曰、「我躬不閱。遑恤我後」。此不是正當人情之感慨語。蓋吾人生於塵世。莫不欲後人安生樂利。享自由之幸福。卽以整個世界而言。亦願後代人羣進化。而享受較優勝、較豐美之生活。尤其是中國人對於後代。更加注意而爲其

謀幸福。雖爲兒孫作馬牛。不可以爲訓。但令兒孫作他人之馬牛。任人驅使與踐踏。亦於心何忍。更不可以爲訓矣。故凡稍有思想與仁慈者。必欲其子孫後代。得享自由平等之幸福。與天賦之人權。而不願其淪爲他人之奴隸。以個人立場言。則願子子孫孫。光宗耀祖。以國家立場言。則願後代人民。福樂進步。茲次倭寇侵我。不祇是眼見的自身暫時問題。而是未見的後代永久問題。觀其對待高麗、臺灣、僞滿等之陰毒手段。便知其然。蓋不祇是毒化生存者。令其懦弱萎靡。俾易於駕御。而受其刀俎。抑且令未來之人口減少。庶可易施管治。如埃及法老王對待以色列族人。以殘暴辣手殺其生存者。而減少其人口。以接生婆殮死其初生者。而阻止其蕃殖。舊約出埃及記云、「法老王強以色列人作苦役。使之過於辛勞。以喪其生。凡所作之役。無不以嚴以酷。又命令凡以色列人所生產新丁者。若爲男、則投河以殺之。女、則存其命」。倭人若亡我國。其對待我人民。較埃及王對以色列族人。其慘酷、想必有過之無不及。故

我人今日救國以免淪亡於異族。卽是救我人後代出於永遠之絕境也。

第三章 論祈禱

關於祈禱問題。吾人在於救國當中。更應格外注意及之。尤其是在風雨飄搖。驚濤駭浪。積弱之我國。蓋祈禱、乃憑神力以補人事之不足。亦是精神上與物質上無限之用品。幸毋以爲祈禱是違背上帝之自然律。謂上帝卽有允准吾人祈求之願意。亦爲其自然律所束縛。蓋以上帝安排萬事萬物。有一定天然之公例。如水之就下。火之炎上。重物不能浮於較輕質物之上等等。不知祈禱。屬意志之事。意志之事。可變更自然之公律。如自來水管之水上升。電燈之火注下。鐵艦駛行於洋海。飛機翱翔於天空。皆由人之意志而成。且一國之元首。雖受憲法所縛束。有時亦可特赦罪犯。或便宜行使其職權。上帝爲宇宙全能之主宰。豈反受自然律所束縛。而不能答應吾人之祈禱乎。況所謂自然

律者。乃世人所謂萬物循行之軌道。故亦以世人所知者爲限。其實除世人所知者外。不知尙有若干別種之自然律。然則上帝應允吾人之祈禱。想亦是自然律之一種也。惟吾人祈禱。必須出於真誠。方可有濟。基督曰、「上帝是靈。拜之者必以誠以靈」。儒書曰、「誠者物之始終。不誠無物」。又曰、「誠其意者。毋自欺也」。吾人祈禱。苟出於至誠。必獲上帝允許。古人所謂「精誠所至。金石爲開」。故吾人誠懇祈禱。可以感格天心。感格他人。感格自己。亦可以感格仇敵也。茲列論之如下。

一、感格天心

考「感格天心」一語。乃我國古有之名詞。其意如「孝感動天」。「感格上蒼」。「二德格天。」之類。基督教本不應襲此名詞而用之。因基督教徒明知天是瓦斯體。是無靈之物。又焉有所謂「心」。夫宇宙間惟有一眞神。或稱上帝。我國自古以來。亦多有如是稱謂而崇奉之。不過有時以爲神或上帝是無形無像。

不可見的虛渺之對象。而以可見的能發出雷電風雨及日月雲霞之天而代之耳。觀尙書云「克享天心。受天明命」。所言之天心。便可默喻也。但予仍沿用「感格天心」者。乃令普通人易於了解。及便於行文也。經曰、「吾人若以誠求。上帝必以靈應」。語云、「心誠求之。不中不遠」。又曰、「至誠動神」。此均是感格天心之意也。故吾人祈禱。須一其志。凝其神。全其心。無有一毫浮雜念慮交夾於其中。如賓生氏 *Basson* 之所言、「掬誠虔深秘之丹心。以仰合天父之靈也」。尤須語語出自肺腑。若孺子於病中痛極呼慈母。本肫摯篤切之心。發篤切真摯之言。如雅各請求於天使曰、「汝不爲我祝福。我決不容汝去」。夫如是。以之感格天心。而天心無不格矣。

二、感格他人

吾人祈禱。若自其誠之發動。有時痛哭流涕。而不覺己之痛哭流涕。有時拊膺踏首。亦不覺己之拊膺踏首。當其時或有他人厠身其側。非有意他人。而他人

亦受感動。不僅一人。有時在會堂中。令全堂受感者。我國史載、「大舜父頑母嚚。舜耕於歷山。往於田。日號泣於旻天、於父母。以期感化親心。厥後瞽瞍亦允若」。美著名佈道大家慕翟。有一次約某省長談道。但該省長以己學問地位高尚。慕翟不配與之談道。但不便推却。祇得答允。而預備諸多問題。及科學理解以難之。不意慕翟到時。直進其辦公室。寒暄數語。卽請其一同跪下。與之祈禱。態度非常肫誠。言詞非常懇切。句句俱由肺腑中流露而出。禱畢、便握手祇道一聲 Good-bye 而別。該省長當時心中極詫異。亦極受感動。未幾竟領受水禮。皈依基督。以上二者。均是以祈禱感格他人矣。聞康有爲梁啓超等。到歐洲遊歷時。偶到宏偉的天主教堂參觀。適遇禮拜聚集。見千萬人。叙首一堂。虔誠肅靜。祈禱時、更雍穆恭敬。萬籟無聲。不禁油然而生感。且吾人每爲病人或遭遇患難者祈禱。往往減輕其痛苦。安慰其心靈。古詩人謂、「水聲與心聲相應」。予謂祈禱之聲。亦與心聲相應也。至因祈禱脫他人之危

險。出他人之絕路者。亦多有其人。使徒彼得被困堅牢。以爲必無生望。旋因會眾代之祈禱。而竟索脫出獄。蔣委員長被難西安。亦得同道代之祈禱而脫險。其言曰、「復承教會諸同道爲余祈禱。精神感應。爲力實多」。又聖保羅之所以成爲大使徒者。亦未始不先由於當日士提反被石擊死爲仇敵祈禱時所感。由上而觀。可知祈禱對於他人。每每發生之感力有出人意料者也。

三、感格自己

祈禱一名詞。在英文有 Pray 及 Invocation 「祈求」「乞禱」之意。此外亦有稱爲 Devotion 「敬虔」「潔己」「修靈」「獻心」之意。有稱 Meditation 「潛思」「冥想」「反省」「默念」之意。又有稱 Retreat 「退修」「靈交」「秘密省察」「回復精神」之意。統而言之。有如我國儒家所謂「慎獨」「洗心」「退藏於密」「退而省其私」「默座」「靜思己過」「吾日三省吾身」「澡心浴德」「刮垢磨光」「靜神養性」。如在其上。如在其左右。「涵養太和」。「養浩然之氣」。及佛之所謂「趺坐」。

「合什」。道之所謂「誦經」。「念咒」。之大同小異。或以爲殊途同歸之意。但基督教之祈禱。是有彈性者。卽有一定目標之可趨。而此目標、亦必有物在焉。此物、卽爲神靈。倘無神靈。卽無目標。無目標、卽無響應。無響應、則吾人祈禱如無的而放矢。而所有作爲。則歸於徒然矣。基督祈禱、有時用數小時。有時用通宵以從事。可知祈禱、不是一味向上帝乞求。因乞求不需如許時候。因在乞求之外。尙有其他作用。卽關於身心靈魂。人格意志。均有向上前進之感化。故吾人每有意志薄弱。道德頹喪。或品性惡劣者。因祈禱而獲感格。因覺自己所有罪過。擺在上帝面前。無可掩飾。中心受感。改過自新。亦有因祈禱而感動其見義勇爲。或立志做建功立業之人者。蓋在密室祈禱時。色相皆空。明心見性。收攝萬念。默運一心。自覺神光燭照。悟澈玄妙。有啓迪愚蒙。指導迷罔。改良朽腐。蘇解愁鬱。振起怯懦。提高人格之能力。西人稱祈禱密室爲 Power House「能力屋」。與電力廠同一稱謂。意卽發出能力之所。救世軍

創造者蒲斯 Wm. Booth 將軍。及著名宗教家麥哥利。Jerry McAuley 均原是德道墮落人物。因其肯歸信基督、及作長時間祈禱。而變爲有道德、有能力、有作爲、造福人類之人。而幹成偉大不朽之功業。諸如彼等。多有其人。故吾人祈禱。不可一味呼籲乞求。蓋「乞求如乞兒」。得所欲之物外。無高尚遠大之志向也。故同時亦應有省察自己之行爲。默念上帝之意旨。勤求上進。去惡從善。則必上迓神庥。而感格吾人之自身也。

四、感格仇敵

夫仇敵雖有公私之分。然於我均立於對壘地位。本難有感格之可言。蓋既成仇敵。則受感格者固難。而施感格者尤難也。摩西「目償目。齒償齒。」之律法。孔子「以直報怨。以德報德。」之教訓。均是令吾人無感格之途徑。且吾人爲感情動物。是非之見。不能盡泯。恩怨之念。豈無軒輊。惟基督曰、「敵爾者、愛之。詛爾者、祝之。憾爾者、善待之。毀謗爾窘逐爾者、爲之祈禱」。且基督

不徒宣之於言論。抑且見之於實行。基督當被釘於十字架時。爲仇敵祈禱曰、「彼等不知所爲而爲。求救之」。此祈禱、爲當時。爲後世。與基督爲敵者。多有因之而受感格。庚子拳匪亂時。樹起滅洋排外仇教之幌子。殘殺中西傳教士與教徒不可勝數。中有一教徒。被巡撫毓賢屬下捕獲。擬殺之。但見其誠懇祈禱。聲淚俱下。一再不忍揮刀。卒釋放之。此亦因其祈禱能以感格仇敵也。此次日本寇華。我國基督教會除通常爲國祈禱外。更增設國難祈禱團。其宗旨、固求上帝拯救國家。脫離敵人之侵畧。俾人民出於水深火熱之中。抑亦爲仇敵日本祈禱。求上帝感動其軍閥之天良。而有悔禍之心。雖日寇野蠻殘暴。有如禽獸。亦冀其覺悟於萬一。倘我儕恆久誠懇爲之祈禱。普遍舉行。踴躍參加。設使日寇見之。或閱悉於報上。冀或可動其人類同情之心。互助之念。以減殺其殘酷之舉動。英國有著名浸信會牧師史褒勒。Spurgeon 百年前曾創立倫敦城「帳幕」Tabernacle 大禮拜堂。能容萬餘人。予到參觀時。其現任牧

師述一史牧軼事見告。謂史牧有一次正在主領禮拜祈禱時。有與之爲敵者。大呼「Fire! Fire!」火燭「火燭」。而史牧絕不爲所動。照常鎮靜。續禱不輟。且更爲作此惡劇者祈禱。萬餘座眾。亦毫無驚惶騷動。仇敵對此。大受感化。卒至輸誠道歉。是知祈禱。亦可感格於仇敵也。予前著「愛仇敵」一書。已透闢論之。且已收頗多效果也。

第四章 論救國與祈禱之關係

救國及祈禱。已論之如上述。茲更論救國與祈禱之關係於下文。夫救國、分治標與治本兩途。前已言之矣。而祈禱於治標與治本。均有適宜之效用。不過其功效有不易見到。而易令吾人忽畧者。我儕爲國祈禱。實不自今日始。十五年前、我國非教風潮澎湃時。已彰明較著耳。迨後屢屢被日寇壓迫。更多作爲國祈禱工夫。想已聲聞於上。而感格於天心矣。故日本不在我國內戰紛起。政治

擾攘。準備毫無。建設缺乏。人心渙散之時。而實行如此次大規模強硬攻侵。若然、則我國固不能有堅強之抵抗。且亦不能邀國際之同情。（此意請參觀前題戰爭與宗教之根據宗教段）至開戰以後。日寇雖有堅船利炮。飛機戰車。亦不能如其願以「征服」我國者。此固賴我國之忠勇將士之勇敢與犧牲。然其所發之槍炮。及飛機所投之炸彈。聞每每爭些微中的而落空。且百不一中者。或放毒氣彈。忽被風吹回其本陣者。或戰地爭奪緊張時。而落重雨。以阻其兇勢者。或遇瘟疫。或遇風雪。以殺其銳氣者。近蔣委員長之飛徐州督戰。前後已不下四五次。驚險綦多。而尤莫如第三次視察防務時。直中天風雲變色。大雨淋漓。委員長勒馬戰場。征袍盡濕。爲國辛勞。無所怨也。而是時流彈橫飛。皆掠其側而過。最駭人者。則巨型炮彈突墜馬前。馬既驚躍人立。委員長幾墮。以騎術獨優。按轡復定。蔣委員長之善騎。於茲益顯。然彈落塵土飛沙。古木落葉。委員長長得免於難。非天鑒其精誠。初無以倖致也。三軍聞之。皆呼中華

民國萬歲。呼聲動天。敵人竟爲之相顧變色。最近西報載蔣委員長又乘飛機巡視隴海前線。突遇日機二十餘架襲擊。但蔣委員長如得神助。竟能脫險。安然而返。令人驚奇不置。諸如此類。非屬於人事。而屬於天意。而天意之所寄。於祈禱。厥有感應之關係。此祈禱感格天心。於救國有治標之效用也。至感格他人。及感格自己之祈禱。則於救國有治本之效用。蓋感格他人。則可精誠團結。同仇敵愾。一心一德。共策國是。感格自己。則提高人格。加增智能。公爾忘私。精忠報國。苟人人如是。不獨可以能消除外患。克勝仇魔。亦可以奠定國本。興隆國運。而植富強不拔之基也。歐美各國。多以基督主義爲立國之本。凡創立憲法。國會開會。及皇帝總統等就職。必先舉行祈禱。求神默助。俾進行無碍。而獲良好之效果。至於感格仇敵。對內言、則彼此化除意見。消解仇恨之心。使之不復爲敵。而反爲友。對外言、則可化干戈爲玉帛。轉戾氣爲和平。可減國家之危機。而免得國家之進步。以平等互惠爲彼此待遇之原則。

故祈禱如能實現以上四者。則於救國有標本兼治之關係也。

第五章 結論

此次國難。各地基督教徒均舉行爲國難祈禱。尤以在漢口聖保羅堂舉行之國難祈禱典禮爲最隆重。感人亦最深。觀其座眾大半受感落淚者便可知。且是日（二月六日）到者甚眾。軍政界要人亦多參加。可謂我國有史以來爲國祈禱開一新紀元也。到、有外交部王部長、馮副委員長、邵部長、曹次長浩森、張次長道藩、曾副秘書長仲鳴、何主任代表彭介石、吳市長及各外僑等約千餘人。男女唱詩班歌頌「戰必得勝」詩後、全體肅立、同唱「爲國祈禱歌」。次由黃吉亭領導全體屈膝、作開會祈禱。次宣讀聖經。同唱「我愛祖國歌」。當分別由王外長寵惠領導全體屈膝、爲國難祈禱。馮副委員長玉祥領導、爲我陸軍空軍祈禱。并由王外長獻花。並致詞。大意謂、中華民族素愛和平。此次之自衛抗戰。實

爲忍無可忍之抵抗。同時更非與日本一般人民作戰而是與其軍閥暴力鬥爭。我惟一目的、在爭取民族之獨立與自由。此後惟望上帝感化敵人。使其放棄殘暴與侵略之心理與衝動。使兩國步入博愛和平光明之途徑。次由湘鄂主教、美人吳德施講道。謂願與中華民族共受艱苦。並代表全體基督徒祈禱。務使整個社會與個人家庭生活。均能得到新的生命。得到人類的真理。旋由馮副委員長演說。對暴敵藐視公法。違背人類正義與屠殺平民等事實。列舉評述。并追述前方將士犧牲之壯烈。與應如何爭取人類正義、世界和平。均詳加闡說。全場靜肅無聲。聽眾大半落淚。詞畢、吳市長繼作演說。并由鍾可託博士宣讀蔣委員長員訓詞。及致全世界基督徒通電。最後、沈文卿牧師領導作閉會祈禱。吳主教祝福後散會。是次我國軍政長官。集合在基督教禮拜堂。屈膝跪下誠心祈禱。爲空前未有之盛舉。令吾人聞之不禁油然而興感奮之心。亦信必聲聞於天。而蒙上帝所鑒納矣。

昨閱國內外日報載「祈禱」一文。中有些是片面之詞。而非整個的理論。如「獲罪於天。無所禱也」。「事在人爲」。「人定勝天」。及以此次爲國難祈禱爲廢時。且不生效力者。茲爲窮理研究起見。特將管見畧辨之如左。

一、「獲罪於天。無所禱也」。斯語乃孔子答王孫賈問曰。「與其媚於奧。寧媚於竈」而發。蓋當時、人或以爲犯罪。可以媚奧媚竈而得解救。但孔子答以曰。「不然、獲罪於天。無所禱也」。以絕其以爲隨便犯罪。媚奧媚竈而可得解除之妄念。且斯語是從主觀方面而言。如聖經謂「犯罪者。必受上帝之懲罰。而得死亡之價值」。然則聖經亦以爲「獲罪於天」。無赦免之道乎。但在客觀方面。聖經又有悔改、信仰、祈禱、可得罪赦之教訓。如犯國法者。照定律必繩之以法。但有因其痛悔。或懇切請求。則可原情定罪。或特別完全寬赦者。而在客觀方面。孔子亦有「子疾病。子路請禱。且引誄「禱爾於上下神祇」以告。子曰、「丘之禱久矣」。是知孔子不祇禱於臨時。而且禱於平日矣。其所云「無所禱

也」。其意不是不用祈禱。亦不是祈禱不能發生效力。而是若我人有意犯罪。（凡犯罪即獲罪於天）。則無用祈禱。即祈禱亦無效也。否則雖偶有獲罪於天。亦可禱也。何況此次國難嚴重。吾人除以物質贊助外。而不應爲之祈禱以精神贊助乎。亞聖孟子曰、「雖有惡人。齋戒沐浴。則可以祀上帝」。意即我人雖作惡犯罪。而能洗心革面。亦可祈禱上帝。以求寬宥也。試觀古今中外歷史中。如成湯、文王、大衛王、所羅門、維多利亞、華盛頓、孫中山等等先哲。因悔罪祈禱。得蒙上帝悅納。而成就其事功者。不知凡幾。夫「執法如山」。是從主觀方面立言。「法外施仁」。是從客觀方面立言。二者似相背。而實相成也。國法尙且如此。何況仁慈憐憫寬大之上帝乎。

二、「人定可以勝天」事在人爲」二語。亦是琵琶半遮。片面之詞。考劉祈撰之歸潛志云、「天定能勝人。人定亦能勝天」。申包胥曰、「人眾勝天。天亦能勝人」。其注、言人眾以一時兇暴。雖能勝天。及天降凶。亦能禍強暴者。智畧如

諸葛孔明。亦謂「謀事在人。成事在天」。英格言亦有謂 *Man Proposes, God Disposes* 「人謀神定」。古人謂「人有千算。天只一算」。是知吾人作事。固要「反求諸身」。盡己能力。但亦不妨兼賴神能。蓋吾人每每用盡精神力量。千謀百計。以求金錢。而金錢未必能如願以償。以求學問。而學問亦未必能成。以求事業之成功。而事業終歸失敗。所謂「人謀不臧」。北轍南轅者比比也。是知吾人能力。可恃而不可恃。「事在人爲」而不能爲耳。西諺有謂 *Put forth your strength and trust in God* 譯卽「盡爾力。兼賴神能」。我國諺云、「人憑神力。草望春生」。二者均是閱歷有得之言。故吾人無論舉辦何事。或遭遇如何艱苦。一方面盡己之力以從事。一方面亦不可不求神默助。所謂「天助自助」。「自助天助」。二者不可偏廢。蔣委員長在此戎馬倥傯。軍書旁午當中。每日亦不忘祈禱與讀經。以充滿靈力。戰勝一切困難。比飲食以強壯體魄爲尤要也。然則祈禱。瓊乎尙矣。三、「以祈禱爲廢時且不發生效力」。謂此次中日戰事。「如果用祈禱之時候。


去做實際的弭戰工作。所得之效果。亦許勝過祈禱」。又謂「祈禱不會發生效力」。夫天演公例。凡百事物。倘不能發生效力以供應其他方面所需求者。其事物。雖或混鬧一時。斷不能有永久之存在。然則「祈禱不會發生效力」。則祈禱已消滅久矣。蓋自有人類以來。不知若干萬年。無論文野。都有祈禱。倘無效驗以饜足其需求。則祈禱尙能存在耶。夫祈禱雖有遲速或變換方式之應驗。但終必有允吾人之所求。或過於所求。且每每應驗於吾人不知不覺中。英國大著作家郝克 Thomas Hooker 曰。「祈禱爲余最大之事業。不特應余所求。其餘一切皆因之而措諸實行也」。是知祈禱不獨能發生效力於所求。且能有助於其他者。夫祈禱之意義、之價值、之重要。非深入堂奧。備嘗此中况味者。不能道其萬一。有如我不稔識音樂美術之意義。則不知音樂美術之美妙之價值。亦如不深識科學者。不知科學之利用。之奧秘。蓋祈禱固可以得「獲罪於天」之寬恕。更可默助吾人心靈之慰安。亦能堅固吾人之信仰。加增吾人之能

力。啓迪吾人之智慧。振刷吾人之精神。對於吾人成就功業。亦有增加效率之可能。故凡世界之建大功、立大業者。幾無一而不作對越上帝。祈禱慎獨之工夫。雖每日破費多少時間。而所得之效果。較用於其他工作。更爲優勝也。

或曰、旣已提倡祈禱救國。感化敵人。何以許久未得應驗乎。如先知哈巴谷曰、「我籲禱主。而主不垂聽。我向主呼冤。而主不拯救。將至何時。何爲使我目睹不義。世人行惡作惡。主何爲徒觀。攘奪與兇暴。恒於我前。……」因此法律已廢棄。公理不顯明。惡者圍攻善人。以致曲直顛倒」。不知上帝賦人有行善行惡之自由。倘人一行惡。或行善。卽阻止之。或督促之。則其所行之善。或惡。非屬於其本人者。故上帝特予其行善。或行惡之自擇權。不過上帝執法以繩其後。至何時執行其賞罰之大法。則非吾人可想像而得知。因耶和華曰、「我之意念。非同爾之意念。我之道路。非同爾之道路。我之意念。高於爾之意念。我之道路。高於爾之道路。有如天高於地」。故我人不可以自己膚淺之意

念。而測度上帝高深之旨意。以致懷疑與失望也。且上帝是公義仁慈之上帝。必有妥善安排。斷不虧負義人。如古人謂「天不虧負善心人」。又謂「皇天無親。惟德是輔。」之意也。況我人多忍受艱難。焉知不是上帝施以長期訓練。充分鞭策。使我人如切如磋。如琢如磨。以至成爲純良有用之器皿。而能担当改造國家。復興民族之責任也耶。否則鍛鍊不成。不能勝任愉快耳。是以我人必須忍耐、寬容、恒心祈禱。自力振奮。以「等待上帝顯明他之義怒。表彰他之權能」如保羅所言者。嫠婦之呼冤於官。夜友之求餅於鄰。耶穌亦已明譬示之矣。奈何人尙多不明此乎。聖經曰、「萬事紛至沓來。無非有益於愛上帝者」。又曰、「獨不思一人（指耶穌）爲民而死。致通國不滅。卽爲我儕之益」。是知吾人若是愛上帝者。及信仰耶穌爲我民而死之福音。必致國家不滅。雖禍事紛來。試煉頻至。亦必反獲恩益。如古人云、「禍兮福所倚」。又云、「塞翁失馬。焉知非福」也。

Rev. Pik Kum Chau, B. D., D. D.
Author



者 著
照 近 士 博 琴 伯 周

努力
抗敵
人格
救國

周

伯琴題



附載

公開問答

此次中日發生戰爭以來。其中有諸多問題。吾人未能明悉而發爲疑問者。著者每到中西團體演講。畢、輒有多人提出問題。以求解答。其中關於我國必獲最後勝利之理由。共產不能推行於中國。及中國不能變爲共產化。日本寇華據爲合理之藉口。照優勝劣敗天演公例。中國應滅亡與否。國際究能助我與否。抗戰於宗教有碍否。祈禱果能有助於救國否等等疑問。著者已在本書戰爭與宗教。及救國與祈禱兩題內分別解釋答辯一切。茲將關於其他問題并答案。述之如下。

一、問此次日本侵華。祇是軍閥之事。而不關其人民乎。

答、日本侵華。雖是軍閥主動。但人民方面。亦多贊成。因其自幼受一種侵

畧及黷武教育所暗示。且其民族性之貪鄙狡黠。亦大有關係。其中雖有不贊成者。亦屬少數。觀開釁之初。其人民在國內外之舉動與捐輸。便知其然。不過戰事延長。兵連禍結。頻募壯丁。搾取經濟。致惹起一般人民反對。亦然屬一部份人耳。况觀日本報紙之記載。及社團所表示之態度。可知日本政府與人民之野心。不甚大分別也。

二、問此次戰爭何時方可結束。

答、此次戰爭何時終止。甚難斷定。不過以予觀察當在兩年以上。滬戰爆發時。予在演說上。及寄返敵校函中。即料定此場戰事。非一二年可了結。蓋我國決定不喪權不失地爲宗旨。而日本亦勢成騎虎。不肯知難而退。雖其國內人心厭戰。財政匱乏。軍力消耗。政潮起伏等等發現。但在一年內諒無崩潰之虞。即在一外起首崩潰。但完全崩潰尙需時日。且日人最好爭體面。又迷信是「神造的國家。有統治世界之權」。非至焦頭額爛。不可收拾。

之境地。亦不肯罷手。故此次戰爭如無別國加入及彼國內無革命發生。則延長至三五年結束。亦不足爲奇。然予甚願戰爭早日結束。實現和平也。

三、問此次戰爭倘若延長。死人必更多。受苦必更重。奈何奈何。

答、古人云、「一將功成萬骨枯」。又云、「爭城以戰。殺人盈城。爭地以戰。殺人盈野」。屍積如山。血流成河。古時戰具簡陋。尙且如此。何況今日科學發明。殺人利器。日新月異。豈不更慘乎。夫一將功成。尙枯萬骨。一國功成。又何止萬骨耶。況今日所爭者。非祇一城一地。而實是整個國家民族之生存與人格。主權之自由與獨立。則盈城盈野。更所不辭。而對方之死亡。亦有相當數目。矧吾人之死亡。是爲公義神聖。迫於自衛而死。死有餘榮。日寇則爲侵害他人。如作強盜。自尋死路。雖死、亦有餘辜。況我有如許之大民族。以比例計。所死亡之數。實少於對方。且受苦雖愈重。但所得之鍛鍊愈多。前途之光明亦愈大。此意在本書第九十九及一百版。論之甚詳。

四、問有些基督徒以爲捐輸抗戰。便不合基督愛仇敵之教訓。其見解合否。

答、基督愛仇敵之教訓。乃側重個人對個人者。因凡團體或國家。諸色人等均有所屬。信仰不同。主張亦異。此種愛敵高深教訓。非人人所能接受。故基督未有對團體或國家講此道理。且對於公敵及有碍大眾之權益者。基督曾竭力掃除之。觀其怒責法利賽黨祭司等。及清潔聖殿。鞭逐有碍公衆之貿易者。便知其概。日本軍閥爲人類之公敵。爲我國之蠹賊。破壞吾人之權益。搶奪吾人之自由。想亦是基督所認爲人羣之公敵者。然則不祇捐輸抗戰。卽身臨前敵。亦不是違背基督之教訓。但予不是主張基督徒好戰。乃是贊成基督徒自衛而戰。

五、問英國對德意親善。於我國有不利否。及英日將必秘密訂約分割我沿海各省土地否。

答、英相張伯倫變更態度與德意親善。此是其直接利害關係。對我無甚不

利之處。且無形中暗受其益。蓋若英國與德意發生衝突。則自顧不暇。焉尙有餘力助我。且張伯倫明謂與德意妥協。是恢復在遠東之權威。此卽對日本威脅而言也。至謂日英秘密訂約分割我土地。此不過是打草驚蛇。片面揣測之詞。想英國不肯冒大不諱而爲此。雖英國曩前曾併人國。但今時勢不同。對象不同。且英國屬地過多。輒恐管治不週。況更不欲樹敵於我國也。六、問吾人（西人）抵制日本。是否違犯基督和平及增惡結怨於人之教訓。

答、基督之和平。是建於正義公理之上。日本侵華是違背正義公理。亦卽是違背基督之教訓。吾人應羣起而攻之。而攻之之法。最易令吾人實行者。莫如抵制日貨。且抵制日貨。不是結怨憎惡於日本。不過是主持正義。濟弱扶傾之善舉。譬如法官判罰罪人。不是憎惡或結怨于犯罪者。且基督有憐恤饑寒及受難者之教訓。倘我人購買日貨。卽助其製造多量的饑寒及受難者。是適與基督之教訓相反也。

七、問蔣委員長所提倡之新生活運動。是否與基督教道理相合。

答、新生活運動所提倡管子之禮義廉恥。頗與基督之教訓相吻合。蔣委員長雖是忠實之基督徒。但以執政人員提倡宗教。必致發生反響。蓋政教須分離發展。是歐美所得之經驗。惟新生活運動。是以基督之精神所發起與推動。蓋創始與現在主其事者。多屬基督教徒。故新生活運動與基督教。實有彼此聯貫。互相臂助。協力爲國家人羣謀幸福之殊途同歸者也。且蔣委員長雖未提倡宗教。但有適合時機如去年耶穌受難節。及雙十節均有證道之表示、今年復活節更講「吾人何以要信仰基督教」。多人因之而受感。

八、問戰後物質破壞。經濟缺乏。民生窮困。不知何時方能建設恢復原狀。

答、若我國終獲勝利。則恢復原狀。絕不困難。蓋我國向來積弱。人心多懼亡國。今幸終獲勝利。不獨免致滅亡。且提高國家之地位。令吾人喜出望外。凡屬國人。尤其是寄人籬下之海外僑胞。均肯盡量投資。發展種種建設

事業。且國際上之信用激增。各國亦必爭相投資我國。夫如是、則不及十年即可恢復原狀而有餘。十五年前日本地震。物質破壞。經濟損失。均極鉅大。但不及十年。恢復過於以前之狀況。日人能此。吾人不能乎。

孫中山先生證道函

孫中山先生倫敦蒙難出獄後寄與香港道濟會堂長老區鳳墀先生之親筆函時清廷黨獄大興嚴緝黨人凡與革命首領作文字交者亦必治罪故本函首尾不署名殆以防告發株連也但該原函經國內外教會製電版多次刊佈一覽而知爲孫先生筆跡茲爲簡便計僅將該函抄錄如下

啓者弟被誘擒於倫頓牢於清使館十有餘日擬將弟綑綁乘夜下船私運出境船已賃備惟候機宜初六七日內無人知覺弟身在牢中自分必死無再生之望窮則呼天痛癢則呼父母人之情也弟此時惟有痛心懺悔懇切祈禱而已一連六七日

日夜不絕祈禱愈祈愈切至第七日心中忽然安慰全無憂色不期然而然自云此祈禱有應蒙神施恩矣然究在牢中生死關頭盡在能傳消息於外與否耳但日夜三四人看守窻戶俱閉惟有洋役二人日入房中一二次傳遞食物各件然前已托之傳書已爲所賣將書交與衙內之人密事俱俾知之防範更爲加密而可爲我傳消息者終必賴其人今既蒙上帝施恩接我祈禱使我安慰當必能感動其人使肯爲我傳書次早他入房中適防守偶疎得乘間與他關說果得允肯然此時筆墨紙料俱被搜去幸前時將名帖寫定數言未曾搜出卽交此傳出外與簡地利萬臣兩師他等一聞此事着力異常卽報捕房卽稟外部而初時尚無人信捕房以此二人爲癡狂者使館全推並無其事初二日自出暗差自出防守恐溜夜運往別處初報館亦不甚信迨後彼二人力證其事不誣報館始爲傳揚而全國震動歐洲震動天下各國亦然想香港當時亦必傳揚其事倫頓幾乎鼓噪有街坊欲號召人拆平清使館者沙侯行文着卽釋放不然則將使臣人等逐出英境使館始懼而放我此

十餘日間使館與北京電報來往不絕我數十斤肉任彼千方百計而謀耳幸天心有意人謀不臧雖清虜陰謀終無我何適足以揚其無道殘暴而已虜朝之名從茲盡喪矣弟現擬暫住數月以交此地賢豪弟遭此大故如蕩子還家亡羊復獲此皆天父大恩敬望先生進之以道常賜教言俾從神道而入治道則弟幸甚蒼生幸甚

耶穌受難予余之教訓

此是蔣委員長於去年耶穌受難節在南京召集之美以美會東亞合議會演說詞經在國內外各日報及教會報發表美國英文雜誌如 *Christian Century* 等報亦將其譯轉英文刊登西人讀之甚爲感動予讀之不忍釋手特附此以便檢讀

人生不能無宗教之信仰。革命者對於其革命主義。亦不能無宗教式之自信心。否則無論大小事業。皆無所成就。世人處事。每多遇難而退。或半途而廢者。皆無自信心。即無宗教之信仰故也。余信奉耶穌將近十年。讀經修道。靡

日或間。客冬西安變亂。事起倉卒。孑然一身。被困於叛部二週。嘗向監視者索讀聖經。益覺親切有味。而耶穌博愛精神之偉大。更使我提高精神。以與惡勢力相搏擊。卒能克復仇魔。伸張正氣。復承教會諸同道。爲余祈禱。精神感應。爲力實多。此余於感謝諸同道之餘。更不能不於諸同道前。歸榮於耶穌也。耶穌之聖德。余不能稱述其萬一。今日適爲吾主耶穌受難節。故謹本吾心之所得。爲諸同道陳之。

夫十架七言。非我耶穌最後之言乎。首句卽爲仇殺者祈求上帝曰。天父乎。彼輩所爲。彼輩不知也。乞赦之。大哉耶穌之博愛。吾於此思過半矣。今請以西安事變之事實爲例。當予二次入陝之先。卽已察知部隊之思想龐雜。言動歧異。且有種種複雜離奇之報告。甚至謂將有非常之密謀與變亂者。左右勸阻。爭欲尼之。余就所負之責任言。國家統一。始基已奠。身爲統帥。教導之責。萬不敢辭。况此身屬於黨國。安危更不容計。卽就余之宗教信仰言。當我主耶穌

末次入耶路撒冷時。明瞭危機四伏。猶昂然騎驢直入。不稍規避。至大至剛。亦勇亦義。余何人斯。退縮不前。矧余之愛部屬。一如愛子弟。決不計及其他。於是輕裝減從。毅然赴陝。變生肘腋。躬蹈其危。使中樞憂勞。人民惶慮。與夫同道懇切祈禱。歎仄良深。而余之良知。因以日進。余之愛心。因以日厚矣。余被劫持後。有以條件要挾者。有以甘言相誘惑者。有以武器相恐嚇者。有以交與「人民陣綫」公斷相威脅者。險象環生。不可言喻。然余爲篤信基督耶穌。於此環境中。每一念及我主耶穌。在曠野受惡魔試探四十日。與其最後經過客西馬尼園之獨禱。法庭受鞫之被辱。以及我總理曾在倫敦蒙難。因祈禱得救之故實。莫不歷歷如繪。令余提高精神。以與叛部作激烈之抗爭。且當準備以十字架被難之精神。於叛部交付所謂人民公判時。作最後之犧牲。以求無負生平之所期。到此自覺神明泰然。引爲欣慰。

事變既平。叛者自知爲魯莽滅裂。貽禍國家之舉動。深爲惶恐。然余遵奉耶

耶穌應恕七十個七次之訓誡。予以自新之機。復念誠信未孚。致未能予以精神之感召。心中慚悚無已。惟念余自興學統帥以來。常以二語訓部屬。此二語者。卽一、余如有毫絲自私自利。而不爲國家與民眾者。則無論何人。皆可視我爲國家之罪人。卽人人可得而殺我。二、如余之言行。稍有不誠不實。虛僞欺妄。而不爲革命與主義着想。則任何部下。皆可視我爲敵人。卽無論何時。可以殺余。此二語。余自信爲精誠之言。亦卽余宗教式之自信心所致也。此亦我主耶穌博愛之精神。與夫總理寬大仁恕之教訓。有以貫之也。

總耶穌一生。無日不在蒙難期間。其堅苦卓絕。博愛慈祥之精神。澈始澈終。未嘗稍懈。而余所得之教訓。要亦以此爲最大。先總理耶穌基督徒也。出其得於耶穌者。爲弱小民族謀解放。爲苦痛民族謀幸福。浩氣長存。光爭日月。余爲從事中國國民革命之一人。余對總理信仰之篤。當時雖無宗教之關係。然實無異於宗教。亦卽宗教式之信仰。此余所以始終能成爲總理三民主義救國

救民之信徒。而今且成爲耶穌救人救世之信徒矣。故益覺從事革命。所恃者惟信仰之人格。凡處艱難之際。或遭橫逆之來。決不肯苟全性命。以虧損人格者。信仰之所致也。質言之。吾人之生命可以犧牲。身體可以束縛。而信仰精神。絕不能受屈者。亦信仰中之自信心所致也。吾人於紀念耶穌受難之日。更有所感。特述人生之信仰宗教。及革命之于信仰心之重要。蓋如此也。以上所云。僅陳余個人一生信仰之所得。參以實事。敬以證道。非敢自炫也。願祝貴會合議會成功。

華盛頓抗英誓師文

美爲共和先進之國。創之者爲華盛頓。當華盛頓初誓師時。以最沉痛。最悲壯之文。勵勉軍人。軍人感奮。血戰八年。卒底於成。至今讀之。猶覺凜凜有生氣。且美國當時情形與我國今日全民抗戰。極形相似。故特錄之。以貢獻

於國人之前。其文曰。

嗚呼、今日果何日耶。乃生死之關頭。存亡之樞紐。吾美人當有一種最堅決之心理。以應付此至危之時機。吾試問我頭角崢嶸之美人。將樂爲自由國民乎。抑甘心爲異族人奴隸乎。吾大好之山河。寶貴之財產。將爲保管之主人。抑甘心送諸他國人之掌握乎。試歷數此觥觥之華屋。芸芸之良田。鱗次節比之市廛。將保持其美麗之現狀。抑甘心質諸他國人之府庫。或一任他國人之焚燬。而付諸一炬乎。吾又試問我百折不回之美人。將沉淪於萬劫不復之地位。抑振臂一呼。慨然而起乎。凡諸種種。生死決于俄頃。存亡定於轉瞬。願吾忠勇沉毅之美人。有以當機而立斷之也。吾困苦顛連。勞獨無告之美人。於此呼吸危急之秋。所賴者天心之眷顧。軍人之胆量。兩者相濟。或足以出吾民於水火。如其不然。吾暴虐不仁之敵人。所予吾人者僅此一線之生機。此生機爲何。曰萬眾一心。勇往直前。於死中求生而已。苟於此而徘徊也。猶豫也。則吾

美人將永墜於九幽十八層地獄。無回復自由之一日矣。惟此之故。吾美人乃毅然決然。希冀以一戰求最後之勝利。否則以一戰殉寶貴之自由。就國家言。就個人言。就時勢言。於吾人之一戰。皆有實逼處此之概。吾不幸而敗也。則世界之大。亦不復有美國之徽號。故此一戰。其影响何如。其關係何如。吾人於此。惟有以是非爲強弱。以曲直爲勝負。恃吾之是。恃吾之直。更恃吾上帝之庇佑。以鼓盪吾之勇氣。以表露吾健兒之決心。以成同仇敵愾之壯舉。

當此時也。吾美人心意目光。羣注視於吾軍人之身。吾軍人而果能爲美人作登彼岸之寶筏乎。則將來吾美人之慶祝吾軍人者何如。頂禮吾軍人者又何如。故吾軍人負此絕大之任務。不特思有以副吾美人之期望。亦須互相策勵。互相鼓舞。使世界各國。曉然於自由國民之講求自由與奴隸迥然不牟也。

吾於此更以一言告吾親愛之軍人。吾美人此役。實舉全國之生命財產。作孤注一擲。將以奠吾國基於磐石之固。躋吾子孫於泰山之安。惟此之故。凡吾美

國之老幼男女。無不深信上帝。愛護吾忠實之軍人。必能化險爲夷。而致吾美人於自由之境也。

吾暴虐不仁之敵人。無所不用其恐嚇。然而此種恐嚇也。舉我少數之軍人。卽可以一鼓而勝之。彼非不知動作有所乖。主張有所誤。而復悍然而行之。吾人就其所悍然而行之者而直搗之。其敗也。可立而待。

我今更以一言。告我親愛之軍人曰。勝負之數。可以預決。各歸爾隊。靜俟號令。一致殺敵。勿餒。

本書戰爭與宗教及救國與祈禱兩題本在三藩市基督教聯合演講之衍述意義其中各段意義亦分多次在各中西團體演講惟便於行文祇作在基督教聯合演講耳特附誌數語以資陳明讀者諒之

跋

鄭子產有言。國不競亦淩。可知國無大小。立於地球上者。國防之道不可不備。否則弱肉強食。供人宰割而已。吾國不幸與盜賊之倭寇爲鄰。檢查歷史。自有明以來。沿海之地。常遭其劫奪蹂躪。甲午之役。勝我以後。數十年來。其傳統政策。處心積慮。無日不懷鯨吞「支那」之心。囊括亞洲之志。更擬驅逐白人於亞洲大陸之外。般樂怠敖。妄作妄爲。此等兇狂癩犬之行爲。少明事理者。預知其必不能達其慾望。而有自取傾覆之朕兆。顧國家棄信。滅義。公約不守。行同強盜。其不敗亡者已希。「得道多助。失道寡助」。「兩軍相對。哀者勝矣」。古人已有明訓。最後勝利。必屬諸於我。可無疑義。

吾友周牧伯琴、近著「戰爭與宗教」一文。登諸金山時報等。都五萬餘言。詳列倭寇國情。及其國民性。宗教信仰。並日常生活。一一與我比較。朗若列眉。結論注重祈禱。以人憑神力。章望春生。天助自助之喻。指引閱者。獲得宗教上之慰藉。俾知最後勝利誰屬。可謂洞見癥結。抉盡隱微。發皇耳目。震盪神魂。非具屬靈眼光者。曷能語於是。書成索跋於予。自慚謏陋無文。辭不獲已。藏拙未遑。謹書此以獻醜云爾。

民國二十七年四月十五方復興謹跋於羅省復興醫館

本書著者其他著籍

〔愛仇敵〕此書二十年前在廣州美華印書局出版。翻版有十餘次之多。有誠靜怡博士、范誦誨孝廉李育泉牧師等作序。是書闡明愛敵之真理。分理由、方針、利益三柱要義。發揮透澈。

〔選民鏡〕此書亦二十年前在美華書局出版。翻版亦有八九次。有胡貽穀、董景安等先生作序。是書最合信徒之用。即非信徒讀之。亦可助其明白做信徒之資格也。

〔科學能否破壞基督教〕此書曾登紐約僑光雜誌。乃旁徵博引。根據事實。闡發理論。證明科學對於基督教祇有成全之。而不能破壞之之斷定。科學所能破壞者。乃假偽迷信的宗教耳。

〔我的宗教經驗〕此書詳述著者自歸信基督教後三十年。所經歷一切。得宗教之助力甚多。能戰勝一切困難。及加增信仰、知識、道德、堅心、毅力、奮鬥及人生之希望等等。證道事實。

〔振興教會十大要素〕此書經在廣州真光雜誌分期登載。顧名思義。亦可以知是書之內容如何。凡有心振興教會者。不可不人手一冊。以資參考。

〔宗教與教育〕此書內容。詳述宗教與教育之關係。宗教如無教育。是迷信盲目之宗教。教育如無宗教。是乏力無靈之教育。二者應相生相助。蓋殊途同歸也。

〔基督教與共產主義〕此書曾逐日登載香港大光日報。指出各種共產主義、或社會主義之謬。并闡明基督教共產之教訓。俾人知所趨避。

〔人的價值〕此書乃美國著名哲學宗教家卑利博士 D. J. W. Baird 所著。由著者轉譯中文。內容以宇宙萬物。用烘雲托月的方法證明人的價值。而人的價值。乃視其與上帝之關係深淺為衡。

〔宗教與人生〕此書十二年前在三藩市金山時報、及中西日報逐日刊登。都八萬餘言。尤在中西日報出版。後又在廣州市培英印務局再版。消流頗廣。內容詳述宗教與人生有種種極大之關係。於哲學、科學、心理、進化、人類等學。均有解釋及證明人與宗教之密切關係也。

其餘尚有〔歐洲遊記〕〔美洲遊記〕〔巴利斯坦(屬非亞二洲)遊記〕〔日本遊記〕〔演講集]等等著籍



周伯琴博士贈

贈

中華書局

WAR AND RELIGION

By

Rev. Pih Kum Chau, B. D., D. D.

First Edition May, 1938

Published by

Chung Sai Yat Po Publishing Co.

716 Sacramento St., San Francisco, California, U.S.A.

版權 所有 未經 許可 不得 擅行 翻印

中華民國二十七年五月初版
主基督一九三八年



定價美金每本

紙皮五毫
布皮十元 (郵費另加)

著者 周伯琴

代刊者 中西日報館

三藩市沙加免度街七二六號

三藩市華埠

代售者

中西日報館
金山時報館
發明明大書局
服務大書局

2
772221
(2)

2

772221

2